



賜餘堂集卷八

壽序

高中玄相公六十壽序

代呂館師作

隆慶五年十二月某日今少師兼太子太師吏部尚書建極殿大學士中玄公初度之辰年六十六稱始壽翰林院庶吉士某等爲少師所掄拔甄陶士也某承乏教習將率之往慶焉顧諸士謀所以爲少師慶者某謹拜手頓首言曰惟天生神聖之君開隆昌之運則必有名世者爲元臣碩輔於其閒以後先疏輔衍億萬載基業於無疆而名世者亦克靈承以集祐祉爲天命之所顧佑人心之所歸往而頌祝願戴當自有不容已者嘗誦詩書所稱述竊有慕於有商氏之保衡云夫保者保也上有君焉藉之以爲輔養者也衡者平也下有士若民焉倚之以爲程度者也蓋調元弘化秉軸持鈞以一人而兼領密勿銓衡之任伊尹爲保衡始相湯繼相太甲咸有一德丕式九圍而其球駿龐昆吾韋顧舉集於商之

庭夫豈偶哉道義先定取與不輕任重於先覺先知慮周於匹夫匹婦其心固未嘗一日釋也故格天宅師果親見夫堯舜君民之盛而敷求哲人具訓蒙士且爲國家長遠計則其盡平格之實成保乂之休以仰答純佑之意永篤駢錫之慶者固天命人心之所共屬者也今少師始相肅皇帝繼相今皇帝其宅心光大持己端嚴矢性忠貞蓄謀沈裕若嵩嶽若河海崇極淵淳固非淺陋所能知尤非贊掄所能悉者雖然嘗從少師後窺緒餘而私擬議之竊謂少師所生者莘之地也所遇者元良之主也所居者保衡之任也所存者若摧而納諸溝中之念也所操者一介不苟千駟弗視之節也入則調燮陰陽斡旋理道出則品藻官材劑量吏治經綸獨運權度弗滄凡革其故而釐正之起其蠱而振刷之爲耳目可睹記者如辭宰疏以明相職恤京商以悉下情定錢法以一民志辨誣獄以彰帝德慎錄用以飭臣度至於敦尙化原指斥儂習盡洗弊俗頽風俾賈譽文奸殉名昧實者無所售於世聲教四訖丰

采一新百司庶執事莫不忻忻然動色生氣者乃今四郊靖謐百嘉忻鬯諸酋貢享卽西北虜叩關輸誠爲我國家二百年來所創見亦奚異於共球駿龐昆吾韋顧之集於商哉堯舜君民蓋少師其身致躬逢之矣卽若等之所以掄拔甄陶者亦尹之求哲人訓蒙士意也少師爲國家致明盛且計長遠以建無疆之基則亦以垂無疆之聞而平格而保乂式克靈承永集祜祉惟天其顧佑焉惟人其歸往焉亦將以縣無疆之算於未艾也書曰罔俾保衡專美有商詩曰實惟阿衡實左右商王故於少師之辰也誦詩書所稱述者率諸士敬致夫頌祝願戴之意

呂南渠相公七十壽序

今皇帝纘序御極履端之祀乃少傅呂翁七十初度之辰也翁相肅皇帝十有三年而歸又十有二年矣當其爲相時天下被其德澤及歸也天下又莫不想其丰采蓋以未老之身居不用之地而其所以爲具瞻隆望者在朝重在野尤重可不謂聖世之休聞臣

人之盛際哉翁桑梓之屬文學趙子濟等將圖所以頌不朽而祈無疆者授簡問言焉不佞生也晚烏足以窺涯涘然仲兄嘗從史氏後幸獲瞻望儀刑卽家庭時時誦說固已竊聞之而不佞又辱交於翁之季子季子彬彬雅飭能奉翁之教以服於官其望雲愛日之誠殷殷也復申趙子意以請遂不敢以不文辭謹拜手頓首言曰天地之氣竅於山川而名碩之生也則山川之靈實權輿之會稽古稱佳勝襟海帶江奇巖秀區東南瓌雄之域也其氣之淳匯糾聚先文正謝公生其閒而翁則繼蹟媿美後先炳映抑何符也弘治中文正公以宮詹入筦機務矢忠秉貞以弼成熙和之治尋還居里中者久之嘉靖初敕使存問恩數稠疊及安車載召爲國元臣全節令聞遐壽完祉至於今稱盛美云翁弱冠登朝歷清華之階雅量淵識曠覽冲懷籍籍爲士林所推服旣典教成均作式多士受肅皇帝特達之知遂簡注超躋亦以宮詹筦機務拜相時年齒品秩視文正公相若也翁乃夙夜圖所以酬答恩遇凡謀

猷啟沃翊廟謨定國是其協恭贊議者居多肅皇帝神聖操羣下甚切惟翁始終蒙眷毗諸所敷陳悉稱上意旨出而吐哺下士其雍和之度誠休休有容然不與物競弗爲勢傾又斷斷無所附麗卒歸於正立朝時節槩勳名視文正公相若也乃未竟其用旋返於鄉頤和抱素履坦葆真時與其子弟談說詩書道德偕族黨觴詠賡酬爲樂於聲勢豔赫世之所沈酣沾懣於貴盛之後者泊如也霄鳳達鴻高翔冥舉春秋七十高而神強體康屹屹充充卽少壯弗逮居家時恬愉操履視文正公復相若也豈山川精奧鍾毓淵涵一發於文正再發於翁故惇龐淳固相嗣以興豐茂光融歷久滋熾其有關於天地之運數夫豈偶哉今皇帝體膺至聖遊意太平耆碩如翁者宜處以論道稽謀之任行且徵求倚注虛鼎鉉以待老成當如嘉靖初故事而計翁之年且未及文正公載起時則表儀朝著輔理昌明以慰天下之具瞻隆望者正未艾也然則翁之壽社稷生靈之永賴匪特鄉邦桑梓之私慶云爾詩曰惟嶽

降神生甫及申書曰天壽平格保乂有殷不佞愧不文請誦詩書之言以爲翁祝

申瑤泉相公五十壽序

蓋不佞中行辛酉所貢士也今少傅申公是年以尙書魁南服嘗聞句曲督學署中夜有火守舍吏驚寤視之光燿燿從公試卷出及入棘院共見袞衣象簡三神人降於南榮者而公游泮日則海潮逆夷亭而上三百里夫火者文明之貺也神人者表著之象也海潮者容納吐吞福澤德施之徵也嘉祥善事有開必先公之生豈偶也乎哉不佞則因公之生而竊有窺於天之純佑我皇家者遠矣上有神聖之主下必有翊贊之臣而天於臣之器識材度資適會逢之際若有默祐而陰隲之者所遇不同弛張亦異舒慘剛柔一消一息極重則亟反之人非天不因天非人不成也藉令斯人也與斯世未必相值也則其用淺而其道不大以光是故皇極三德乂用迭運而成周三后之治始之謹志卽繼之以克和謂非

天有意於人之國乎其睽也若或避之其際也若或契之權衡斟酌於其閒者必有以也茲無皇遠引旁證卽不佞耳目所睹記者嘉隆之閒政以賄成士爲利往天下幾濁亂矣時則有若華亭公起而芟夷祓濯與海內更始而臻維新之理旣之數閱歲而柄國者矯虔刻覈操下急如東溼烹鮮蓋韓商之餘烈乎及城社之孽消而廓清摧陷引繩批根且不遺餘力然鼎革之象成而小往大來之機亦旣啟矣公乃起而當軸持衡沖和調劑精明之用蘊於惇大幹旋之力運於微茫監攬權者凶而毋敢自尊眎挾私者敗而毋敢自便逡巡深念惟公惟虛俾九列百司各得效其職以從事一無所關闕國楨民譽其所推轂者幾於拔茅以征而彈冠進矣更布功令蠲除煩苛以養和平而修社稷之伐今之男安耕女安織士安業商旅安於途而在位者之賢不肖各安於其所也夫孰匪公之賜哉譬之人之身也華亭公當穢滯之極邪淫所乘脈理塞矣則蕩滌疏濬利用鍼砭公當傷殘之餘服瞑眩之後大痛

方去峻劑繼投則靜頤溫養利用參芝蓋自嘉隆以迄於今非華亭公則神氣弗揚非公則元氣弗復輔世之功同而揀時之宜則少異也然則天之生公既與之以涵停博厚之器純懿蘊藉之材而其用公也復當勝殘去殺柔克和中之世謂純佑我皇家而權衡斟酌於其閒者非耶然此語公之功而未足語公之心也頃之柄國者履盈居亢上冲年恭己以聽而威爽寵靈幾於振主上一旦赫然怒往者而未免稍疑於來者而下之人處疚既久望治孔殷宮府省臺停解維護閒有弗若意或又全求備責於公而未盡諒其難者公則小心翼翼上結主知大度休休下孚眾志虛而能受冲乎不盈謙光柔嘉漸以潛移誠格於上下之閒而已不佞閒嘗一侍公見其雍容闔澤真有古大臣之度而孜孜乎搜羅逸遺彌縫闕失惟恐有過不聞聞過不難於引之爲己責者公之心蓋臨淵履冰之心乎公第持是心以往金石可貫豚魚可孚協氣薰蒸休風嘉鬯爲我皇家建無窮之基則亦有無窮之聞猗歟盛哉

公年始五十耳禮稱服官政而公今所居政之本也尼父知命之期衛武公進德之時也公之忠誠勤款德且日益崇而克享靈承稽謀平格庶幾稱知命矣由知命而進於從心卽睿聖耄期猶不忘乎交傲也是又公抑抑之心乎仲秋既望維嶽生申公以鼎元正位台席文明表著巖巖師尹而德施旣普福澤且長容納吐吞公其海乎而何可以涯涘測哉不佞辱公之推引分誼甚篤又稔於辛酉事輒以昔所聞者修不斐之辭以自附於交傲之義爲今日侈談更爲後日者左券若夫登歌祝頌願進萬年之觴則四表億兆心也匪敢曰子不佞一人之私

封少師張翁壽序

代呂相國作

夫天之於人也恆因材而篤是故全德爲難而備福爲尤難惟積盛斯流光蓄鉅則享厚固非可偶致倖徼者今士生明盛之世齒公車紆寸組計莫不淬勵其行章顯其身要以據忠流惠上以毗主然後內以及親揚休錫號得推所生引考享愉逮致厥養此豈

非善慶之符人生之願哉蓋什百中僅一二見也卽一二見又未必能偕偕矣顧又有涉日久而食報遲者雖白首長世安及覩其子之柄庸當時以享其榮名祿位之極也若身踐穹階親躋遐壽寵靈莫媿功施愈光而聚百順以怡二人禔福凝禧履和增嚮於以咎罔極垂無疆又豈非吉祥懿鑠之至人生之盛際哉蓋千億中且不能一二見也乃今於觀瀾翁見之翁者今少師大學士張公父也暨太夫人偕膺純嘏歷被殊榮春秋纔七十耳神強體康卽少壯弗逮樂萃一堂聲流六合蓋其身所享目所覩者皆希觀之極歡非常之休錫也翁之福不啻備矣潛德隱行積慶迓祥其原邈且深必有爲人所不知者竊聞翁之祖好善樂施卽基仁肇和至翁則克纘厥緒復引之長焉冲度坦衷樂易軒夷猶然與人偕未嘗與物競嗜學力修已出百氏之藪而漁獵之文詞卒澤乎道義數數殿場屋故倦游而少師少連榮稱神業以顯揚屬矣卽少師自授書綴文以至登第未嘗就外傳惟服翁訓指翁蓋慈

父亦稱嚴師云語有之橫海之鱗匪育蹄涔干霄之木不產培塿信然哉某月某日爲翁初度辰門下士某等共謀所以頌祝之者問言於子謂子從少師後或知翁諡也子則謂此未易以尋常語者蓋於翁之壽可以徵天人之際焉而於少師之所以壽翁者又可以觀臣子之極焉何者惟天佑國家欲開淳耀昌明之祚於永久則必篤生名世者於其閒夫旣篤生之以全德則必厚貽之以備福此嘉樂宜於民人固保佑申重之無已也然天之意通於君而寄之於民君心獨簡民情共懷人也皆天也今上英睿奉天道以立人極而少師則以事天者事君其鴻猷駿惠不動聲色而措斯世於安康者不具論第論其一德所孚帝衷特注若平臺首召宸論手頒頌者建樓堂尊藏綸翰則謂其功在社稷以純忠捧日賜之名優崇隆渥誠曠古罕儷矣薄海內外沾濡化育熙熙喁喁於蕩蕩平平之治是天子之所倚與天下之所賴均不可一日無少師少師之有父也固莫不舉手加額相與喜傳忻戴以祈翁壽

者矧樓堂之成計當翁頌祝之期仰而寵光赫奕於上俯而孫子
賓戚紛纒於下其遘會適相值不可以徵天人之交與乎少師自
筮仕以來精白矢念夙夜匪躬歷三朝如一日迄今更遭逢知遇
圖惟報稱入則啟心輔德出則正色率下惟兢兢愈益操慎居寵
克畏履盈若冲然孰非奉翁之教以竟其欲爲未遂之志也蓋捧
日之誠自其瞻雲之念移之而忠之純者正孝之所以爲大此之
謂維則之思此之謂不二心之義不可以觀臣子之得所止乎夫
少師爲臣子立極而因人徵天天之因材而篤者殆將於其裁者
益培之矣然則翁之壽與少師之所以爲翁壽者誠千億中之一
未有兩也烏可以尋常語哉乃若社穀永綏期頤未艾縷乎休哉
茲特其權輿云爾

呂相國師母張太夫人壽序

始不佞中行舉進士出於粵相國呂師翁之門翁歷事三朝階一
品勇退令終貽穀流祉而復有祠部君者趾美象賢承家華國今

母張夫人六旬初度君適以行役假道奉觴同舉士爲京朝官者
若而人追感翁之知遇又快觀夫人之榮康也僉謀所以爲壽者
授簡於不佞不佞竊聞之易矣曰無成而代有終地道也臣道也
妻道也蓋言坤之貞而順乎天臣於君天也妻於夫天也雖有美
舍之以從事以坤承乾之義也於是乎知翁之事君與張夫人之
事夫皆有得於地道焉翁直講幄踐台司至於參密勿而修社稷
之伐操柄者寵利漸張柄鑿難合矧位近於逼幾鄰於忤嘖呻眴
睽閒轉睫成穿而翁以孤誠樸忠盡黜其聰明以應之逡巡深念
闇然巖然乃免於猜忤而陰持婉調於沈默之中亦可謂難矣然
闇以內夫人主之拮据黽勉於中饋而後翁得以夙夜在公無所
顧也蓋以勤佐翁之忠而弗以爲己能也當其處貴盛四方以饒
美脂腴至者泉流輻輳而大官之膳長信之金日走長安第翁獨
屏玩好卻苞苴華侈矜飾之習一切洗之家有短衣操作之僕而
門如水矣夫人盪綠佩玉爲天子所命婦而損嗇如韋布故賤時

有提甕棄鮮之風而後翁得以履方操潔無所點也蓋以儉佐翁之廉而弗以爲己功也語有之貴張人之伐富塞人之聰華章被體聚祿望腹往往沈酣沾戀至爲迷途懼府乃悔其解脫弗早也夫亦牽於妻孥家室之爲累乎翁爲亞相卽首揆可旦暮濡忍至者顧知止不辱見幾不俟竟以完身全名與夫人相攜還鹿門無所繫也蓋以賢佐翁之恬讓而弗以爲己德也夫翁之遠機利薄紛華兢兢於矩矱得地道之貞焉至其善藏不伐成功不居席盛恬安務樞僕承之遺榮避寵若浼也得地道之順焉若夫人者佐翁之忠之廉之恬讓旣克盡代有終之道矣而曰吾何勞吾習吾酒漿絲枲之事耳膺綸綍御珈珥吾何修而以夫子故徵上寵靈亦惟守吾夫之遺謀炯戒以勸吾子或可報上恩毋遏佚前人光耳噫雖有美舍之而弗敢章也此其無成之道乎是故不佞謂翁之事君盡臣道也謂夫人之事夫盡妻道也而皆有得於地道者也抑有進焉坤於乾爲妻於六子則爲母坤含美而化光昭於物

母含美而化光昭於子今夫人訓育其子祠部君成進士高第服官清署次子亦以賢能籍上矣且飭躬砥行恂恂乎樸茂淳謹之容望而知其爲翁之子也所以行翁之休而引長光大之者蓋未艾矣庭闈之間自相師友辟之徵羽成音隳括成器相得而道益章卽含之其美自不可掩者夫人又兼盡乎母道矣抑猶有進焉地道曰無成亦曰無疆而變盈流謙卽造化消息不能違也夫滿而復酌則傾盡而無餘則竭翁畱餘而不敢履滿今遐齡景福若夫人之食報足爲左券其於易之旨也深哉使衿韋鉛槧之士無所紀德綴辭後之作者將何觀焉不佞因讀易而推測翁之德謙之至也夫人之福無疆之盛也姑以質諸同舉士僉曰吾師翁父子故以易起家易之旨夫人所習聞者也請以子之言書之於簡而吾曹更引西池南山之頌稽首賡歌屬而和之庶幾足當夫人之心而爲之加七箸哉

封侍御東田茹年伯暨馬太孺人雙壽序

遵化茹君子孝與予同舉辛未榜進士進士之具慶者什之三侍
嚴慈者什之三而永感者殆什之四矣至於未老並封微藉寵靈
覩其子若孫之光榮縣衍躬禔純社家用全昌百不得一二而又
惇倫修行刑于室家馳譽於鄉曲人頌戶禱莫不願其榮名壽考
也則又千不得一二焉茹君起家服官授武進縣令以治行高等
徵入爲御史督漕按部歷著風裁旋以糾彈大僚墨吏忤柄臣指
出之僉臬司已稍遷佩二千石印綬備兵臨淄之境予從田閒特
詔起還之侍從次臨淄茹君爲東道主逆之境上相慰勞甚懼蓋
君爲令時予引疾居里非公事未嘗至偃室君或枉車騎過之則
不敢踰干木之垣交若水而久交則若醴也語予曰不肖舜蒙庇
徼福寧不踰涯分哉竊忻忻焉厚幸之矣舜從大夫之後綱紀四
方而二親既耄耄神力尚王天子超然推恩降辭所以尊寵褒崇
之者至於再矣重纓襲帔衣繡橫金輝煌哉而舜兄弟凡三仲以
文學待舉季則以武弁爲督府百夫長孫凡七亦有衣巾庠校者

而曾孫生且期子姓甥屬幾三十惟人所遭獨舜爲樂詎止云俱
存無故已也且吾翁孝友篤至寬然長者好施予而鄉之窮乏凡
欲飽饑愈疾者恃以爲緩急人負責則折券與之若吾母尤勤儉
拮据持盈履約家稍稍饒給衣食而荆布蔬糲無敢犯也殆庶幾
所稱俯仰不愧忤者舜所歷敷微有作人造士勞舉奉吾親之訓
而教育之茲者商飆屆爽玉律方清爲二親之誕先後僅旬日耳
舜也有官守不獲鞠香帑鞞於膝下子姓族黨執漿酌爵北面而
百拜之曰願家大人壽也纓簪耆碩走幣舉觴比肩而再拜之曰
願鄉丈人壽也吾二親之心庶足樂乎然而庭幃私祝里閭恆談
也子今往載筆承制當網羅山澤閒微言隱行以風世軌俗舜也
丐一言爲二親祈無疆垂不朽可乎予曰唯唯夫茹君之爲令也
五閱歲易直豈弟政平人和膏澤所流旁皇周浹正所謂居不爲
赫赫名而去則見思者及其冠豸冠觸豺狼之邪不避權貴而
今且按臨淄安集兵民招徠商賈濡如雨露凜若冰霜懼忻愛戴

之聲載途溢耳矣推厥原本則誰所貽也有不願抒南山之頌傾北海之尊者乎是將以億兆人之心爲親壽也蓋千不得一二者翁與太孺人得之今茹君茂績華聞益表表於時人之蒙休者未艾則天之佑善者亦未艾翁與太孺人之食報也蓋論今所遭哉茹君聞予言謝不敢而其色則輒然若有當也遂授簡命書致之惇史獻言之後

趙西翁年伯八十壽序

當隆慶辛未予讀書中祕與趙長公文明聯席分曹爲筆硯交最習時次公則以宰邑治行高等徵爲御史矣萬曆癸未予起家編戶御史晉中丞開府南服予在填撫中長公則亦以御史忤當塗用左秩累遷督學中土今且司憲大藩被金緋而次公遂已躋九列佐六卿夫兩趙公者蓋詎以功名顯乎崇德令聞峻猶清節爲一時鉅碩此其原本可易易言哉越丙戌予請休沐於家邑侯徐公與兩趙公同里謁予曰兩趙公之尊人春秋八十高與母淑人

偕白首長世長公便道過里侍一日養以奉萬年之觴里中人爭侈談偉觀其事聞先生習長公故授簡徵言以申某同里之情亦以明先生通家之誼予曰唯唯此予意也矧重之以侯命乎夫棟杞上銳干霄下垂蔭百畝人不護其枝榦而護其根根固而後所蔭者久也醴泉之灌輸斥鹵沃千頃人不惜其浸漑而惜其涓滴之穴穴無恙而後所浸漑者遠也此原本之說也趙翁少而習博士家言以經術無害廩於庠裒然先諸生謂取一第易耳竟弗第也故事諸生易第而難於貢蓋學使者歲時試試不無生得失而趙翁則數試輒數先諸生於是貢而爲校官則又多所造育能其職業無何拂衣去蓋厚蓄薄施多積而寡取之嗇其所可爲者於身以畱其未竟者於後之人也今兩公者無論其爲令則政成百里爲吉士則聲先羣彥卽爲天子耳目矢其精白條便利之計朝夕獻替以佐國家在朝者莫不推其所自生而謂翁之教以忠也爲生民保障激揚清濁輯綏困窮布上德以旁皇周浹於四方在

野者莫不推其所自生而謂翁之教以慈也爲士子師帥端軌植
標率之以行誼其所提衡鼓舞足以樹惇成裕而型範於斯世在
庠序者又莫不推其所自生而謂翁之教以正也若翁者蓋不下
堂階不勞厝注而功德在朝亡惠澤徧寰區矣藉令一日兩公侍
翁左右進上尊割大烹而甘之從容問曰吾故嘉隆間老文學耳
以吾職所得爲者盡吾志之欲爲難乎當矣教而等在事庶幾成
吾志而何以共而等職乎兩公具以所歷敷之狀對某某兒爲某
官時所建策也某某兒爲某官時所樹士也某某兒爲某官時所
平反之獄所全活之命也對未既而翁有不瞿然起而色懾心快
者乎天子累錫崇褒寵靈光大之自再命三命以往無已時而海
內士若民踴躍加額不謀而同爲華封人之祝者不知幾千百人
翁所邁古今之極榮宇宙之完社也翁誠思仰塞天子之嘉命而
俯答海內士若民之共願者何以哉亦惟專精神加七箸涵和凝
禮以享無方之養而安其身於家俾兩公得畢智竭情夙夜在公

釋內顧之虞而安其心於國而已矣夫翁之身安則子之業益光
子之業益光則翁之功益顯澤益廣而志意益怡神氣當益王然
則翁之壽其可以歲年計乎被蔭者重其本沿流者溯其原凡蒙
造於兩公者夫孰不爲翁願焉寧獨侯同里之情亦寧獨子通家
之誼所得私哉抑予又聞之深山大澤龍蛇出焉翁所居蓋潮汐
吐吞之所去洙泗之境若此其近也故萊灘之間多賢人且多盛
事予所覩兩公者泱泱乎齊風表東海矣卽徐侯之宰子邑也廩
廩德讓稱廉平魯無君子斯焉取斯子因頌趙翁家盛事而竊有
感於魯之多賢人云

宋南翁年伯榮壽序

歲辛未之春舉進士頃有詔簡諸進士文學茂備者爲庶吉士讀
書翰林宋太中氏在選中而子亦以迂謏廁宋君之後故事庶吉
士必推擇一人爲之長長莫先於宋君者眾皆以兄視宋君宋君
故有敏給才而器度復溫厚由由然未嘗挾長以先人也居久之

顧謂子曰某先世於孝皇時以金吾上將軍督兵征貴竹諸夷剋平之因畱鎮其地守其官蓋以武功襲封文職云至於父尤克績前烈以承上休命嘗撫定鬼方建樹神策如獨山如巖梅如養鵝等大役鉅功能卓卓表見當道者最績旌賢之檄數數至也身行閒者五十三年泊引年謝政栽花結亭笑傲泉石卽小構精室燕處私服必悉極鮮潔若不忍以纖毫垢染點諸躬者及其教某輩尤嚴諸子誦讀至夜分恆督率弗置而其禮士好奇之懷一當意卽千金可傾無少係吝色茲春秋七十有二高矣與其母蕭結髮齊眉偕康強無恙某今獲從諸君子游幸遭遇休明下覃恩之令特予庶吉士以曠典俟授職得以子之職晉厥父母是某於君爲殊榮於父母爲鉅慶子其爲我文之以答罔極而貽無疆也予不文又烏能闡揚懿鑠然頌祝有辭卽不文亦通家末屬之分也以予之所聞於宋君語若翁者殆庶幾古賢豪之風矣夫豈卑卑汶汶者儔哉其服於官也則奉職矢勞其教於家也則貞履信度

其承先而貽諸後也則爲箕裘之業爲光裕之謀且先世以介冑起家未有以文學興者而翁之子績文種學則登科第躋清華之選其所以鍾慶毓祥作則示範者又自翁之身始之今其白首長世食報蒙休天之所以佑翁者若持左券而不爽不憊矣夫身爲天子要荒臣策功名於萬里之外而又有子爲天子侍從臣馳榮寵於一命之初由是以禔福凝禧履和增嚮爲鄉閭所咨嗟忻豔焉誠可謂閒值罕儷者翁之心豈不大愉快哉今宋君歸而率諸弟若孫緘璽書命服進之翁燕几在堂樂懸列戶凡所以聚百順怡二人者彝章采飾奉其歡鼎烹牢醴致其適川陵松柏引其年謂非吉祥善慶之符世之至樂而人生之盛際也耶夫翁以康強之身高蹈遠引則旣無所汨於外而顯揚光大之績於子乎屬之則又有所樂於中中樂則其志愈益紓外不汨則其神愈益壯日夕忻忻然保攝元氣握固真精社穀永綏期頤未艾卽容成偃佺奚讓焉然則翁之榮蓋方至之徵而翁之壽亦不啻難老之錫云

爾宋君聞予言色沾沾喜曰子之言非謾語也果足以代頌祝之辭矣請書之以歸爲翁獻

王龍岡初度序

古稱恬愉不相兼蓋辭榮名尚幽曠寓情遠地潛跡衡門招雲月於東臯侶猿鶴於北谷足以寄其高蹈遠引之蹤其心泊如也夫是以謂之恬乘軒車紆朱紫致身膺仕策足通衢樹勳業於當時流聲光於後世有以愜其報國奉公之志其情豫如也夫是以謂之愉出處異途進退殊境處江湖者未嘗忘廊廟之憂恬矣而不愉也繫簪組者又不免動泉石之想愉矣而不恬也是恬愉不相兼之說也若今龍岡翁者不其兼矣乎翁負雋才馳令聞種學績文甫弱冠遂領鄉薦謁選得鄆陵縣令繼歷武定德兩州守旋乞休退閒其進而出也爲名大夫其退而處也爲隱君子說者或謂翁愉於前恬於後此可以言兼矣而予之說更有進於此者翁之恬不特退而處焉而後恬也卽翁之俊茂宏邃俟舉上第當無難

者乃僅就祿仕蓋當進取之時已具曠達之識而非計階資於榮利者比若夫翁之愉則尤不必於進而出焉而後愉也翁爲職方尚書郎龍洲師之元昆今翁雖川視巖居寄其高蹈遠引之蹤矣而復有人輸忠就列於朝以愜其報國奉公之志方且贊機宜勸彝鼎以承上寵畢臣分也以衍先澤昭子職也以繼兄志盡弟道也翁之少試而未竟者皆於此乎終之其爲愉也不亦大乎蓋翁者身隱江湖情忬廊廟而泉石簪組各所適焉古稱不相兼是烏可以槩翁哉然恬愉之說出自養生家愉則無所嬰其內恬則無所汨於外外澹以泊內和以休日夕忻忻然頤養元氣握固真精當且朱而顏玄而髮康強而體翁之壽固未有涯也予也南陬下士也出龍洲師門下奉龍洲師教曰少嘗受誨育恩於翁實兄弟而父師也今初度以不得捧觴致祝爲歉嘻師其無歉哉師之所歉者正翁之所樂也樂其心不擾其神恬愉相滋壽之原也則師之所以爲翁壽者又奚取於捧觴致祝云師聞之遂命次第其說

以奇獻焉

陳澄江年伯七十壽序

語有之大德集福美意延年有旨哉其善言天人相與之際也蓋德隆則祉穀永綏召慶之由也意美則志體俱適致壽之原也陰陽相協捷於影響殆非可偶獲倖徼者乃今於澄江陳翁益徵云翁起家進士高第初守州既僉按察司事敷歷所至聲籍甚無何卽解組拂衣而令子憲副君接衽步武起自廷尉評擢二千石以四品滿秩晉翁階中憲大夫乙亥歲正月上日爲翁七旬初度暨唐恭人偕老並康憲副君夙戒飭具將上介壽之觴燕几在堂樂懸列戶綺縠特進鮮腆畢陳凡聚百順以怡二人者竭精殫愛矣斯庭闈之盛際里閭之休聞也戚屬姻家諸文學某等擬造翁之堂進一卮爲壽醴酒旣具屬子修酌者之詞子不佞卑卑無足以當翁者顧翁與家大人少同學旋同舉於鄉同升於朝旣退而處於鄉復爲比鄰歲時伏臘社會徵逐又最懼子故通家子也不得

以不文辭請先陳當否而諸文學擇焉子遂進曰世所謂嘉祥善事人之竭蹶蚤夜而趨者顯榮壽考爾彼壽考者或爲庸眾人且未必偕偕矣而顯榮於其身又未必於其子卽白首長世安得睹其後之趾美也翁則仕膺華秩躬享遐齡夫婦偕焉而憲副君更相繼秉憲肅度豸衣隼旟有赫斯皇玉立蘭森且振振未艾得全全昌是之謂備享享備斯養隆養隆斯氣紓可以祈無疆之錫矣請以是爲酌者先諸文學曰未也更進曰顯榮壽考遭遇難矣而行義無所稱述惡能爲有已翁則履坦葆貞頤和抱素以適導性以愛觀物以恕容眾以醇謹宅心以矩矱律己以和巽諸俗以清白貽子孫于子煦煦卽戚獲惟恐傷其意偕友生子姓日觴詠賡酬爲樂里中人以大慈悲擬翁咸願乞翁百歲之身爲家邦長厚之範是之謂完德德完斯神王神王斯履祥可以貽不朽之聞矣請以是爲酌者先諸文學曰未也子則避席曰說芬華誦行誼言卽人人殊舉不出此兩端者宜無當於翁也翁結髮登朝不斑白

而釋事以未老之身居不用之地既有年矣而憲副君宏猷偉略投之所向靡不恢恢乎游刃其閒豈不稱才大夫哉乃亦不竟其所施當強壯謝政得歸侍翁於家承懽聚樂行行愉愉也藉第令翁以身赴功名之會據要津崇爵安得優游自適以樂其生又使憲副君綱紀四方卽都三公之位而以易一日之養必不願矣矧注盈挹損忌滿益謙造物者默有權衡翁方退其躬以畱餘膏其享以垂裕植槐貽穀之仁蓄深培厚天且申重以佑之衍方至之休以裨翁未盡之祉由此食報延慶將使世世昌焉皆翁之澤則亦皆翁之年也茲言也其足以當翁乎而遐年集福天人相與之際果不可誣也諸文學輾然曰庶幾哉吾儕將以是聽命閭人矣敬書之於閒

何鳳泉年伯榮封序

今皇帝改元下推恩之令凡羣臣升朝者得以子爵晉厥父母今侍御何君方讀書祕館有詔祕館士俟授秩亦得以子爵晉厥父

母至厚幸矣以故何君獲封父鳳泉翁爲監察御史母爲太孺人先是何君以安車迎父母於邸里時遇慶施躬沐恩賚何君函綸綽章服跽進於庭中翁則赴鴻臚司賓從事爲納名陳辭拜承闕下出而受諸公卿大夫賀蓋不特爲殊錫亦稱奇邁云乃何君造子曰不肖成父母本以布衣窮居躬處士之行進不得紆青曳紫游揚其聲名退則訓迪不肖尋詩書弦誦之業卒用微一命茲幸藉以榮二親矣子史氏故與不肖同門舉及讀書祕館又比署居也其爲我闡述懿鑠於以彰君賜而愉父母之心哉予不斐第習聞封翁行誼甚高嗜善修義奇偉有志節少艱辛事家人生殖裝游貲息用孝養父母必致洗腆其躬享身御卽緡錢斗粒不妄費而戚里貧乏則常出其黍累銖聚者振卹之猶棄糝牌偕繼母弟同居曰吾同胞家大人遺體也相友愛無違顏閒語由由然處鄉閭卽有持短長齟齬以嘗翁翁逡巡弗校也故鄉閭莫不誦翁義又莫不稱翁爲長厚庶幾哉古之履方蹈矩飭躬篤行者云豈

其久於涉歷數得從賢豪父老游習知當世之務能折節爲恭儉以故老而能勤富而好行其德耶及教侍御君與季子汝中寬其資條其課督曰吾未嘗問學卽不自致身今屬之子庶有所託漸表見乎而太孺人母訓更嚴佐翁之教也良懇侍御君果翱翔雲霄今臺中稱籍甚而翁卒以其子貴聲名施於縉紳閒卽與所自表見者何異焉夫榮名壽考世之人所謂吉祥善事竭蹶蚤夜而趨者乃桑蓬夔牖之夫不得齒公車占仕版而其後或有賢子孫振之則又涉日久而食報遲非白首長世不得爲封君貴人爲封君貴人者恆濡染聲利陵轍里姓席資導侈以快意買譏寧不奸訓辭而忝寵命若翁之邁際休隆旣難而行誼重鄉閭養恬食舊終始無少變其素爲尤難然則翁詎獨善成其子哉語有之累基者崇數沃者豐其由來者遠矣侍御君負雋握奇方駸駸柄庸且建崇肩鉅其承君錫以爲親榮者正未艾也則翁與太孺人當社穀駢臻譽命登等奚足論今日然今日所可賀者政其爲異時者

權輿云爾

羅母劉太夫人七十壽序

予不佞與今廷尉丞羅君舉同榜貫同里又生同庚也君自諸生時嫻然能文章筮仕爲令尹則神明之譽在楚以治行高等徵入爲侍御史按部則激揚之績在粵督學則烝進之澤在圻甸乃今則爲廷尉丞躋大卿之列通顯矣然君不以歷敷之效爲己能而曰此家大人暨兩母之教指所授也又不以榮寵之階由己致而曰此家大人暨兩母之澤蔭所貽也兩母者嫡母汪所生母劉也與封翁並榮康白首長世三尊人享其子之養於一堂而劉母以萬曆十三年二月七日爲七旬初度廷尉君守官輦轂下有循陔望雲之思焉不佞擬綴辭爲祝未有當也君之姪別駕懋功造而徵予言及受簡修言猶未諦其詳也光祿江君偶過而謂予曰女婦之行不出閨闕子知廷尉有賢母乎嘗從鄉人戚屬閒聞其什一矣母性婉變目涉書史產維揚揚故東南都會區而封翁挾貴

行賈於其閒脂轄鮮衣蓋芬華之境殷盛之時也母歸封翁爲副
室拮据操作壺以內悉任之事姑能承顏養志而以身先其臧獲
食指生產漸以饒而人恃翁爲緩急則無所靳於施予鄉民避島
寇羣走城闔窮迫無歸輒請封翁居澳粥饑多藉以全活者帛布
交易卽少鮭菜絲桌平其直復與之以贏不屑屑於銖兩人人悅
而就之翁與叔氏微有郤兩家子業儒聲俱起旣翁子取科第而
叔氏子夭折母則謂翁曰彼不幸我幸也今當閔之而安可不自
我忘之乎力爲調解兄弟相懽卒如故矣封翁老而傳筴廢箸瓜
分諸子丙夜持籌擘畫腴瘠高下之等而難之母則又謂翁曰我
之兒孽也田取其磽廬取其敝足矣何勞苦乃翁爲也翁之子凡
七而出自母者三撫育之如一允哉稱鳩鳩之愛乎故最得汪太
夫人之心而能佐封翁之好行其德焉至其教諸子之學口授句
讀手縫紉以課督之廷尉君經術吏事爲時宏鉅而季君亦以賢
能籍上矣天之報施也不彰彰較著哉光祿言若此不佞因得而

論著之夫燕喜之頌岡陵之祝古人旣引之以千萬年而必本之
於德善者何哉冠紳章服奚取於榮惟忠勞效於國而後謂之聚
順鍾鼎旃茵終歸於敝惟仁義施於家而後謂之履祥今劉母以
孝謹事姑以勤嗇佐夫以詩禮訓子以恭順事嫡室以和惠待里
人至於周卹窮困明於誼調解兄弟篤於倫辭讓饒腴之產近於
廉閭闕之行始終依於道卽鬚眉丈夫弗得與量能程志斯不亦
性於仁義者歟乃廷尉奉親之教以效之君者十五年矣無論躋
膺陟要爲其母榮華試取歷敷所至功勩之槩具白之母前某某
是令尹時所興革之利病也某某是侍御史時所建白之封章也
某某是按部時所澄清之綱紀也某某是督學時所培樹之髦雋
也某某是今廷尉丞所平反之冤抑也皆家大人暨兩母所授之
教指也然後雜引其歛謳祝頌之詞哀而致之觴而其所以聚百
順於三尊人者可謂備矣西池之獻南山之謠又豈足羨哉夫履
祥者介福聚順者凝祉則母之自爲壽與廷尉君之所以壽其母

者俱未艾也誠所謂一日二日百歲千歲者也不佞所論著亦庶幾古人燕喜岡陵之意本之於德善者乎光祿言不誣而別駕之請且誠遂書之質於廷尉君并以伸通家猶子之私云

施年伯母七十壽序

子聞之古昔稱孝云其上養志其次養體蓋致身顯名樹德彰譽建勳業流聲光俾人之追其所出曰休哉誰氏子也而於是乎遂其親之願此養志之孝也左右就養晨夕定省承顏色問起居俾親之安其所奉曰幸哉吾有子也而於是乎竭其子之力此養體之孝也然養志孝之上矣而陟吧望雲又莫不爲之徘徊瞻戀焉若將以三公之享易一日之養而恨其弗可得也子之情固自有大不安者乃謂以養體爲孝則彼俗子里嫗終其身相守闔闔而竟泯泯無所表見者世豈少哉或又非親之所願於其子者也是故親之志與體不得俱遂而無歉而子之養志與養體卒不能各盡而兼隆此閒居之賦君子蓋譏之而北山之詩且反覆歎詠謂

其勤王靡盬而將母之不遑也子用是竊慕於施君勵庵氏矣施君奉太孺人之教視身淑行種學績文以底於有成今年春舉進士高第既授官儀曹上方羅英賢置之禁近而又當明盛興禮樂修郊祀禘嘗議封貢懷來賚錫宴享事事悉屬儀曹固稱華要地施君稔粹雅溫夷博聞識閑禮度卽周折步趾莫不中規矩服位贊政甫旬月聲譽隆隆起太孺人之所願於其子者果克承之而無負矣顧施君則念太孺人弗置太孺人遺書戒曰飭爾事無我念也我老矣幸強健無恙顧安鄉土弗便道路耳施君得書念太孺人更弗置將迎之是以子之仕而遺其親以勞也弗敢也卽陳情解綬去施君當無難者又恐以子之情而反缺其親之望也益弗敢也乃上疏乞改除南署冀便道省覲復得近地迎養焉其視世之計階資較涼炙趨權干進於朝市閒者蔑如也茲且得請歸歸而及太孺人誕辰具冠服致鮮腆集姻戚宗黨稱觴進焉曰策也受劬勞誨育幸獲廁縉紳承祿命懼辱親不敢不勉爲吾君

見餘堂集卷八
矢臣節又重違親不敢不勉爲吾母供子職太孺人聞之當忻忻然喜且愉愉然適也蓋既能致身顯名樹德彰譽爲朝廷之所簡迪里閭之所歆豔又不必陟屺興思望雲繫念如昔人之徘徊瞻戀者入則承顏色問起居調滫髓旨甘之味陳几杖席衽槃匱之器候寒燠裊襲咳嚏噉疴癢之宜出則黽勉亮工馳驅盡瘁茂其績永其令名將建立以圖不朽而太孺人之賢亦章顯以垂無窮未嘗賦潘岳閒居而使北山大夫聞之當日悔其勤王將母之弗施君若矣然則太孺人之志與體殆俱遂而無歉而施君之養志與養體豈不亦各盡而兼隆矣乎子用是固竊慕施君之孝之全而尤私卜太孺人之壽之未有涯也何也蓋樂其心是謂盡志安其體是謂盡物盡者備也備則百順之所由聚聚則五福之所駢臻者也且聞太孺人素習養生術善葆攝調劑嘗手製藥餌方物濟活人甚眾施君之養志養體者既如彼而太孺人之自養生者又如此行將玄而髮朱而顏康強而身固精怡神長年引考卽

容成偃佺奚難哉時予讀書祕館館中兄弟三十三人每道說施君事莫不敬羨樂談之而其親有在鄉土者又惘惘感動焉因屬予序其事先施君往以爲太孺人壽

毛母陳太孺人七十壽序

萬曆元年臘四日爲毛母陳太孺人七旬初度而某母段太安人視毛母則少一歲云毛母之誕豕君希兌氏率其弟若子舉觴爲壽暨受諸子姓戚屬賀謁誠致腆衍愉愉也時季壻某羈官守且典在筆札未遑走一价申千里之祝越明年得省還里中因得拜毛母堂下見毛母顏童髮玄體康精溢灼灼然有啖桃食丹之容焉自予授室時謁毛母母正在牀褥家人伺幃帳外問起居旋稍平步止猶然藉扶持乃今春秋七十高而強健顧大倍疇昔言動有法嘖笑無所苟其篤於禮而合乎道一一中矩矐視聽不衰卽少壯弗逮是不稱難老之徵而永介無疆之祉哉茲其故予嘗諦之矣夫世之言壽者上厚德其次厚養德養兼隆斯形神攸同

壽之原也毛氏自古菴先生以理學名於時其世澤家法之貽遠矣而學古翁嗣以起昆弟子姪交相勉飭奕葉令裔咸澤於道義母爲學古翁之配使非志喻行偶於道義與有聞焉庸詎能上以承先內以佐外而下以啟其後也母之淑訓懿範悉可楷式卽子耳目所睹記者甚詳蚤歲事古菴先生以孝謹爲娣姒先拮据將事勤嗇起家家人無慮數百指率教趨役靡敢懈子婦晨昏侍孫兒女羅列閫以內靡敢不肅吉蠲嘗祀必誠必敬堂宇服御必嚴必潔賓客姻媿之來往必恭謙餽必腆絲枲菽稻貨布生產之出入制置罔巨細必慎學古翁惇倫卹族獨支門戶事母則輔其所不及以相其成宗黨莫不沐惠而多其義者卽子姓戚屬見母母固藹藹慈煦然未嘗有贅詞失色人亦莫不斂容屏氣非禮道無敢出一語丈夫子五人皆績學砥行奉母之訓以持其身母亦樂其子之能修而安其所以爲養者是始而上承爲賢婦旣而內佐爲令妻今老矣又歸然以義方慈教爲嚴母休稱光茂和氣綢鬱

蓋厚於德則志愉厚於養則體適體適則形裕志愉則神融葆靈茹泰禔福凝禧閨闔之中莫非吉祥善慶之符矣當且衍世澤家法翊其盛而引之長俾古菴先生之貽世世傳焉而篤祐肇昌於毛氏自母始然則母之壽期頤云乎哉予不肖不克供子職卽幸得請告省覲而母段太安人嬰末疾未獲進一卮爲壽方以爲愧獨覩毛母康健能安享其子之養又覩其子能厚其養於母而貽之以安也愈益爲之喜喜則不能已於言也遂次第其語以道喜且以志予愧

張母王夫人七十壽序

予曩昔偕計上春官卽識張君樂山氏於邸第時樂山氏承祖父襲爲金吾百夫長卽幹蠱恢宏祖父業且好賢每折節下士士亦喜樂山氏好賢樂與交以故公卿大夫士與樂山氏交者什五六夫富而好禮自聖門稱難而貴雄且業武與拘拘文墨者多齟齬而又能好之爲更難樂山氏則不難也其志趣殷殷若其安於性

使然者每速予予至輒出饅醑具供張畱連竟日卽不速予予偶過輒又出饅醑具供張亦畱連竟日子每謂樂山氏才及人人頌樂山氏才者百口一詞也客有過予者語予曰樂山氏故才所以成其才者有自焉其母王夫人出家巨裔未字時卽隱隱有淑德聞里閭間及笄歸張爲松菴公配松菴公性樸茂良直有偉丈夫風襲金吾累官都督僉事日勤職幹理公務不暇事家人生殖顧其私悉委之王夫人王夫人主中饋給酒漿外應賓客事事有禮節可松菴公意松菴公待王夫人相敬愛自慶得賢助姻婭戚里亦以松菴公得賢助爲松菴慶云無何舉樂山氏樂山氏稍長大類夫人才夫人喜曰吾苦汝父長者惟勤於公不能顧其私今得汝見汝勃勃然志氣奇也乃督之讀儒者書樂山氏性故敏且勤讀儒者書類儒矣不幸松菴公逝夫人泣謂樂山氏曰汝父不汝待吾且爲未亡人汝不暇儒盍不治家人生殖副吾望哉乃襲今官愈益拓業肯構以成先志業用是饒益闢室東一隅爲華宇

聯棟花榭雲屏奕奕掩映歲時伏臘奉觴觴母夫人暨公卿大夫士之與樂山氏交者夫人每語樂山氏曰世受國家厚恩更世享祖父成業吾與汝須積德冥冥報之不可恃吾業頗饒益可奢越也至於賢賓上客識吾兒者兒所範也當時時修饅醑供張延之可時時沐教誨爲吾兒夾持嗟乎吾願謂樂山氏才乃夫人才助之耶古丸熊斷機之賢夫人不多讓也今夫人七十高設輓於某月某日樂山氏具章服雜陳腆致爲夫人壽而姻婭戚里咸喜夫人壽又咸祝夫人更壽也予與樂山氏交久且善則敬親悅子夫安得無言嘗讀箕範至九五福曰壽富康寧攸好德甚哉福之不易集也而矧以一人備五福此非天之所篤佑而爲人之所以靈承者耶累基者崇數沃者豐其所由來也遠矣夫夫人備五福以厚享於躬而樂山氏則又聚百順以隆致厥養養隆則享益厚享益厚則志益愉繇此引考長年卽期頤未艾也客曰唯唯斯言也可以代祝辭請書之於簡

邑博楊中峰七十壽序

頃予抱疴閒居邑諸生某某請閒而揖予曰吾師中峰楊先生以今年躋七十也乞予一言爲壽予曰唯唯否否夫人生七十恆言稱老士大夫宦游者將引年致其仕謂優老也先生方善職服位子胡以稱先生觴諸生瞿然四顧惕然內歉若弗獲其請也者而又無以伸其款予曰嘻子休矣予明語子古者憲老而不乞言師者人所事也非事人者也所謂以道得民者也責其筋力之強束課其骸骨之武健是所以責猥局卑司奔走役使之末也非所以言事師也古之事師者其飲食也於飯患其噎於齎患其梗而祝之其居處也於坐則有几於行則有杖皆所以事師而輔羸攝疴之具無不備至豈曰年不任位正以其德偕齒崇而優之耳而子之師楊先生者方修廢起墜蒐遺網失以興學成材爲任早作晏休不少惰息非獨耳聰目明智長力給精爽有餘意氣不衰而該涉器數周旋儀等纖煩勞勤莫不殫究勝舉先生矍鑠自喜不知

老之將至諸生以迹壽之而貌逾澤以壽疑先生而非也以意不壽之而齒逾崇以未壽疑先生而非也蓋先生之所養弘也世之君子筮仕入官者其通患往往事匿於職實遁於名而吾以爲學官尤甚夫學官之名師也其職教人者也學之不知道德之不修而冒焉以處之者皆是也又其甚者日途窮暮在得忘戒顧望於脯脩之殷薄恣睢於餼廩之關收悼失前圖鬱鬱不釋烏覩所謂事與實之著聞哉則今之學官不惟司功廢置漠然若無損益於得失之數而居是官者亦自以爲偃休之遽廬恬於進而倦於學其不視爲冗員長品殆而子之師楊先生者世德淵懿發身名家質直坦夷博碩明雅不爲濡利害義不爲離經墮業其道已明其德已立守先王之學以爲人師吾信其無愧矣而蘊藉宏遠通練世務以聞見之該習詞采之敷潤名充其實職修其事成德達材之教其必自吾邑始諸生勉乎哉且予竊誦緇衣之詩鄭桓公武公相繼爲周司徒善於其職周人愛之無已至賦其衣以彰好嘉

靖中臨海有所謂石湖先生者先生之父也往嘗司教撫州南昌不啻鄭恆之於雒東擇而取之也最後教義興士稱得師欣然顧化今宗伯履菴萬公道德名世實其所造士也先生奉石湖公之教教吾邑諸生之喜得先生無異往者義興諸生喜得石湖公也諸生勉乎哉異日者必有名世如萬公以彰先生之善教則先生世德永有休光而桃李公門桑梓在望先生父子亦大有造於吾常哉諸生之祝先生也儻亦適館授粢之遺意而緇衣之義予不佞亦何敢讓焉

太守史禹門六十壽序

予不佞之拙於宦也居朝者什一居里者什九而又狷於鄉見與者什三見嫉者什七然惟蘄鄉人之善者好之亦惟擇大夫之賢者事之而已予所事者史大夫而大夫之不我鄙夷亦不至阿所好也歲時伏臘置酒爲高會蔬食菜羹花谿竹嶼徜徉竟日眞率披心久之交益善今年大夫稱耆矣同社諸君子徵言爲大夫壽

予避席執爵而有獻焉嘗讀易而知易之合天之道也又嘗讀道德經而知老之得易之旨也老之言闔闢重玄總貫太始其指要曰知止曰知足曰嗇曰下曰不敢爲天下先易神知幾見之而作者不俟終日介如石也非知止乎陰主之陽主饒稍饒則以富繫其象非知足乎乾曰潛坤曰含發散之妙基諸翕聚非嗇而早服重積乎天地鬼神之惡盈而六爻終吉惟謙有焉非下乎涉則貴需履則貴坦壯趾躁進則斤斤戒之非不敢爲天下先乎甚哉老氏之言似易也夫子歎曰猶龍而潛見躍飛繫易者於是乎始漢儒至舉老易而並稱焉有以矣大夫以甲第起家筮縣令厯郎署一麾出守年尚壯耳竟乞歸視軒冕若拘紲柴柵此知止之義也家本業素食貧雖居二千石乎而產給饘粥居蔽風雨而已當其官嶺海珠璣香貝珍寶之屬棄不視罄橐而歸此知足之義也衣不侈而綺食不侈而珍言不過辭行不過則其精恆斂而其神弗越也此嗇之義也今之驟貴以明得意者一命則僂車上再命則

齷里中大夫恂恂愉愉居則卻軌杜門燕居深念出則小帷做蓋時從一二蒼頭蹙蹙行道旁遇田峻里子禮必均語必遜此下之義也抱璞握瑜未嘗以賢智先人感而後應迫而後起曰吾從大夫之後而已此不敢爲天下先之義也甚哉大夫之道似老氏也彼世之儒繼老而老氏之徒亦繼儒殆未通於易之說耳通於易之說則老氏之言何遽不爲儒乎夫易之義在交易變易故其文日月爲易日恆月升前元無始後元無終貞明而巳者也老氏得之而長生久視出函谷至今以爲不死羽人方士尊之爲祖謂其超神化炁在太清玉京之境壽罔極矣今大夫得之而韜精葆素挫銳頤和則其壽寧有涯哉且易之爻以六爲數六而重之至三百八十四皆始於六也今大夫六十耳美髯鬢髮健履渥顏無論壽其身而壽國壽民正於大夫乎是賴蓋潛而必見含則斯章易之道也大夫蘊積已深厝注伊始觀風者薦揚於朝交章屢牘弓旌之招旦暮下矣以其精者治身以其緒餘者治天下大夫安

能竟有此邱壑哉諸君子曰子惟事大夫久故知大夫深而大夫雅好子亦必有當於斯言矣遂授簡命書
鴻臚陳見山六十壽序

甚哉天人之際之難言而卒可信也難言者未定之時而卒可信者必然之理人惟偶值於時之未定而未覩其必然者則曰某爲善也而未必福某爲不善也而未必禍則曰天之降祥某也而未嘗爲善天之降殃某也而未嘗爲不善聞之增慨言之發憤且所稱吉凶影響者何如也是故行恣睢德悖戾有其身康强者有子孫其熾昌者顏氏弗年楊生弗嗣天之報施顧若此乃說者則又曰垂教萬世何羨兒齒太玄五千何藉童烏嗟夫何知仁義嚮其利使爲仁義而利也利而蚤施暮報耳目及之向善者猶弗力也若徼其不可必者於千百年之下顧欲人之勸而爲善懲而不敢爲不善胡可得也子嘗覽鏡古今卽所睹記有始終可疑者有始終可信者有始雖疑而終之卒可信者栽培傾覆雜揉參錯至相

見會堂集
倍蓰千萬不齊而要之卒可信者其常也若今見山陳公之所值實其驗云公爲陽羨之故家巨姓饒於產而公則恂恂長厚懦懦恭謹呐呐然如不出諸口居己於謙與人以誠卽臧獲隸卒語之惟恐其傷蓋其心之所宅身之所履口之所道無擇而無不善也者以貴入太學上公車一再爲鴻臚丞旣而請告歸遂謝簪佩居里不貴汰不富驕而其爲善也惟日不足至於交游之顯晦異時則昵疏異跡物情時趨是爲公之里最習者而公則不爲習所移也卽予以言事編戶公之族咸屬葭莩莫不引避而公獨遇之殷懇無改於疇昔暨公之從弟務菴君一省存之而已而它且過而弗睨也儻所稱善人之有恆者非耶顧蚤艱於嗣人爲公憂之辛已歲嘗遭危疾幾殆人又爲公憂之卒之連舉三子岐嶷秀穎稱佳兒將卒業雍庠以世其家矣而公之身旋復康強正擬習靜逃虛返聽收跡遊乎方之外以從事於吐納導引之術今神明日王視履不衰花甲方周卽期頤且未艾也語有之仁者壽賢者有後

此天之報施善人者也公其值之矣然天不欲爲過施之福而公以寡取承之天不欲爲亟應之福而公以緩得迎之此正天之卒可信者也公其徵之矣公之爲善而竟得福也天之降祥於公而公之愈爲善也人之勸於善而懲於不善寧不以公爲左券乎然則公之身承天者也則於人者也公亦自愛其身以貽其子孫俾康強熾昌者侈於人之耳目以爲向善者先哉子兒雍爲公壻又公之甥也將往而觴之間所以爲公祝者於予予則稱天人之際於公乎可信也是不特爲公祝而且將爲世勸也遂授簡於雍以往

南紀褚翁七十壽序

世之飭躬勵行蹈矩趨繩植風教之維收月旦之譽而兢兢尺寸至老且不衰者豈非好修之士自足以表見於時哉乃其心之安與不安而行之終與不終良亦異焉夫淑其身而有所藉於外與冀於後者此其心可覩也不藉於外不冀於後而自能淑其身者

斯德與年進行偕日躋而後其心不渝也南紀褚翁以今年丙戌稱老而翁之子國賢以今年丙戌成進士冢子榮挾莠待舉猶子棟祥輩咸登籍服官慶門福第翁所際謂非宇內之完社人生之盛會哉予也幸卜里之仁辱忘年之誼正謀所以爲翁贈而翁之同社諸公授簡徵詞諸公皆長者代長者之意而贈翁以言烏敢爲佞哉毋以頌而以規爾異日者翁爲諸生高等故韋素也禔身慎履攻苦茹辛直指使者至不以文獎輒以行旌泊歲登授杖賓無虛筵矣然則翁之以好修聞豈以子耶卽翁今日者寧僅以子貴毋寧僅以子聞夫父子一體休戚一情不有見其子之貴而色喜者乎又不有恃其子之貴而心汰者乎夫貴以其身者身當事而心有所顧則好修而自完也恆易貴以其子者身不當事而力有所憑則好修而兩相完也恆難何以故矜其志之已得而不知榮境之易移也樂其勢之可施而不知畏途之難涉也世之以子貴者寧詎翁耶蓋有資藉氣力而齷齪里閭平決闐紛自爲雄長

俾眾仗任甘爲逋逃溝壑者亦有倏貴驟富厚享廣收僕馬雲從貨布隴斷一命呂鉅再命車上儻而不覺其貴倨譎張者又有矢智竭策牟鉅程羨與市井駟儉計舉廢操奇贏而放利無厭俛首居閒者嗟嗟彼獨不念曩昔困窮斤斤受孔孟書且諄諄誨其子以望一旦成立及成立亦甚艱矣而忍弁髦之謂何翁之好修昔不以子聞而今且以子貴矣禮能加沖耶心能加損耶騶從能不加益耶客舍能不加幸耶門能不加闢畝能不加衍耶有一於此非翁也予則信其必不然也翁生而才諳戰於章縫繩墨之場可以得志而不樂爲也文史諷詠甘退以自娛而已其心計智算較長絮短可以逐息而不屑爲也衣食居處量殺以自給而已其信誼情款持公宰平可以批眾而不敢爲也怡色柔聲諭人不爭以自安而已故其居世常樂而無可憂畏之機與人常親而無可忿怨之境舍和處順凝禧全昌其壽愈進其德愈光此無他良以好之修出於心之安也足於內而無所藉於外勉於前而無所冀於

後本自天成靡緣人飾翁卽以子貴矣而謂以其子聞乎既不
子聞矣而謂不益成其子之賢乎衛武公年九十猶箴於國曰無
謂予耄而忘交傲也翁今七十耳進而若八十若九十翁之子將
日益顯則翁之以子貴將日益重翁之聞將日益起則翁之子奉
翁之教將日益賢此所謂父子交相成也予不佞敢附矇史交傲
之末更爲抑之詩以待矣同社諸公聞之曰旨哉斯言有當於翁
之心也遂致於翁之堂翁曰渥哉斯言之惠我也卽八十卽九十
子其無忘箴我哉

鳳亭曹翁七十壽序

先大夫治博士家言時下帷談經有曹翁者業圃於城東隅爲居
停主而翁之子子敬從游焉稱高第弟子有聲諸生閒旣屢上京
兆府屢不售乃退而教授稍稍治家人生產以自給闢地疏泉編
茨結茅種竹數百竿顏其亭曰鳳晏游兀坐泊如也人遂稱子敬
爲鳳亭先生先生易直爽愷不設町畛而斤斤忠信扶義不侵爲

然諾人有緩急趨之得一語爲質聞善事則喜著眉宇道之朝夕
不忍置規人過失和顏色而諷諭之微言竅中人靡不悅且繹者
里閭構怨結焚造先生居閒是非曲直各厭其意以去必曰曹家
翁云然曹家翁云然無庸詣吏對又靡不忻忻然服且解也予言
事被罪削籍歸田先生顧色喜而心與之殆所謂聞善事道之朝
夕者乎而予姪女又爲先生之孫婦舊誼新稠殷殷厚也故引爲
忘年交借二三知己訂期著約爲社中飲而予則撰杖屨以從雞
黍琴尊相徵逐甚懽先生春秋七十高色澤神王語笑諧謔竟日
不倦不善酒然在酒所未嘗不丙夜者同社於初度之辰獻一卮
爲先生壽而授簡徵詞於予謂予齒最後宜服勞於諸長者乃避
席揚袂謁諸長者而進曰予讀史竊有慕於陳太邱王彥方之爲
人也德惇行孚儀式於鄉邦庶幾乎尸祝家頌之而仲長公理之
書所稱場圃築前果園樹後溝池環巾竹木周布弋高鴻釣游鯉
安神閨闈呼吸精和此凌霄漢出宇宙之至貴也夫士豈其以公

卿顯哉被服詩書迪履仁義而資不逢世樹惇徽信稱躬行長者而優游恬愉義足以自樂而無所羨於外詎非人所希覲為天之所獨與者耶天多與人以紛華侈盈而令聞雅好之享恆靳焉紆朱曳紫垂涎濡首於權塗要津逮耄昏未返皇皇焉畏讒避譏觸法抵禁是懼而多積厚藏持籌握算朝夕且弗暇卽壽考亦桎梏耳而懸衣穿履帶索拾穗衣食於奔走又有鮐背兒齒而茹辛楚者今先生道積於躬德誼孚於鄉視太邱彥方奚讓焉顧弗得與於風興雲蒸漸羽咸登之會乃偃息邱樊無聲利寵辱之境無生殖程息竭蹶蚤夜之勞而陂池竹石所以愉志怡神者超乎塵壚而沖然無所辛楚又何異於仲長公理之所稱者斯不亦超世之洞觀上善之貞符也夫壽者受也受諸天而實有諸己之謂也彼桎梏其形而壽竭蹶其心而壽雖壽猶弗壽也鳳亭先生之爲壽可以窮可以達可以約可以久可以葆真可以樂生可以全年是故可以詠歌可以觴可以文諸長者誠不以上尊嘉豆爲饗而致

斯詞於祝餉惇史之後先生庶爲之加七著哉諸長者皆曰子之言足以當先生先生之壽正未涯也俾書之於簡爲初度獻更爲他日徵也

毛百忍六十壽序

周司徒以鄉三物教萬民而賓興之首六行曰孝友睦婣任卹漢去周未遠猶有孝弟力田賢良方正之科蓋以德誼取士士之抱璞懷珍迪履飭躬者卽文詞未必中程黍不得與敷華摛藻者爭尺寸而鄉舉里選則修耒耜之業負月旦之稱亦得以行能自表見夫選舉之法先於鄉鄉人好惡在春秋時且云未可據矣至以鄉人之善不善察其善者好不善者惡而信其賢也安得至公至明如大聖也者而辨之若夫迴勝母之車擇處仁之里俗有淳漓習因之媿惡則其所好而譽者所惡而毀者殊焉然則賓興選舉果所取者皆賢耶果賢者必不遺於所取耶而免置駒谷蓋自昔詠之矣鄉先達先生古菴黃門者以忠立朝以道義檢身以禮樂

矩獲教於家子孫守之至今存焉咸篤行好修彬彬世其業而百
忍君最長又最賢讀先人遺書蚤歲爲博士諸生嘗二三上京兆
試弗售會母病痿痺在牀褥者十數年君乃手劑藥餌量糜肉候
顏色以進晝夜不解衣帶侍榻前而徭役應酬門戶生產所以急
公家承先業者幹蠱任勞又以一身當闕外家大人及諸伯叔兄
弟盡多之而母之病亦用是起卒之享高年令終之祉母子相依
凡所以承懽聚順者時時爲孺子慕君以閒入城市越信宿則母
之寢食弗甘也庭幃之閒雍雍秩秩睦族信友振困扶窮好行其
德不侵爲然諾日出而手儒者編伊吾舉子業日昃而課耕織任
臧獲服田力穡至炊浣米泉鹽醯瓦木必當其所擘畫先人之學
脈世業不至於遏佚者君之力也此與周所教六行漢所設孝弟
力田賢良方正科奚有一之弗備且至乎予自弱齡受室與君爲
肺腑親者幾三十載矣交愈深信愈篤愛敬愈不衰而君之鄉則
工於攬秘讎隲構怨修郤所以齟齬君者嘗出於意想情理之外

今且老而人始孚家邦漸達則又莫不交口傾意於君曰毛君誠
長者嗟嗟生斯世居斯鄉卽上之人修周漢之典鄉舉里選士也
若毛君者能殉一鄉之好惡而達之朝乎否耶將爲免冑駟谷之
遺而其所自修自信者惟仰不愧天俯不怍人上不辱先世下不
貽所不安者於後人而已矣彼飾名斲聲登華躡膺者眎君奚足
多焉毛君學而可爲才於國而屢試屢弗售行而久爲德於鄉而
鄉人亡加譽意者有藏慶歟而天且祚君晚年福君後裔者有篤
祐歟乙酉歲某月某日爲君甲子初周之度余適以予告得休沐
於里諸族戚謀所以爲君祝者授簡徵詞君則以母喪甫除疚思
未平拒不納而當其期君之堂產瑞芝於棟斯奇祥明貺哉傳云
德至於草木則芝生又云服食芝可以延年壽與天地無極夫毛
君之德賁草木矣況於人乎夫毛君之壽通神明矣況於人之祝
乎予不佞無窺於道而習於君者也嘗聞之養生家言無勞爾形
達生家言逸我以老君老矣可以逸矣禮六十而曰耆指使蓋用

智不用力也自今以躋期頤皆逍遙游之日矣予何以爲祝哉惟祝君謝疇昔之勞契恬愉之旨收眎返聽毋滑精搖神而歲歲加七著焉

杭母楊孺人六十壽序

荆溪北里據震澤之上游百瀆眾水川分流匯而趨焉毓秀鍾靈弘正閒有杭氏二先生爲名世聞人仕至方伯總憲云予起家去二先生之里最近而去二先生之時則稍遠也慕二先生不可見而及見方伯孫蓼湖君者敦厚誠慤猶有二先生之遺風焉而予之妻與楊君子性之妻兄弟也楊杭爲世姻婚皆稱閨家矣歲乙酉予從供奉請休沐還里楊君造語予曰杭君蓼湖之室娶於吾族而吾兒則委禽於杭之弱息也杭君捐館舍而孺人之賢有足稱述者今春秋周花甲矣吾之妻不勝子女媿睦之思將修脯棗之禮進一觴焉度孺人當且謝不忍老婦惻然未亡人何敢觴則無以申吾綰繾而寬孺人之顏色擬藉手賢大夫之一言以祈

無疆垂不朽也且孺人內行淳備懿節朗融卽更僕猝未及數其所生所歸當二姓殷盛時而孺人則首不重飾衣不曳地絕不爲侈汰狀布疏纖膏泊如也事姑以孝聞相夫子以恪慎聞而拮据綜理於閫以內以勤敏聞姻戚賓祭歲時伏臘罔不虔不敬馭臧獲嚴而恤逮米鹽絲枲經畫諸出入瑣冗罔不靜而理也歲必遺奠於父母之藏蓋終身不忘哀慕焉自艱於舉子亟求良家子宜子者以薦寢甫生女遂躬撫育之逾於己出卽女亦不自知其非孺人出者蓼湖君永訣時謂孺人曰我不絕如綫之緒獨此弱息爲遺體耳異日者宜擇其所歸慎毋結納於勢家宦室爲也孺人受命惟謹乃於通顯者屢議屢卻以吾業中落食貧甘寂之子而訂一語之盟以修先世舊好允哉體逝者之心亦不忘源源本本之念乎至其守先業立後嗣斤斤禮法黽勉門戶身先勞苦率作耒耜惟遏佚前人光是懼盜詎止蓼湖君雖亡猶存哉雖二先生在天之靈必謂孺人庶幾乎可稱吾家婦矣此其凡耳夫宣嫩闡

懿記實傳信太史氏之職也子橐筆佩囊於承明著作之廷久矧里黨中節淑若孺人者必不遺於采掇而吾夫婦微惠於子之詞固知子之不終拒也不佞避席操觚而言曰婦行不出壺闔王化則始閨幃甚哉婦道母儀之繫於世風也孺人事姑有承懼之養焉相夫有交儆之誼焉置媵有小星之度焉居孀有柏舟之節焉操作以佐家有桓少君之風焉楊君所稱述者詳哉其言之矣而不佞之賢孺人則獨於其育女字女以爲有丈夫志而繫於世風不淺鮮也輓近世形骸爾我伎害相軋一膜之外便成胡越諸生甫博一第或家塵塵贏千金則娶婦者爭奔走焉以金帛爲羔雉而嫁女者亦惟貨惟官蓋賈豎其子女儆也極矣此非戴鬚眉被服詩書稱丈夫者乎乃孺人之育其女也生不由胞愛同離裏豈形骸所能隔者至於議婚納采不徇通顯不遺故舊而見利慕勢人人溺於習而卒不爲移惑豈其素所習二先生之流芬遺韻而然乎彼稱丈夫者可以愧矣然則孺人之壽獨楊君私感而往祝

之哉固不佞所深嘉而願爲之役者也故不敢以不斐辭若曰賢大夫之言將藉手以申綵繡而寬孺人之顏色則不佞不敢當鄒母謝孺人六十壽序

夫邇善慶之源者必曰名裔崇盛美之基者必曰淑媛其所繫於世風家教也大矣詩云齊侯之女衛侯之妻語云賢者之後數世其昌明其所自出又要其所必致也成風庇其宗國叔姬能守魯禮季氏有婦孔子所稱孰非先正之漸陶內則之媿懿也哉茲言也予於鄒母謝孺人有感焉孺人生於謝歸於鄒鄒爲宋忠公之裔而謝則元龜巢先生出而表章之以垂於今者也兩家甲毘陵諸巨族氏有聞人迄明興登制科躋膺仕者踵起趾相接也至安仁尹滄雲鄒君尤克世其家範劘清白質行淳慤爲紹聞祇適之孫子而孺人之佐之也攻辛茹淡拮据於烹菹盛湘纂組佩瑀之事事王舅憲副公姑惓恭人婉慧委順悉意於滄髓旨甘之具蒙泉公往丞合浦則謂孺人曰惟是筐筥錡釜誰其尸之將豕婦乎

孺人代攝中饋者若而年家故食貧又歲侵業稍落操作春浣蚤夜興寢身先後其臧獲憲副公性嚴鮮所當乃孺人則如其指意至於裝產奩具以之讓彊族資嫠姑無幾微違言恹色滄雲君專志於學不問家人生產舉於鄉一再試於理務澡浴其身膏澤其民垂橐還里泊如也蓋出而爲良吏處而爲善士允哉無忤於前聞人謂有藉於孺人協相之力也非耶豈先正之高風矯節啟佑乎其後者歷世彌昌不獨嗣續賢也雖斧黛者流亦完善令儀弗至遏佚其光耶當忠公以直忤遠竄不獲保旦暮奚計夫奉蒸嘗於千百世而衍祚錫胤於來茲也哉夫深山大川蛟龍出焉源深而濬發者長也基厚而崇載者遠也此善慶盛美之所由鍾矣丈夫子二人大臨大晉席珍韞玉抱遺經以待舉孺人則以義方並訓勸之異日者聯翩振擢於以圖不朽報孺人之罔極而衍忠公之緒於無疆可持左券而徵也俾邦之士庶望而曰此前聞人之所貽也天之佑之人之仰而式焉者也卽叔姬季婦其何以加焉

然則孺人之爲鄒氏重寧詎鮮哉龜巢先生所深願於鄒而託之於孺人者又寧詎有涯哉孺人者於鄒爲賢婦於謝則爲令女蓋名裔淑媛固世風家教之所繫也今年春秋六十高三月十八日爲初度之辰婿毛子中淳請予問所以爲壽者曰子之歸辭鉛槧之役久矣繫鄒母暨其二子則惟恐不得子之言也矧子伏闕被罪時有貽忠公集爲兆者寤寐古今殆非偶矣繫子之言則亦惟恐不登於鄒之堂也子其無以辭它所者辭焉故爲之論著以介祝頌之觴并抒仰止之衷云孺人聞斯語將忻然進匕箸而二子亦必不以予之言爲辱而弁髦之也

賜餘堂集卷八

賜餘堂集卷九

集序

帝鑑圖說序

代

今上屬統御曆以來懋學親賢勵精圖理而少師張公爲元輔特
隆眷毗焉平臺首召講幄日臨凡公所奏對悉從容聽受蓋祖宗
朝盛事數十年所曠見者豈非明良之會千載一時之覲哉公益
感激知遇左右效啟沃弗遑也旣乃檢史傳所紀載事撫其善可
法惡可戒者繪圖系說以進上嘉納焉每於講讀暇則出二三冊
問公公則條列詳委必旁引曲喻以明之卽就事獻規讜言盡辭
莫不犁然有當於上衷者某叨侍從之後幸睹懿美竊窺見公矢
念忠勤而用意則微婉也上神聖有爲堯舜資然所以研幾定志
辨於蚤而迪之以正者實師保輔相職也矧冲年初服正虛受銳
進時乎此養之於豫之道也上誦習惟勤無怠朝廢夕乃燕閒必
有爲游息之助者攜冊隨御出入備省覽丹青之象易觸目前而

累代歷辟致治釀亂之蹟若示諸掌上因資玩適遂決從違蓋止邪未萌而修德於罔覺矣此成之於默之機也卽是冊所輯自帝王以降稱英君誼主者鮮完德也已漢成可戒者三雖葺檻旌直何裨於亂唐玄可法者六而其究也侈用濫倖弗克終焉覽鏡古昔其事效殆不旋踵易轍者且千萬世之下如此乎媿惡得失之不相掩也君人者安得不慎修思永以底於純而圖厥終耶此又責之以難之義也易有之樽盞用缶納約自牖明臣道也必誠信聯其交而後委曲以引於道也今上以公忠倚公公之誠信孚矣而矢訐謨翊明聖遂得以委曲於其下猗歟盛哉

帝鑑圖說後序

代

少師大學士張公旣以所輯帝鑑圖說進御覽因奉上旨宣付史館於是梓其副以傳某以職序謹綴言末簡曰夫鑑者鑑人之形也形有妍媸美惡孰能自見之哉必懸鑑考形不爽毫髮矣自昔君人者將整齊寰寓表垂懿鑠匪特其神明茂也要必鑑於古焉

古之蹟淑慝並著理亂斯彰勸懲旣明從違遂決此君人者之鑑也書典謨所稱若稽古堯舜說者謂堯舜不自聖每事必慎考乎古云今皇上冲聖勵精嚮學孜孜不少閒而公爲元輔尤深倚注焉初踐阼卽御平臺召公面諭眷毗及手翰褒嘉仰惟德意之所向蓋銳然欲法古親賢保泰致理也公夙夜思所以對揚休命報稱隆遇者偕少保呂公簡侍從之屬定朝講之規崇論竝議揆皇王之略以效啟沃無怠朝廢夕旣復檢史傳所紀載卽淑慝理亂不同事而凡可爲勸懲從違之鑑者繪圖系說以進上斂容起敬垂聽納焉公因條對大指指及善卽慨然忻慕復指及不善則感然若有不當於衷者睿哲夙成神機朗發視簡冊奚啻羹牆也將繇是覽鏡古昔旣習見聞念慮皆純時幾必敕堯舜在上而公明諸謨彌於其下不與有榮施也哉雖然某竊窺見公之矢念忠而用意微也蓋冲年初服正虛受銳進時也研幾辨蚤與治圖終是必有潛移豫養之道焉宋王曾爲相繪錄古聖賢事跡進於仁宗

嗣位之始乃慶曆嘉祐之治稱隆盛焉亦或其定志純心於始者致之也今上神智卽唐虞不足讓何論宋第論古今輔相所以用其忠愛於君者類如此

軫塘張氏族譜序

蓋聞之古者修身範族不出家而成教於國也故其厝注有原施行不倍親疏遠邇舉斯心以加之已爾世之降也智足以集事力足以周物先其疏者遠者聲光勳烈豈其無之而攷之宗親子姓有恩禮不相及者國有康濟之猷家鮮惇敘之化此道德風俗之寢以微也尚論者不能無遺憾焉軫塘張姓於萬安爲著而見菴公於族爲最賢公成進士宰宜城旣推擇爲諫臺無何會大計有所彈射徒之外直聲偉義炳鑠寰區稍遷毘陵司理則廉平之譽不啻神明不佞休沐蒿萊僅一再望見而玄鑒內朗清輝外瑩矚乎穆如彬彬焉文質也閒以其所輯譜示不佞曰茲譜也先世遜則公所勅世代相禪族指漸繁其統系名字儷肩生卒之詳所宜

續者則家大人嘗心計之而手錄之以授予予甫通籍遂勉以成編今履先生之境幸而微一言以引諸端可乎不佞不敢辭夫譜者崇本萃渙修睦樹敦仁人孝子思深哉而禮樂之用所由興也公筮仕巖邑布德施政稱循吏及冠豸持斧則觸邪祛佞稱直臣本乎孝以移之而事君則忠本乎慈以推之而使眾則愛其厝注施行有原而不倍如此殆居今而猶行古之道者耶所繇與飾行矯名於聲光勳烈之表者異矣不佞按公之譜而知其所以修於家者又觀公之家而知其所以教於國者逮疏由親及遠自邇藉令人人而公乎家無殊俗國不異政舉而措之四海垂之千百祀可也不佞故爲之論著焉以告世之有家國之素者至其譜之昭祖明宗書賢志貴推本由始綴屬方來與夫紹明詩書之業爲張氏子孫勛者語具蕭史氏序中

龍池梁氏家規序

粵聞菴梁公起家通籍修業積庸以顯於世始教閩型範克端稱

明師嗣宰陽朔循良夙著稱神君今佐毘陵郡治理流聞聲實騰
茂則益稱賢能異等自茲往皆運斤遊刃地也民譽國禎公其人
矣此豈馳騫材諳殫竭智能淬勵於簿書期會者所可及哉頃之
公出其家規示予予受而讀之乃知公克施有政之原也夫得民
而治之而民治以治民之職奉上而上獲然必先之以悅親信友
又推而本之以誠身蓋身之能誠喜怒哀樂之中節親愛賤惡畏
敬哀矜傲惰之無所辟而親親長長老老幼幼不出家而成教於
國也世降俗衰經殘教弛即乘軒縮綬而仕者矯飾治術闢略躬
行動烈聲光雖表著於時而攷之家或亦庭闈德色父子市道者
嗟乎此聖學不明而王道之寢以微也公以其體誠於身者而設
規於家自灑掃應對起居出納之微至忠孝名節之大所以修睦
興讓萃渙崇本垂式於無疆者曲防周慮燦然備矣是故推其率
祖將父者以事君而孝可移忠也推其翼子貽孫者以蒞民而慈
可使眾也刑于寡妻至于兄弟以御于家邦舉斯心以加之矣語

云家難而天下易公既先其難者而於其易者特易易爾則其歷
試咸宜隨施輒效蓋自有神存機應者不徒在訃謨厝注閒也是
規也靈詎爲梁氏重乎聖學之驗也王道之端也將與顏氏之訓
司馬氏之範布之四海傳之百祀不無裨於一道德同風俗之指
矣

陰符道德經解序

陰符寶字三百道德靈文五千黃老之奧窅乎深矣窮神闡化葆
光契真立言殊塗覺世同軌均之性命之旨也洪陽先生心會重
玄道苞大始宣暢微渺指示宗源盡性立命之教蓋以儒通之黃
老哉兒子輩既鑄莊略矣二經并刻三解並行羣矇可開萬古無
夜讀是經者絕巔崖之墮徹多岐之迷得在目之機悟塞兌之義
聿通理境因舍言筌庶幾乎先生解是經之意云

南華經標略序

讀莊子者如飲巨壑如入大庖各隨其量之所受意之所適而取

足馬一勺充腹一鬻膏脣不必其源之窮味之盡也注釋評解自
郭子玄而下亡慮數十人驥家璧不必其蛙之傳蠅之襲也予不
敏童而習之長而無所得閒隨涉歷嘗標識一二語於冊醯雞管
豹爾洪陽先生稟淳葆真探玄詣粹偶觸微幾時發緒論借彼辭
指抒我性靈蓋莊子一南華而先生胸臆亦自一南華誦茲編者
因先生而通莊子之義固可因莊子而會先生之心亦可萬仞長
風千載曠覽神而明之存乎人焉門人憚貢士攜之歸兒子輩受
而卒業僉謂宜公之人也遂付諸梓而予爲之引其端予與先生
執經講幄佐教辟雍從先生久知先生不可謂不深雖然自細視
大者不盡亦取足於先生之一勺一鬻而已矣

孝思錄序

孝思錄者吾師龍洲翁錄其先考妣誥敕之章與夫志狀弔祭之
文也錄之者昭寵闡幽將以識終身之慕而遺諸其後也旣成帙
鈔梓乃示其門人中行命爲序序曰夫人子之情至榮者莫榮於

君之追隆所生至哀者莫哀於親之弗逮厥養然徒哀無庸當圖
所以慰其哀者是必冀夫榮矣榮匪倖致也行孝於身移孝於國
而顯揚靈寵榮斯至焉是哀也始夫孝者也榮也成夫孝者也孝
何言乎思哉惟思不窮斯孝不匱矣初吾師之幼失怙也奉母張
太宜人教蓄德砥行種學績文與伯氏州大夫黽勉樹植蓋其
哀深故其志定也及夫舉進士則辭要津乞儒官昕夕與母俱豈
不以逮養之難卽一日不以三公易耶蓋又不汲汲於躡通顯以
微榮者母之終雖已享愉引考而吾師之哀固弗替也哀則思思
則圖所以慰其哀者故歷試諸艱咸底厥績凡政刑文學錢穀甲
兵之司隨所居著聲奏功今且躋膺陟華肩鉅建崇爲社稷生靈
所倚毗其矢忠之猷孰非其移孝之念也勞勤丕嘉恩綸薦被顯
揚靈寵有來斯皇其榮也可謂至矣榮以成夫孝而吾師之哀或
庶幾其少慰乎若夫茲錄也則有勸之道存焉國家褒崇之典顯
其身又追隆其所自出體其私而作之忠者如此乃不思所以感

激報塞者非情也是故可以勸爲人臣者矣夫孝者繼志爲上養體次之養有逮不逮天之不可必也而成身以成親非人之所自勉者乎誠思所以答罔極垂無疆舍此無繇也是故可以勸爲人子者矣注盈挹損造物者默有權衡故積厚流光不於其躬則於其子若孫此植槐之德貽穀之仁食報如持券然是故可以勸爲人父母者矣衍而布之人式於訓繹而永之世載其懿此之謂維則之思此之謂錫類之義故曰有勸之道存焉矧爲王氏後者尚益嗣其休而引之長哉

孝思錄後序

代作

嘗聞之言孝者云事君不忠非孝也蒞官不敬非孝也朋友不信非孝也夫孝亦難言矣是錄也三者具焉蓋人子殫愛極敬飭躬致養凡可以顯榮其親者何弗願哉顧分不可得斯情莫敢踰矣龍洲王師自筮仕迄於今數厯諸曹聲績特茂允哉稱文武爲憲社稷是毗之臣也臣能奉親之教以作忠君則體臣之私以廣孝

因心修制予秩伸情顯榮至矣則臣之懷報圖終陳力荷重者藉茲寵靈以往當愈益崇鉅夫安敢奸訓辭以忝德意惟兢兢焉夕勵日做之求無負於其後也乃至朋友之交以敦信未有不順乎親而能信乎朋友者是故紀之世系俾思嗣也闡之先德俾克揚也侈之君恩俾圖慎也悼其親之弗逮俾永慕也助義錫愛之道彰矣然則是錄所載忠於君敬於官信於朋友之徵也竄獨顯榮其親已乎某門下士又里中人也竊窺見吾師不匱之孝謂將與其忠敬信者俱貽無疆之聞矣敢綴一言於末簡若夫名錄之義與彙帙鈇梓之意則具在侍御郝公太史吳公二序云

偕壽贈言序

是編也華篇藻牘侈盛祝遐蔚乎其嫺然於詞也非都上卿之位而貴者則操如椽之管而文者不佞不能文又不善宦罔幸再生直宜三黜爲時所鄙嗤卽言焉當唾之乃晉所王公者襍蘘菰蘆中造不佞而請也顧以不佞言弁是編之首乎豈其倫乎雖然貴

人之詞誇以爲不若賤也文人之詞飾以爲不若野也既貴矣復徵諸賤既文矣復謀諸野公之意其在不佞乎夫箕疇之衍福也五而公今之備福也四矣攸好德者實靈承昭受之原本匪德則不可以言福公故名家子嘗供奉金門玉堂之屬是時柄國者公之先世交也炙手可援捷足其逐不難濡忍更易因緣而去之若不屑者遺榮敝屣輕世浮雲頤和葆真逍遙容與於鳩筇鶴斿之間且逾廿載聿躋七袞意甚適而神王也所稱好德者惟公故所稱能備福者惟公世固有歷崇品策要津榮名壽考人人所豔羨而忻忻焉願之顧其功名爵祿之計日鑠元精毀譽得喪之門時捐靈府無論僂偃暮途支離朝露朱輪未返華屋不歸卽名實旣孚眎息猶壯寵堅丹宸望副蒼生亦蓄之樊中游於方內神雖王而意則不適也公也意適則恬神王則愉恬愉相滋其所以凝禧綏祉者固未有涯量是編所論著者貴而匪誇文而匪飾卽不佞之賤之野益足徵足信也公之世父宗工弇州先生者辭雄白雪

志慕青霞名遂功成身且退矣蓋深於天之道也試以不佞言質之庶幾哉無唾之乎

太學講章序

往者洪陽先生與今穎陽相公並以日直講幄臣司成南雍一時四方章縫之士及門者慶得師也故事課講之業隸之少司成而洪陽先生以其素所咀英挾醇者發孔孟之旨講解若干篇穎陽公擊節稱之而諸生則書紳以服之云今先生司成北雍予不佞則分席而教以佐下風又安能外先生之言而別爲訓哉至講期則令六館之師設臬比而誦說之爾蓋其言未嘗離訓詁而闡微析精亦未嘗不談性命而近裏責實欲人人誠修慎履於庸言庸行之閒以斬爲聖賢之徒而已然其篤論善誘發人所自知之隱症而後投良劑挽世所易趨之邪岐而直示坦途中我心痲令人類泚試以今所共聞質諸中之所獨覺深惟內省有不赧然愧懣然知所懼者幾希希夫道在邇也事在易也親親長長天下平矣此

其化民成俗開物成務之教乎學者孰是編而求之有餘師矣彼心源頓悟言詮可忘自謂其高出人羣動合天則而以玄宗渺論惑人侮世是舍筏而渡不黍而炊恐非所以爲訓也因重爲校梓屬掌故者藏之雍署中

四書蒙引便覽序

先大夫嘗下帷傳經於四書訓詁家獨取裁於蒙引蒙引爲先正蔡虛齋未刪次之藁闡幽采博其精詣超覽者固自在而璞璧沙金殊煩匠氏手也時時披閱則時時以朱墨乙之及釋屨登朝未卒業爲憾迨予舞象時受書於莊楚園先生先生卽東於博士法乎而講藝窮理則田百氏之藪而漁獵之根據淵源期於融貫恥剽掠爲口耳資也者先大夫閒嘗語之折衷蔡氏書以翼朱子傳注而發孔孟之微旨奧義其在先生乎先生唯唯旣十有餘年書始成用心最勤良工獨苦宄者削斷者續漏者補誤者釐類者從互異者比而合源尋派列髮櫛絲聯有貫串繫絡之功無增益僭

踰之罪譬之披草萊而闢之理蕪穢除谿徑而直達之堂奧矣九京可作兩賢相因夫然後虛齋之志庶乎有所託哉而予則追慟夫先大夫之弗獲覩厥成也漢儒以經術轉相授受諸弟子各守其師說爲家法至顯於世而對其君之言曰臣師某也予不肖爲先生之弟子今且供奉詞垣竊師說執經侍上講幄而又推衍所傳習者造士成均夫孰匪先生之教哉先生之教用之朝廷而先生之身猶衿章也是予之罪乎故於其書之行也予之言又何可辭

四書原旨序

聖賢之言言其所行而人之讀聖賢之言者亦惟求行其所言而已矣是故能行者不必能言而言之多者行之愈益悖也自疏注詁釋之學興而家各置喙人自爲說蛇足蚶翼去聖賢之旨也漸遠宋諸儒起而表章之理道旣彰而枝葉則滋繁矣善乎鄭夾漈之言曰燔書書存窮經經絕良有嘅也逮我明學校設官科目取

士曲儒末技復取所謂枝葉者衍而爲儷偶蕪蔓之章篇離句析
強爲之支分節附轉相勦襲以爲青紫媒視聖賢之言奚啻糟粕
而高談性命別立塗軌者則又炫異采奇語本顯也而以隱闡之
意本近也而以奧窺之以爲不如是不足以洞朗竅冥悟淵微
也嗟夫聖賢之言言其行也亦惟求之行焉而心會體踐之卽千
百載之下且旦暮遇矣藉令行之不敢悖也言之得無可已乎徐
伯子士彰求以行夫聖賢之言者也懷琛握瑜卒澤於道義而其
學則旣田百氏之藪而漁獵之矣下帷授書子弟從之游甚眾而
一時文學儕輩莫不資其多聞博物之益積厯涵泳者久而應子
弟之質問暨儕輩之所商訂不得已而有言焉然其言皆引其所
自得於心者著之冊以故隻詞片語悉由衷生微緒妙筌足稱神
解其由注釋與諸儒家之說而根柢之者什之二三其注釋與諸
儒家之說所未及而旁悟超覽者什之六七采懿砭疵若刃迎冰
釋犁然當心而解頤也學者因繕寫之煩遂鏤諸梓以傳乃伯子

則語予曰是所謂探一珠於龍渤割寸土於荆山庸詎窺玄溟巨
島之精華哉矧行之弗逮吾恥焉又奚事於言而駢拇贅疣爲也
子爲吾明其不得已而言之意予故敘次斯語於端而因名其言
曰原旨

答問錄序

君子之爲教五有答問者先儒云因人之高下而差等之若孔孟
於樊遲萬章也予竊謂不然夫時雨之化成德達材之功何嘗廢
答問乎卽如愚不違者問爲仁而答問爲邦而答蓋答問之中自
有差等固不可雜施強聒者默而成之神而明之則存乎人耳若
謂不足達不足成不足化而姑就其問以答之云爾斯爲教之下
也或非立教之指矣祝大夫介卿蚤歲志於學入而有叔龍先生
爲之父出而有諸先哲爲之師友憤則啟悱則發其所得於過庭
負笈之閒者取之左右逢其源也今也知命而幾於化矣以其問
於人者待人之問矣因梓斯錄爲同志者助也予不學不聞道居

恆黽勉第以道在日用學務躬行而家喙戶頰道聽塗說甚無庸於講之名也苟因問而答因答而明諸心必求所以驗諸身焉則斯錄也爲踐履之入門可也如口耳而已矣質疑辨難徒資見聞則斯錄也爲筌蹄之麤迹可也此大夫勛同志之意也不然孔子無言孟氏不屑又奚取於答問爲哉

張翰林窗稿序

韓昌黎有云根之茂者其實遂膏之沃者其光燿仁義之人其言藹如也蓋言者心之聲也而文者又言之精也因言可以知人而謂文不足以觀人也豈其然哉歲辛未予與安成張見洛同年舉進士自釋褐南宮旋復儲材東觀乃獲朝夕從焉每相與切劘道義商摧藝文益爲意氣交也見其敦大冲夷無復城府慷慨果毅不屑脂韋而於是非邪正從違可否際尤且析錙銖守尺寸弗爽弗渝也殆庶幾乎仁義之人歟故其發於文也皆本之於由衷真積之餘得之於神解默識之後未嘗組辭琢句標異爭奇而披掇

華秀足稱鉅工抒寫性靈允當大雅每一篇試讀之數過機觸天動才運風馳若決江派而東流若建瓴水而倒注一瀉百折千萬里莫能禦也自非宏中肆外多藏厚施而欲雕模餽訂於筆楮間是烏可以丰容色澤爲哉茲文也固已試之利器其賞之希珍也亦奚俟乎予之言雖然予稔其人而後驗其文既知其文之似人也則夫讀其文而因想見其人者尚究其人之所以能文也哉噫趨迷襲瞽逐末沿流文之敝於時也久矣予懼夫食其實晞其光而遂遺其根與膏之茂且沃也於是乎書

四進士文稿序

語云文章與世高下蓋言時運所移有不可得而知者又云仁義之人其言藹如也蓋言原本所繇有不可強而能者信然哉予弱冠舉於鄉先大夫不令赴公車而爲之擇所從游者徐君士彰所旦暮几席在師友之間予以辛未舉於南宮而徐君久不售竊愧之若何君某錢君某龔君某又皆文學中茂才異等卽徐君行輩

稍前亦所折節推轂者也皇帝執符御籙既十有一年爲癸未霈然發明詔驅城社所馮之孽盡搜巖穴所屏棄之士一切操急繩引諸所不便法悉罷去而與海內更始蓋泰亨之期也四君者爲是科所舉士豈非機會所邁應運乘時而起世隆文亦與之俱隆者耶予所習徐君者冲夷淵懿庶幾稱篤行君子及與何錢二君周旋邸里靡不宅心醇粹措履雅馴斐然一出於正而龔君曾爲五賢歌於震撼鉗結之時其趨向槩可識已今其文之足傳者具在所謂根之茂者其實遂膏之沃者其光燿彬彬乎仁義之言哉予深推其原本所繇而尤快睹夫時運之昌明所進者爲善儔良士也四君者今服官矣無論中外崇卑協衷同德必不至自相伎構挽傾忌乖刺之風以重吾邑而無負公家也予所拭目傾意觀厥成焉

刻龔文學遺稿引語

冀之羣有良驥焉伯樂氏過於途顧之歎曰矯哉茲一日可千里

也市之歸而絕塵而行空請從此始矣逾時馬病死人讓之則又歎曰嗟乎夫馬顧其能千里與不能千里耳卽馬之良無死則原氏弗貧終生弗夭乎收其遺骨而藏焉猶足珍者彼駑馬雖幸列閑衛日就羈絡誠賤矣武進茹侯與予同年舉進士來蒞邑以儒術飾吏治暇則進博士弟子員試之文得龔生道隆者則亟稱而深嘉之龔生故食貧益茹辛攻苦力於學讀其所屬文蓋漁獵經史庶幾哉澤於道義者不徒勦陳襲蔓爲也而宏論藻思多出之風簷晷刻中嗚呼若生者殆所謂駒千里者非耶既貧復天奚不俟少試康莊之足而遂坎壈以終也予故悲其志重惜其材焉茹侯錄其文擇其可傳者梓之夫亦謂其遺骨足珍於是乎收而藏之也歟與今之沿迷蹈瞽轉相摸竊舉一第卽出一稿災木充棟於坊肆間異意矣

珥筆草序

不佞生也愚束髮學藝漫有引裾請劍之思嘗竊謂丈夫儻光依

貝倉室集九
日月身致雲霄不裹革行閒則披肝闕下及辛未叨登甲榜選讀
祕書典在詞垣日靡庖給此非愚之分也丁丑冬父子之倫敦矣
抗章者五臣不佞實首倡焉故被杖而還最不能忘情編戶七年
下石百計蓋無日不驚魂也乙酉春君臣之紀淪矣阿指者盈廷
不佞獨建議焉故賜環而起旋不能安身歸田十載蒙垢千端月
且無稽風聞未察甚至指爲邪爲亂者蓋又無日不銷骨也此則
愚之效也昔時同事者或以名高驟進崇班或以位卑益著令譽
惟不佞名位兩無當焉雖然人損寔受天植難移藉令就列服官
更有憤激弗忍噤嚙創殘之餘必膏鈇鉞莊生曰樹而謂之樗不
中繩墨故不天斧斤所謂無用之用也不佞善病蚤衰已結數椽
於十里蒹葭中二毛漸霜一息如綫常獲秉耜以俟蓋棺又安知
非愚之利哉古云願爲良不願爲忠恐彰君過特諱己直不佞嘗
執經侍帷幄見上神聖靡由補拾茲所言言宰輔耳笑而諱也旣
不焚草且爲災木蓋一疏而首甘鼎鑊未填溝壑幸也再疏而獨

遭萋菲因保蒿萊亦幸也皇恩高厚相度涵弘聊紀歲月以示子
孫俾毋忘承家報國之念云爾

賜餘堂集卷九

頌
賜餘堂集卷十

聖壽無疆頌有序

皇上嗣承正曆光宅大寶誕膺駿命恢纂鴻圖既五年秋中八月
月建己酉旬外七日日屬壬申為誕聖初度之辰普天胥慶之期
也臣竊惟大德受命德盛則命之保佑也滋隆至治格天治神則
天之眷綏也恆篤載稽往牒諦考前聞蓋代有明王每昭茂祉世
逢景運更衍純禧是故繞電開祥流虹紀迹赤龍玄鳥丹籙蒼姬
猗歟邈哉有周成王初服嗣功位在德元上下勤恤日自貽哲命
日時配皇天而卷阿天保之祝其君也日爾康爾常日俾熾俾昌
然敬德誠民乃可祈天永命而申重之慶必推所自於嘉樂之令
德焉有感則通無徵不應若執契然未有爽矣洪惟我皇上以至
聖之資履邳隆之運乾綱獨攬離照繼明孝奉兩宮恭先百辟虔
臨五位躬總萬幾自屬統御極以來發德音布功令揭蕩平正直

之訓嘉與臣民再始覈實考成蠲逋蘇困朝講不輟禋祀唯寅省
幾唯康勵精於理蓋聖不自聖而思永新之又新以圖終也用能
昭受上帝克敷天休敷錫下民共歸皇極是以九扈薦登百嘉忻
鬯三辰式序六合時雍頃者北胡款塞南海恬波蠻平而西蜀之
妖氛淨寇殲而東粵之叢菁開桴鼓之響稀聞玉帛之國咸集乃
茲金衡正序玉律澄霄氣調南呂之宮星應壽躔之次月光旣墜
清輝滿大地山河秋色平分湛恩承昊天雨露澤流動植懽浹華
夷屬萬寶之告成戴一人之有慶臣又唯丁丑之歲丁者盛也言
萬物之丁壯也丑者紐也言一氣之根基也矧鼎年正富當聖人
志學之期又閏月適逢乃王者居門之象方貽睿哲預卜靈長斯
不亦重玄之嘉貺上壽之貞符也哉臣某職叨輔弼情倍忻愉仰
荷生成俯勤頌禱進千秋金鑑懷芹曝於唐賢捧萬歲瑤觴效岡
陵於周雅謹綴蕪辭恭塵睿覽以上祝我皇上億萬年之壽固就
日之微忱祈天之大願也臣某拜手稽首以獻頌曰

皇明肇泰景命維新真精閒氣篤生聖人龍飛在御於茲五春瑤
圖載啟寶籙初臨聰明憲天顯承紹祖位正乘乾運隆當午乃聖
乃神受天之祐帝德誕敷溥海率土冲年嗣服遠邁周成乾綱以
正坤軸惟寧親政懋學不息其行噓龢播順達彼句萌皇心翼翼
自公及燕圖理實殷望道未見睿聽虛懷弗遺細善曰惟艱哉克
勤罔勌以戡殊眷以育羣黎泰乙流祉元祚凝禧三靈叶贊九土
咸釐窮髮稽顙惟雍惟熙五令乘秋千齡毓聖璇度晨輝瑤華夜
映月挹冰輪露浮金鏡蒼生騰懽玄穹錫慶矧惟瑞應聿逢閏餘
良辰再覩化日正舒我皇履端垂拱宸居禎符奇貺炳鑠寰區世
底休隆域躋仁壽九列平衡萬國輻輳鴻基彌光燕貽孔厚川陵
並長松柏儷茂聞古明良交修用章弗懈於位長發厥祥聖德日
躋聖治時康申重之命俾爾熾昌何以承之所其無逸範衍箕疇
履旋逢吉八千爲春七百過曆願言保之與天爲一

記

新建寶應呂家潭東嶽廟記

萬曆十二年予執經侍上講帷竊聞朝議有直指使者蔡公馬公上言寶應汜光湖險宜隄者下大司空議議如直指言爲便詔予齎鍰十萬畱都計部帑十萬於是大中丞王公直指使者李公暨司道許公等協謀矢力以襄厥事而今參政莫公實始終決策勞勩良多越明年予以病得請休沐踰淮涉湖則隄告成之會也望之屹然翼如也去初議時僅七閱月耳數百年以來莫大之利所宜舉無窮之害所宜祛旋議旋罷卒無見之行者今且不踰歲而成之人力不至於此矣及予還里理疾居無何而參政莫公走使授簡於予曰茲役也前後中丞直指百執事之力也不佞在事樂觀厥成焉然受指廟謨實亦徼惠神力烏敢忘所自耶惟吾子之圖之也蓋湖之七曲有潭焉舊隄沿水而築如環新隄對崖而峙如駛兩首則緣隄而抱如拱中爲阜民呂姓者居之因名呂家潭云工之作自茲潭始屢築屢圯畚鍤無所施幾於負薪投璧之艱

矣乃有夢神女於隄者南數里舊有東嶽廟一區爲奉嶽帝暨碧霞元君之所僉禱於神而神之應如響也隄之成亦自茲潭始役旣竣僉思所以敬天休而答神貺者卽阜建祠以祀之木石取材之餘備役用力之餘經營枘構乘時之餘基高一丈五尺圍四十八丈八尺縱橫各十丈前爲坊中爲門再中爲嶽帝殿後爲元君閣閣之崇也三丈有奇廂庫廊廡丹雘藻繪一切備具輪奐斯美鐘鼓在懸巋然渺乎若清都紫極之境也東則湖波千頃上下一碧西則海濱萬畝遠邇平疇蜃氣細縕水光激灩咸在几履閒窻詎棲靈之所抑亦覽勝之區矣不佞實綱紀之而率屬與事專屬之淮安倅詹時宜效勞佐其成者都事胡傳經歷婁煥縣丞徐一龍也香火灑掃則以道士林承柱司之神之陰佑顯相不佞不敢一日忘而闡幽垂信則太史氏職也子橐筆佩囊於承明著作之廷久其爲我勒貞珉以示永世哉予惟鬼神在宇宙閒猶之水也焜蒿胥蠶無在而無不在也惟陰隲無私故臨下有赫而極辨之

朝至聖之主則百靈效職兩閒兆祥感應之機捷若影響景貺休
徵有不期然而然者今皇帝嗣大曆服建極中和化馳若神風行
無外而前後中丞直指百執事精白敬應蚤夜勤施建議者任事
者運籌矢力者為國家挾必然之畫樹不朽之勳惟公惟忠期於
計久遠而弘濟夫艱難所以效之君者真可以質諸鬼神矣則嶽
帝元君顯其靈而助之順固其所也豈矯誣誕罔倖福於回者哉
夫有感必通者神之所以祚聖社也無德不酬者人之所以昭神
功也則即阜建祠以崇事虔享之夫誰曰不宜神其妥靈歆祀永
綏今皇帝億萬年之壽永護茲隄億萬年之基而嶽帝元君之精
英靈爽則亦億萬年永有聞哉莫公名與齊粵人為予同舉士功
名日茂文武為憲之臣也故不敢以不斐辭而為之志始末紀歲
月云

武進縣桑侯徵糧建議記

東南財賦地為郡者凡六而吾常郡當什之二郡為邑者凡五而

吾武進邑當什之三錢穀糗糒歲會職貢於水衡計帑者鉅萬邑
故繁劇民工於軒松撫摠又附郭更臨孔道晨夕朝謁東西迓餞
無停晷掾曹胥徒刀筆代耕者窟伏機藏以百耳目伺一人之閒
頃之旱乾水溢災沴頻仍畸窮者流離而稍饒羨之家不勝誅求
十室九困然軍國所需徵調甚亟不迫而傷撫字即緩而拙催科
吏雖才無兼能日且弗暇給故黠民藉口稔歲多逋賦而長賦者
或交臂猾胥竄名匿籍為奸簿書期會視若具文故紙矯虔之吏
遂至置逋賦者弗問一切責長賦者長賦者恆傾困廢箸以應之
陰取盈於巨室陽賈譽於小民而民之黠者益有所恃以效尤積
習夙蠹莫可究詰夫民逋而責長賦者則賦卒辦而病在下長賦
者與胥為奸而責長民者則賦終訕而病在上不佞休沐田里久
蒿目拊心傲也極矣侯之至也問民疾苦詢於芻蕘殫智竭誠銳
情於理而尤究心於催科之法不佞從與而對曰宰不稱民父母
乎父母之於子勞以成愛嚴以佐慈儻坐堂皇上令不行禁不止

而姑息因循徼長厚之名邑無幸矣至謂催科無善政寧詎然乎
侯乃穆乎深惟慨然力任於是邇作法之始稽流弊之終持獨運
之籌廣眾思之益調劑其故斟酌以宜用繹庶言爰陳十議立限
以定緩急革耗以杜侵漁比冊以便校閱總由以防隱漏均解以
示公平信令以絕驛騷而銀穀分僉其役匭庫各有所司至於糧
徭併徵省邗移之弊磨算預覈清飛灑之奸凡此皆明同炬列窾
中刃游若琴瑟不調解而更張之矣議上監司督府諸直指使者
咸嘉與樂聞報如所議著爲令因得壹意秉約與百姓更始四境
之內罔不灑然改易聽睹洗濯心志者黠民奉三尺凜凜而掾曹
胥徒惟抱牘署案耳庭無垂楚戶鮮句稽毋煩色聲不逾旬月而
充輸將之額諸賦長竊自慶也羣造不佞而謀曰催科之法莫善
於今者吾儕小人幸蒙大造肖貌有禁樹碑有禁然彰軌陳極爲
可繼也杞不足徵殷無以鑒惟微子一言爲百世利可乎不佞曰
唯唯侯之議利垂桑梓不佞之官典在筆札其何辭於紀載之役

蓋嘗聞鄭大夫僑之爲政矣都鄙有章邱賦有制鄉校之毀與人
之謗不改度也曰火烈民望而畏之水濡弱民狎而玩之故治不
獨寬而濟之猛政用以和乃夫子則以遺愛稱焉嗟乎古之仕者
爲國爲民今之仕者惟官惟貨無論弛惕待遷苟簡從事以傳舍
視其職者卽有疆幹自負以催科見能者乎逸於程功巧於避怨
慢令平日任術臨期奉法之民無所縱舍而黠者不暇逮亦不欲
逮也畏罪之賦長無所休息而爲奸者不暇營亦不欲營也是猛
於善良而特寬於豪氓禍史耳富者貧貧者益貧民貧而國誰與
足哉奚惑乎國計民生兩無當也侯之議俾黠者爲奸者目懾股
慄奔走不遑而奉法之民畏罪之賦長胥懼忻踊躍若出諸罟穿
而衽席之則以遺愛稱侯夫孰曰不宜今軍儲邊餉匱乏不支廩
宵旰詔計部博集羣策夫東南之負豈朝夕之故哉藉令數十年
以來人人而侯也在在而侯所治之邑也惟正之供無積逋矣不
佞秉耜明農踐更以給公家不敢後於奉法之民與畏罪之賦長

故於侯之誠心惠政習見之而於邑之輿誦里謠又習聞之儻用傳信實匪獻諛遂鐫石紀其事以俟後之宰邑者攷焉且以備今之觀風者采焉桑侯名學夔萬曆壬辰進士山東濮州人

家慶圖記

予請休沐歸以萬曆乙酉迄今戊子爲三年矣王程已逾臣病如昔旣不能趨闕供事又不敢齎疏乞休清晝綠陰卻軌謝客眠食之外課子弄孫而已會荆谿李君止善善貌人遂貌予往貌予者多矣不得肖今得十之五六嗣令并子若孫而貌之則人人肖也而得十之八九乃成一圖因書數語以志歲月云予以嘉靖十九年生今四十九歲矣以萬曆五年再生今亦一十二歲矣長兒雍已未生今三十歲次兒亮壬戌生今二十七歲又次兒奕甲子生今二十五歲又次兒玄乙丑生今二十四歲又次兒京庚午生今十九歲又次兒克癸酉生今十六歲又次兒亶丁丑生今十二歲最幼兒褒戊寅生今十一歲長孫儼思爲雍之子亦生於丁丑是

年予杖於廷予兄命之於家曰致孫取致身之義而褒兒則孕於杖之前產於杖之後命曰餘生謂予自此之生皆餘也次孫爾思爲玄之子生於甲申先一年予蒙召起家復官遷中允再遷司業以洗馬攝其事因以洗孫名之學步學語卽抱育其姑之闔中今五歲頗穎慧機警相隨跳笑足爲怡悅其姑者子女文壬申生於編修邸第視京爲妹競爽好修出諸兄弟上而昨年除夕生第三孫爲雍之第二子歲未期而子女與女之母毛孺人謂不可示以貌皆爲圖所未載者榮啟期以生物而得爲人以生人而得爲男以生有不見日月不免襁褓而得年九十爲三樂子之樂第未九十耳爲人爲男而又徼君親之恩爲儒爲官而又給館粥長子孫不爲饑寒惻獨而又乞骸骨於方艾服政之日田可耕水可釣從吾好而爲農爲漁蓋知止知足逍遙容與於田閒水際而老焉以予之樂較榮啟期之樂不旣什百乎凡疇昔所經歷直大夢耳過而憶之已屬恍惚久而忘之終歸杳茫至於是圖之所貌者更幻

形也誦赤舄之几几詠恭人之溫溫論其世想見其儀刑姬公武公千萬祀而常新此靈以貌爲哉雖然垂世之聞無所藉而永終身之慕或有所託而存焉者也自予父母背棄歷有歲年雖嚴範慈顏耿耿心目而音容漸遠想慕爲勞卒以未嘗有遺像爲憾予旣憾於前不欲令予之子若孫復憾於後也矧予位浮於德聲過其情罔裨當時無述後世所可貽者僅貌耳是圖也予所藉以傳者其在斯乎予之子若孫所託以思者其在斯乎

贊

沈少卿純父像贊

其眉宇軒然而所持者定其眸子瞭然而所存者正舍生甘之如飴憂時悄乎若病蓋粹然者容而耿耿者性夷然者貌而蹇蹇者誠賜環華旒者寵耶伏闕顛躋者辱耶此惟幻境橫金挂紉者廟廊耶綸巾絢履者江湖耶亦惟順命要之寵辱之形廟廊江湖之景可像者丹青而窮則志堅達則義行寵不阿世辱不斲名其不

可像者浩然之氣千百載揭諸日星勉哉少卿是吾黨所兢兢御史大夫蕭乾養像贊

斯人也位繫具瞻世推宗工予於中祕乎相從形端而神斯王貌偉而心則沖壁立於外海納其中汪洋千頃之度魁梧七尺之躬似舟載乎百斛乃鼎貯以萬鍾麟玉傳宣威揚四裔簪筆侍從名在九重列卿聞望垂紳正笏中丞節鉞橐矢弣弓蓋材全者左右皆宜而德邃者色澤自豐休哉福祿之象藹乎道義之容此丹青所難狀而亦豈贊述之能窮者耶

鴻臚盛東野像贊

染翰承恩典客詔祿王事匪躬天顏是矚儀之可象冠冕佩玉心之所存握瑜抱璞外則俛乎如不容中實怡然其常足蓋邁迹蒿萊而列有爵者之牘雖致身廊廟而不失無懷氏之樸爲子若孫者快觀章服之華思踐雲霄之躅茲其圖爲不朽而貽之以穀者耶

祝南山像贊

有序

先生發解江藩馳聲海宇聞道甚蚤畜德維新蓋天挺之豪人倫之杰矣乃若操勵飲泉才恢游刃化戈爰而俎豆緣政事以文章赭衣空庭青衿滿戶其民之孔邇士之所嚴事乎予不佞辟雍識韓蹊成桃李毘陵借寇澤及柴桑知先生莫若予也肅瞻道範敬綴贊辭

先生之表為昭為融先生之中不眇不封藹藹維吉溫溫其恭皜乎秋陽諸儒宗工煦然春日萬類併幪童冠與偕謾謾風下之松朝野俱重巖巖壁立之峰盡削機事用葆淳衷其清輝古色若馭風滄霞凝冰嚼雪者彼僅擬先生之儀容其正氣高標可鞭雷駕霆吟風弄月者我能寫先生之心胸去欲去驕靈詎稱翔鳳冥鴻繫先生其猶龍嗟嗟天所予人所受形同性同而能踐能盡者惟公茲為不朽孰為厥終豈藉丹青而可久將互玄黃以靡窮

題王璵南小像

此嶼南王先生辭朝還里圖也先生嘉靖丙午舉於鄉凡九上公車弗售隆慶戊辰去禮部為吏部選人得楚之臨武長臨武故巖邑介在山谷中土瘠俗獷素稱不易理又新中寇創殘未起馴擾為難君故寬然長者至則務煦育拊摩其民而衽席之其政術惠下而不媚上飾儒而不必緣吏民咸怙恃而上之人不盡知也居無何會入覲赴闕而子之訃至先生止一子弱冠補庠生而死不勝心悼之然宦亦倦矣遂投牒稱老不任吏而歸歸故所居夾山里守敝廬治薄田日課兩孫讀僮僕而趨益務為惇謹逡巡阡陌自介士匹夫以至僮豎臧獲舉恂恂遇之無所加而執爨者爭席無論里中人不知先生故為尹即先生亦且自忘夫世之沈酣榮境沾戀名途至馳驅衰暮不休及休矣或憑藉故態又或佗僚無聊而不勝隕穫趨趨者先生謂遺書苟足讀以自愉志而已而不必名遺業苟足饋粥以自周身而已而不必利故怡然自適泊乎無營於行藏流坎之際四十年如一日也傳稱彭澤令在官八

十餘日以郡遣督郵至解印綬去而靖節自敘則以程氏妹之喪自免韓子有曰靖節不欲任久矣而去以妹之故蓋其孝友如此識時委命其意固有在豈一督郵能爲之去就哉今與南先生爲臨武長在官亦僅三百餘日耳而以傷子拂衣進退之間意深遠矣而靖節之自贊云忘懷得失不吝情去畱無懷氏之民歟葛天氏之民歟愚不佞之贊嶼南先生也亦云

于念山像贊

有序

念山于先生司教吾常子兒亮在諸生中因得奉顏論先生疏通知遠寬柔式和士嚴憚而又樂於親就之也予時休沐於里出此幅命爲之贊予不肖何足以重先生哉先生自有所不朽者在爾青衿翹楚以儒發身絳帳譽髦以道淑人粹乎其容若恂恂繩矩而卓犖邁倫則又有俠士之丰神俛乎其躬若雍雍冠紳而蕭灑絕塵則又有達人之胸襟出則敷蘇湖之化雨處則收安樂之陽春以皮相形求者僅見其眉睫之似而鑒神情窺色理當得其絃

歌禮樂之真

題邵艾軒像

此提學艾軒邵先生謁孔林圖也夫鄒魯之墟洙泗之境凡爲使車宦轍所經履豈少哉又豈不瞻仰廟貌拜起徘徊廩廩乎動羹牆之感哉然得於所見則惕焉以興及質於其所行何其邈焉以自戾也卽日周旋於俎豆無庸也先生起家厯官正德間秉斯文之軸表東海操潔履方貞度肅教得過於權閹以歸蓋於臣節師模庶幾乎汶上西河之遺烈焉庶幾哉聖賢之徒歟斯圖也以人重匪以事傳也偶爲族子所逸而爲吾公復繪而表章之予束髮受書於爲吾公而又夙仰止先生者因命題識於其端嗚呼平泉木石燿燿著稱更諄諄垂戒無何時它屬矣而鄭文貞之笏李衛公之詔至爲百世寶以徹九重之聽然則先人之遺與後裔之所守其輕重可知也爲吾公文學行誼彬彬世其家卽是圖之繪亦足以繫孝子慈孫之思矣凡爲艾軒先生之嗣者當無忘爲吾公

之訓尚其什襲藏之而視爲九鼎重哉

曹鳳亭像贊

有序

鳳亭曹翁世居東城隅蚤業儒久之遂謝去顧不樂闖闖卽其居之後闢隙地構數椽芟蒿萊而菟裘焉飽泌棲衡養恬葆真泊乎澹如也今春秋七十六高矣而神日王志氣日益強出其像俾不佞爲之贊不佞有奕世誼又辱翁忘年交烏敢辭

癯乎其容矚乎其履丹乎其顏蒼乎其髭仁心爲質義方是砥視不下帶步不踰咫尺不出閭閻而爲德於其鄉孰不仰止功未及寰區而能施於有家可云康濟高商山之節而心存胞與之思饒太邱之風而胸無町畦之滓達尊惟三而僅闕其一錫福惟五而已有其四皮相者謂騏驥終伏尚在千里心知者謂鳳凰高翔超覽一世此予覩眉睫之道義而鑒神情於色理者耶

啟

同門請座主啟

伏以大匠掄材樛櫟者旣莫中其選良駒伏櫪鞭策者每不盡其宜此矯首一鳴士重相知之感而別足三獻古稱相遇之艱也若本無所有於中頓收網羅之內與實非大異於眾遂居豪傑之先分更難堪恩尤罔極恭惟尊師才推藝苑鍾華嶽之精英擅儒林衍河汾之盛美旣以文章鳴盛世卽以經濟佐明時瑣闥攸司觀郎星而耀彩戎機專職仰卿月以流輝折衝樽俎先事有備運籌帷幄多算無遺頃致俺答輸誠不數單于稽顙載承綸命兼文事於武事之餘偕入鎖闈期得士於校士之際降心以取故收之於臃腫拳曲之中具眼而觀遂得之於牝牡驪黃之外制增四百額悉入彀以承恩名聯十九人誰處囊而脫穎媿甲榜多居人後在師門未爲有光願矢心恆以義先於公家終期無負草茆有今日均蒙拔擢之恩桃李在他年孰匪栽培之澤謹涓吉旦敬迓旌旌用紓摠衣之忱冀領書紳之教伏惟俯允不任仰祈

同館請館師啟

伏以握衣祕館栽培豈廊廟棟梁綰綬清朝造就實門牆桃李敢忘所自欲報靡由茲涓吉以祇肅賓筵冀徼寵而趨承師席恭惟台相后翁丁尊師得天閒氣爲世偉人淮甸挺生協昌明之期於五百彤廷獨對抒禮樂之蘊於三千遂羽儀乎聖世卽領袖夫詞垣荐厯崇階漸躡風雲之會蔚隆雅望恆依日月之光楷模一著乎成賢衡鑑兩推其校士昨者執經東觀朝夕惟勤頃之贊治南宮夙宵匪懈奉天顏於咫尺羨日錫之頻繁鳳池會演絲綸麟史仍資筆削舉朝廷視爲重典旣萃一身以兼承屬館閣難於得師復荷九重之特簡仰塵虎席俯駐鸞坡每乘啟沃之餘更勞吐握暫借寅清之暇得侍光儀文欲起衰於近習之浮靡無取教先敦本惟古人之節誼是崇何當藹藹之倫均沐循循之誘春風座上既有因之可宗夜雪庭前固無行而不與至誠動物惟嚴則道尊覲德傾心故逸而功倍遂使章縫之侶叨聯簪笏之班玉署瑣闈咸躋禁近蘭曹柏府並列清華飾敝帚以千金何幸獲經題品效

鉛刀於一割尚期不負陶成懷感激於無窮仰儀刑之不遠謹卜某月某日時值徂暑候且生涼爰效葵烹擬伸芹獻暫下黃扉之直少分赤舄之輝筐篚是將敢云恭敬之實蘋蘩可薦用昭明信之忱瞻山斗於步趨復茲捧袂聆珠璣於警欬從此書紳某等不勝頤望懇祈之至

書

寄家大兄四首

弟不肖不孝不愛父母遺體然此身旣屬之公自當致之時又無可愛之理頃者世道陵夷人心陷溺綱常倫理幾於滅絕公卿持祿而附和臺省畏罪而承望且連名具疏畱之極醜極醜當斯時弟恨無羅公者出也觸目擊衷慷慨念之以爲義所宜爲時不可失一切死生利害悉置之至於官爵則視爲浮漚棄如敝屣矣遂有敷陳不復忌諱弟亦知言之無裨於用然此一端道理一種議論四海之大萬世之遠決不可缺者昨疏入當亡震怒舉朝動容

寮友妻孥則莫不見憐而致恐者弟惟從容俟之耳當李文達時以今較之更有甚難者弟之不若羅文毅亦安敢自負於名賢前哲哉弟勇進首發其端凡有人心天理者又莫不謂義舉正氣當亦不貽羞於父兄之訓也弟今待罪闕廷囚服藥物皆攜之偶至纂修館有筆札在焉遂乘閒作此書風波頃刻儻不測便無暇耳但得保微軀還初服隨兄畎畝閒志願畢矣不然奉母并卹我妻孥兄之事也弟亦無繫戀也寒凍之極悉以涕淚濡筆墨故草率如此十月十九日寅刻具

上疏之次日獨畱中不發票而又有繼起者趙檢討用賢也中貴稍稍聞之但見搖首吐舌之狀危矣危矣今日已蓆藁待於闕廷因念死等耳卽今視古雖彭殤齊算也事係綱常言傳簡冊弟得死所矣故事勢愈艱而心神益定想當時解衣折檻亦不過如此耳天祐皇明恐不至是此廿日所作書也

今日則是上疏之第三日矣各本俱發而二疏獨畱乃縉紳稍稍

知之莫不扼腕痛心者師相之怒甚盛對人云他不過要成名做一箇羅一峰耳馬乾老王荆老二公正色直氣率同寮往懇之只說事由內廷不發閣我不與知弟自黎明卽攜囚服藥物與妻子輩訣別而赴闕庭微傳待三日設齋停刑之後方下錦衣鎮撫也有云更不可測者乃朝士無問識與不識舉歎息惶懼卽嗇夫走卒亦見憫憐矣嗟哉嗟哉一人之生死奚足恤哉敗壞至此如天理何如國是何又聞批鱗履尾者四面起乃今飛騎四出止之然待弟之旨下而剴切揀援者亦有之在弟則事勢至是更覺從容而慷慨矣此廿一日寅刻所作書

昨被孥及受杖之際生死呼吸聞然業已置之誠如寄如歸耳故神氣安定意思從容但痛楚殊不能勝昏眩去數四似夢非夢耳中微聞若有神人語者若非陰賜護持安得甦醒自今以後猶或可以從兄侍母弟之生平皆餘日也恐家中驚懼差人星馳走報緹騎邏卒偵逐甚嚴一兩日當下灣未知何日可抵家耳縉紳相

率痛哭道路咨嗟至填塞而不能行甚是好光景也榮於軒冕多矣中夜伏枕口授亮兒代寫上稟十月廿三日具

與王荆石相公二首

頃凡三四接手劄千百其言總之家國之憂父師骨肉之愛疊疊乎忠誠懇款可泣鬼神可格豚魚卽至愚極不肖奚忍仰負高厚哉常熟兄祇以師生之誼感遇酬知又厚爲伊周望也閒嘗造膝不無逆心而其軒然高步侃侃然正論標植於宵人舊黨之中一二夙嫌小郤者密構積讒許相徒以影響悍然起而攻之則常熟兄安可隱忍頑然坐而受之乎若門生更有難之難者老師或未設身處之推心以諒之耳二人實爲一體儻是時如前論中居閒停解云云則非輒語傳言置此身於事外不可是令常熟兄當其辜而我因之以爲利不幾於背友而博一官乎況廟堂之言曰專指趙也而描寫之疏則又曰一二名流然則門生何可自謂此身不在事中乎卽如台諭云文墨高閒杜門避事將何道以處此境

也若未有紛紜之前門生於人絕無忤觸於事原不關聞於政府則自入京以來旅進公揖外未嘗往一見進一語又如台諭云盡其忠務匿其迹以進言要訣教門生惟有慚負而已然亦匪故爲疏外未信之諫恐以爲謗而伺候門牆往來柬帖稍數數也更召人之疑正非文墨之官所宜耳自備員國學僻寓城隅與洪陽先生入署理職業逾數日一過長安走馬答刺未及畢復茫茫然返矣真似鄉居可稱吏隱甚所安也

辱賜長箋仰悉至教讀之四三不勝慚悚台諭云門生昔疑今信安知疑信之是非乎夫門生今之信以老師之言而昔之疑則不獨以人之言也老師人倫衡鑑揆路儀刑眉睫低昂頤頰予奪舉朝覘意嚮以爲趨者門生叢謗勢可弭而謗且滋興若鄙之也門生自廢力足援而廢不復收若棄之也門生有不善義當責而規誨之弗聞若絕之也凡此皆跡也跡疑而人之言更譸張以益之疑卽明智者不敢強自信矣况愚闇乎此門生所由寐也若老師

或以鄙之之跡而陰解之或以棄之之跡而曲庇之或以絕之之跡而以不屑教教之深恩妙用跡然而心不然則非寐者所能窺而今始覺也然則昔之寐有因而今之覺誠晚矣至於二罪之討一語無辭知過自訟敢不輸服第所謂匿名奸政則不識何狀何指紂之惡不如是之甚也申老先生天寬地厚門生豈木石哉台諭云何不以此告老師者告之夫告老師者懼不得爲人而求見譽也無所爲而披瀝告申老先生者慮不得爲官而求見庸也有所愧而囁嚅苟緣落魄遂至露齷縱不自堅蒿萊之守寧不重貽門牆之羞乎創殘之軀灰槁之念山林長往牛馬任呼已矣復何言儻不卽填溝壑異日者肉袒面縛於蘇臺綠野堂之前可耳諒老師亦必矜其固陋而原之也台諭云人生如寄何苦日夕是非煩惱間門生身隱矣與世無所關涉於人不足齒頰解脫此障無難敬聞命矣司成兄與門生毫芒無以異也原未有聞何物細人又傳譌語台諭及之下情愕然素荷生成之恩更蒙真切之誨不忍

嘍噉直吐肺肝死罪死罪

與張洪陽相公

尊俾取道而西正台車擁傳而北也旁午應酬毋忘賤迹一緘下及千里垂存惟時倉皇裁書鹵略心旌未罄手勒不莊頃之中外多故上下未交政落旁門權輕內閣安位行志此際大難邊疆之憂雖癰疥之疾嬰城堅壁卒難蕩平所慮者同伍效尤異類助逆關中爲天下樞勢若建瓴計欲徹土宜何以圖之惟相公主持密勿慎重絲綸亟省議論大寬文法罰必徇眾賞不踰時兵則宜多將或貴少十羊九牧亦可爲鑒想帷幄之籌自有遠猷非淺窺遙臆者所能知也儲嗣之建迺腹心之虞似匪可以口舌爭亦不宜以旦夕急未事則俟時無擾至期則造膝而言安常則順命爲恭遇變則捐軀以殉所恃者天祚靈長皇衷英斷久當自定或無他疑惟相公持以寧靜感以忠誠不激不阿潛孚默奪想廟堂之謨別有祕畫尤非淺窺遙臆者所能知也江南十載秉樞因循釀弊

山西一辭解組忠哲貽芳繼其後者難之尤也中閣內閣呼吸相
關若匪逶迤便須決裂祇全臣節奚裨公家既不能誦身俛躬又
不能貢金獻帛未審相公又何以處之中行嘗侍左右竊謂相公
穆如清風皎然白日何幸洛中司馬卽爲天上夔龍寧非千萬世
之一時哉已知人望久屬但祈帝眷漸隆倚毗特專生平盡展樹
宏建鉅振蠱維傾爲社稷造無疆之基則亦貽無疆之聞辱在門
牆曷勝願望中行不肖通籍廿年就列僅三載耳此外皆得罪要
津歸惡下流之日也逢迎代贄構造爲讒罟穿在前茶葉自齧心
如髮短志隨氣衰冉冉老矣恩銜推轂念絕彈冠卽賜拔擢決當
遠引不敢冒進以妨賢輕出以辱知己也如云軒輊之評猶挂齒
頰鉗錮之毒尚畱網羅三黜宜然再收已矣

與艾熙亭中丞

上林並棲倏忽驚魂折羽握蘭同臭倚玉末光幸在下風慚其匪
類矣一疏以明子道而幾斃杖下先生所同也一疏以明臣義而

久擯田間僕所獨也逃虛隱奧望長安眞隔前生霜毛漸疏河清
難俟僕已矣先生其濡忍委蛇爲國爲蒼生綏猷造烈亦可爲同
事不肖如僕者雪恥解譏則僕之蒙休徼寵也生固無當死且不
朽

與鄒南皋比部

遠承雁帛挾我雀羅一水盈盈猥自引縮不能操舴艋追晤於江
之滸也望之依依思之惘惘不肖匪類不敢自附於同調久矣疵
逃之身世所鄙而數焉門下猶然夙昔念乎丁丑事五人者迹偶
同耳飄泊東西不相聞問瑕瑜彼此不相掩覆及賜環就列始稱
聲氣應求之交居無何門下復以批鱗犯主聖而不肖與沈純父
則以建言忤相公故門下屢起屢蹶而不肖與純父遂坐以元凶
大愆移之郊遂投之罔兩不足盡其辜矣乃羈箠趙汝師暨艾先
生於遠署閒曹點綴景色若以示天下云五人之中賢者未嘗不
用而不用者自不肖耳久之天下之惡果歸焉樵山釣水已積歲

年而有唐太僕蔡直指之彈擊唐贊艾以詈沈蔡贊趙以詈不肖至別以江山白黑良足慨也亦足笑也吾儕向時已拚生死今日顧難於出處乎門下何以趨趨爲也外度之時所宜內度之心所安出可以行己之志處可以成人之名則山林鐘鼎殊趨同軌跡千里肝腸一室正不必其迹之又合也門下行矣努力自愛至於講筵召命之諭則門下知我不以心愛我不以德矣二毛漸滿百念盡灰虎尾羊腸驅之罟穽無論三黜固所甘心卽加三聘不敢應命長林豐草倦眠饑食聊足自適以畢餘生竊自比於鑿坏踰垣之徒矣幸門下置之頤頤之外

與唐凝庵少卿

不佞冥行扞罔抗言罹尤四乞歸休六移伏臘蜉蝣暫寄牛馬可呼負芒刺於蒿萊久矣然於門下同里同年至親至厚東髮把臂初無小卻奉令承指嘗效微勞今門下策足要津不佞待罪下里猶庶幾察之眾惡憫其羣攻曲賜併幪是所願望乃得於傳說者

籍籍謂門下有意督過之也詆訶橫加點綴巧構投因下井呼以順風朝紳里黨人人能言之且惟辛未以來廿年所偶叨驥尾遂將虎鬚念念吹毛時時剝腹朝紳里黨亦人人能言之嗟哉嗟哉不佞雖有推心之寸腸實無容足之尺地匪一日矣然出口入耳莫可踪跡門下固不難曲掩不佞亦何忍重疑而閉目塞聰若罔聞見門下固不惜逆施不佞亦何妨順受已矣復何言至於頃者門下偶挂彈文止因晉秩躡等別無訾議而大疏雄辯自敘賢勞自表正直自證考察之非辜自明遷轉之不驟洋洋纒纒亦足以伸己屈人矣又無端而忽有指也借人形己曰一藉建白之名可覆百行之醜不佞讀之慚沮思之悚惶頊頊汗下踵也夫論建白不佞其罪之首也論行誼不佞其醜之尤也珥筆之初因言父子之倫常而幾斃杖下賜環之後復言君臣之權義而過返田間是他人之建白一而不佞之建白二也言尤行悔垢積愆叢寡過未能內省多疚是他人之醜行百而不佞之醜行千也同里同年至

親至厚朝夕所稔妍媸莫逃茲由門下之鄙夷遂爲海內所證信
是他人之醜可覆而不佞之醜不可覆也雖然門下意本獨發言
則槩加無論四方君子卽同郡之建白者若而人皆接踵去國矣
無論一時卽當年之建白者若而人如尊公荆川先生亦抗章編
戶矣門下縱不爲同郡諱獨不爲尊公念乎豈門下嚴於嫉惡急
於攻瑕不暇旁顧不暇追思乎片語隻詞威於鈇鉞因一人之醜
而遷怒諸賢因今日之醜而貽羞先哲嗟哉嗟哉其又不佞之咎
矣門下儻或云覆醜者什九不覆醜者什一則猶可舍其九居其
一因之趨避已屬冒昧乃門下旣無解網之仁不佞安得立錐之
所乎反己自憐何施面目門下必且云吾言在此吾意在彼或甲
或乙無所主名安見其爲爾也者夫其傳者言也不可揜也中藏
者意也不可據也使不佞舍其不可揜者居其不可據者而委其
醜於人是益其醜於己況門下旣無推烏之愛不佞豈免死兔之
悲乎同類相憐亦何施面目門下皇華畫錦里父老負弩矢前驅

不佞舊廁門牆無煩介紹詎不願奔走於車塵馬足間哉第匿怨
而友其人左邱明恥之負醜而友其人左邱明當益恥之不佞疏
節直腸淺衷褊識苟有怨怒素無蓄藏未聞背面夷跣心口胡越
而可稱友者不佞旣知爲門下所醜矣而強求攀附寧無顏厚門
下旣視不佞爲醜矣而陽賜接納奚取貌交夫友之倫亦重矣同
聲則應異氣則離貴賤死生交情乃見門下與嵇別駕應科臭味
莫逆終始不攜旣死矣焉用文之且也假絕友之峻節賈忤相之
高名今則借負譴之畸人充逢世之奇貨門下之自爲計誠得矣
不佞之爲門下用亦足矣死者爲地中冤鬼未死者爲門下功臣
不佞其何辭之與有拊膺扼腕踟躕地踏天三四躊躕千萬不得已
傾心披瀝沒齒引避爰稽載籍若魏應瑒晉嵇康梁劉孝標漢朱
穆義疏交絕自古然矣白日青天丈夫男子亦安用途飾於聲音
笑貌而爲此罔兩以相謾哉蓋於是乎賢者之庭削醜人之迹矣
此不惟不佞之處己宜爾卽門下之處人亦宜爾儻門下謂其無

足與比數遂賜麾斥而置之於胸臆頤頰之外幸也惟命儻門下忘其直率因滋覺疵而重之怒如蹈水火益熱益深以門下才力智謀直摧拉枯朽耳不佞爲魚肉以俟刀俎宜也亦惟命門下其裁擇之

與錢啟新侍御

門下冠豸批鱗一日二疏視死生直且晝耳得副草焚香誦之建儲數語茅焦之危論相干言王珪之確楓宸藉重梓里借榮布袍芒屨以無恙之身返初服也臣節已全君恩殊渥矣不肖別疏把袂願忻執鞭將長跼江之滸以候

與薛玄臺進士

足下惓惓德誼甚休敢不三肅百稽以承之不肖得過當塗世且指爲口實借爲贅儀而鄉里之伎構者狀千態百月異歲新吾人止有進退兩途既退矣呼馬呼牛任之耳至於應酬交易安能食槁飲泉若蚓而後可哉反之心無愧言之人無怍質之鬼神無疑

則脣吻黑白齒頰雌黃何可窮詰足爲忻戚也不肖屏廢前後十餘年所經歷震撼不知幾許事矣只須牢把舵至風平浪息時又是一境界卽不平不息亦命耳足下甫通籍便忤世而歸闇黯頓挫自此始也幸識之

與祝南山少府

進止出處雖父子兄弟弗能贊一辭況不肖之於門下乎然骨肉之交道義之愛言而不直謀而不忠又奚取於朋友也門下仁慈沾戀而家庭左右復爲牽挽遂爾優柔今也事至此時至此不肖旣不能保無它虞則又安得不圖其上策乎且無論時論事卽以學問科名品格言之先幾稱智決退稱勇蚤辭榮利之途不受汗蠖以故吾面目返於鄉閭雖少此員外之名或少彼橐中之物只辦得忍辱安貧四字豈不快然蕭然於一邱一壑之間哉官可惜而身尤可惜也官不可捨而身尤不可捨也人豈不欲畱其身千年萬歲乎電光石火俯仰遂成今古況門下尚當爲嗣續計乎白

太傅云已知軒冕爲長物未免琴書與別人言及此卽三公萬鍾當付之一瞬矣門下儻不以爲然乎
與屠緯真儀部

往不佞起家通籍卽聞東海屠先生之名光施寰區芬流齒頰旣稍稍從它所得先生之文而讀之丰韻適逸締構緜密鷲鶴神駿躡景摩空沈洋百千言援毫濡素俄灑立就至於聲律語尤爲辭壇雄帥人巧時詘天機橫流神境宗工足稱合作然未睹先生之人也意其高調軼塵盛氣凌世令人望而震焉而先生顧古心樸容俛焉如不勝衣訥然如不出諸口而獎賢與善緇衣白駒之好又粥乎如無所能者目一奇節耳一虛譽不難於俯躬降心以下之矣不佞至庸陋無足當先生先生則以疇昔意氣排闥扣關又困於蒺藜屏在蒿菴者久或非脂韋齷齪徒也過聽誤收爲詩以贈之舉全集以投之又進之中堂而飲食之而茲且貺之至教發其所未傳者傾蓋爲懽捧袂若晚先生毋亦取其似而忘其匪類

乎不佞受知己之感因懷負知己之羞處宇一介厯宙一息唯此誼無涯則不佞之此心亦無涯也與趙兄長牋漱誦四三過精詣微旨深於道矣雖然無論三千八百在清微之上尚爲之而忍於遺世失時也卽二生者白骨復肉朽株更榮千載一時臣義莫逃國恩罔極寧不願及犬馬之齒捐糜以爲報乎而誠信未孚疑詬易集一二端人善類不足勝八九之讒喙伎心見幾斯爲哲人不容然後君子今旣徵發不啻幾矣而猶求容於名場利徑往往借迂其身用世之談以自解曰我亦可仕可止耳甚非不視不取之道也出處辭受立身大閑若一旦舉生平而弁髦之先生試論退心大菩薩何如獨覺小乘哉儻微語爲閒秋毫無礙如先生云云則趙兄之掩關離境誠過矣願先生熟督而終惠教焉

賜餘堂集卷十

賜餘堂集卷十一
神道碑

資善大夫刑部尚書閔公神道碑

世宗肅皇帝朝久道成化凡十五舉進士而乙未稱得人最盛蓋三事九列都公卿之位者亡慮數十輩而鉅裔華胄如浙之孫閔之林暨任邱之閔又最盛閔公者與先大夫同舉而予不佞則與公之子今比部郎陞同朝公卒之又三年爲萬曆癸未比部郎時參軍右府上疏曰先臣某備員中外稍樹尺寸於疆場而先母李夫人之卒也蒙恩賜葬今宜啟兆合厝請開壙給祭爲先臣寵光上曰俞特旨錄其功下所司優卹隆施如所請陞伏闕謝迺還里襄事而以墓上石屬之不佞不佞少且賤安能爲公不朽而垂無疆哉日侍先大夫得聞其槩而今則讀高司徒之誌徵其實矣且不佞橐筆於著作之庭紀載其職也不敢辭按公諱煦字和卿別號水東閔之先自上海占籍任邱始徙者五世祖宗禮也一傳而

彝宣德丙午舉於鄉再傳而琦又再傳而定琦爲公王大父定爲公王父以公叔楷貴俱贈南京禮部尚書定二子長槐仕至憲副以公貴贈兵部右侍郎遂稱侍郎公次楷仕至尚書兩兄弟顯融於時昌大其閥閱矣而侍郎公德盛而施未光也配顏氏生六子而公最少有文嘉靖甲午舉於鄉連第成進士授河南開封府推官徵入爲廣西道監察御史無何以叔起大寮公爲憲臣宜引避改翰林院編修旋升山西按察司副使督學政升陝西布政司參政山西按察使本省布政司右使轉左使升都察院右副都御史巡撫山西召入爲戶部右侍郎改兵部升刑部尚書會顏太淑人喪守制歸蕭然有明農之志矣壬申奉特旨許致仕公敷歷幾三十年所至聲績多可紀者其爲推官御史按察使則法紀綱維之任也聽讞無畱平亭咸當抵匿盜張繼先於法而雪良民成杰之冤翦榆次之巨俠寇天秩倚強宗爲害者而又雪白夜子三十人之冤視馬政則條上罔牧奸利狀甚悉其爲編修爲督學使者則

文學風化之任也與纂修精於訂校同考試慎於隲評而視學作人惟公惟明至監晉試知武舉前後所得文武士甚眾其爲參政爲布政爲巡撫則屏翰保釐之任也振弛墮勵將士其所授兵機及所製戎器不離法亦不泥法具疏言五事皆切於邊務當上指防秋花馬池則有紅井之捷提督三關則有雁門之捷平寇汾交則有田武之捷而偏頭寧武每以有備無患而虜不敢犯殆爲干城鎖鑰云至其貳本兵則兵事固其所習而諳者具疏上九邊方略會虜酋俺答侵大同遂圍右衛勢甚張上西顧旰食大發兵以援而命公督餽備奮膺登車無論轉輸不匱而指授中窾掎角以取勝焉旣還報會司寇缺廷推宸筭咸屬公公辭蒙溫旨稱其才望著聞而平寇考績兩蔭子得贈父爲侍郎封母太淑人及致仕進封其配李淑人爲夫人而以視三殿工有白金文綺之賜公之勳勤隨施輒效公之榮遇極盛有終古所稱文武爲憲社稷是毗之臣非公其人哉公敏達博通古今嘗肆力於文章旁及星曆角

占陰陽讖緯之學既謝政居里斥地築圃鳩書史羣賓客優游於其中談世務挖揚藝林疊疊琅琅能令人解頤傾耳若飛玉屑建瓴水也爲文渾雄似昌黎爲歌詩新逸兼庾鮑之長所著有正祀考行於世餘藏於家其捐貲好施周困窮重然諾爲德於其鄉具高司徒誌中予不著著其大者而論之自文武之途分文工績藻而乏搆旗之能武諳折衝而寡橫槊之雅絳灌隨陸爲世短長下鮮不器之才上興並用之歎拊髀以思而得之於禁中者難也公以全材厯試諸艱用之文則文用之武則武豐功偉烈在操頤頰擊指腕之間耳若公者自足以不朽而垂無疆何藉於不佞然不佞以紀載之役竊附於仰止之義與有榮矣公生於正德二年十月初十日卒於萬曆八年三月二十日享年七十有四子一卽陞女三孫男五長銓官生次鑑學生次某次某次某孫女三葬邑西敕建之阡銘曰

全材實難自古則然惟天生公獨異其全聲實孔嘉文武具有鳳毛翩翩虎臣赳赳入則司言掌帝之制遴材造士用貽數世出則司閫敵王之愾勝算奇謀四夷守在乃文乃武惟公是資惟有儒將疆有經師兵殲叛酋刑督冤獄保釐旬宣籌邊匡國張弛剴決推陷廓氛昉古孰匹粵惟希文旣貳戎機旋正司寇弼教率屬厥功益懋崇階鉅卿奕代相繼周鄭之詩惟公實似晚謝羈鞅歸怡林邱老成遂喪邦家之憂恩賜隆施宗功元祀壽考榮哀貽休來裔有鬱其阡任邱之原豐碑信史過者式焉

墓表

奉訓大夫右春坊右諭德兼翰林院侍讀吳公墓表

蓋錫山有閩江吳氏云背郭濱湖五十里而遠裔九傳而澤峰先生崛起於儒以鼎甲官詞林爲青宮諭德嘉靖辛酉先生典南畿試事所舉三輔五經之士稱最盛今少保許公哀然首也而元宰少師申公魁尚書同邑學士周公與不佞皆在舉中三公先後登三事九列不佞以廢再起復塵侍從而先生則以是舉被口語左

遷粵舶長既倦游還里會有大母喪竟自罷隆慶丁卯得請於朝以原職致仕居二十餘年爲萬曆壬午先生春秋八十高矣卒於家孤申錫敷錫徵學士周公狀謂申少師不朽先德哉俟而銘以納之幽謂許少保之言信於今也俟而傳以貽之永則又謂不佞從三公之後爲文學臣俟而表以樹之隧焉不佞雅聞里父老言先生家故貧弱冠補郡諸生嘉靖辛卯薦於鄉壬辰喪母徐孺人尚無以葬也元配楊孺人脫簪珥佐之服闋凡三報罷春官歸下帷錫山之上甲辰登進士第三人授翰林院編修乙巳喪父鈍齋公尚無以厚葬也獨乞鉅公名言以爲重服闋凡三考績升侍讀又明年晉諭德視篆司經局漸通顯矣而秩奉所入不足以卒歲理農家子故業修田功歲得三百石僅供伏臘顧自奉菲約非賓饗不爲具非朝祭不御袷服乃令壤子屬厭麤糲而被縕屨是其守官也者寔能爲封殖計哉先生性嚴貌莊於人無繆恭無謾辭至推轂善類若已有之家食里居輒謝客鍵關不一跡公府歲舉

鄉射禮守令數造請爲彊一出而已常畜司晨禽旦則起課子孫誦及綱紀徒庸比耦稼穡之事久而資橐用以饒幾埒素封矣桑麻在田而營菟裘之業老於邑念五宗之屬有不得聚廬而居者乎有不得秉耒耜而耕者乎如我曩食貧時也割邑中地爲三畝之室以居割都鄙閒膏腴田若干畝挈租而食直指使表爲吳氏義莊蓋自申公許公記之矣先隴就荒時而修葺爲樹垣表者六所因故所發憤處而築錫山之臺以祠庶幾後世賢則師吾勤乎所居西溪民病涉爲捐金三百伐石梁其上而爲德於家於里者不以起織嗇而靳於施也語有之一年之計樹穀百年之計樹人千萬年之計樹德先生敦行飭躬兢兢矩矱以高第致身於承明著作之庭遂積閭修駸駸乎嚮用矣藉令無中山之篋席善資臻膺仕需有成勞於上理乎何有歷十八年階五品而以田里終然乎哉乃治田力穡不以宦豐以本富富則好行其德施與利濟由親始而周窮拯溺仁義附焉至於四舉士而得文武之雋此其所

樹宜蒙上賞古之人均視家國平等物我丈人有事家之人胥治之耳功不必出自己也夷吾一匡而世多鮑叔翟成舉段干木卜子夏田子方而魏黃不敢與比績夫以人奉國家任則穀不任則蕘今同升諸賢逢年邁會樹茂滋隆詎匪先生之穫哉斂其不用者於己而寄其用於人則易百畝而適也猶然在三事九列其所爲愉快者在此不在彼矣先生諱情字以中世系配嗣生卒具志傳不佞最其凡因論著其大者而表之曰此其樹穀起家樹人報國而又樹德以貽世爲春坊諭德兼翰林院侍讀句吳賢大夫吳公之墓

南京光祿寺少卿白公墓表

萬曆十九年十二月二十七日南京光祿寺少卿仰庵白公卒越明年襄事公之弟啟河子紹先等遵公治命而屬太常少卿唐公曰俟而銘以窆又推公遺意而屬予曰俟而表以隧予與公締交奕世講睦通家日者公病脾予亦病肺未及走相視也面雖未訣

涕豈無從維彼貞珉詔茲來禩卽不見委亦安忍辭謹表其大而有關於世者以裨誌狀所未備云公諱啟常字伯倫常之武進人也葆胄殷宗錫胤望族系傳乙丙居徙洛陽太傅肇躋三公都憲踵參九列符丞嗣起慶緒克昌公也產自德門躬承鼎祚而又資雄駿發教稟鯉趨蒲弱齡卽領鄉薦及偕計遂舉禮闈父子聯佩以透迤公卿倒屣而結納臺稱駿骨枚馬盡燕中之金池見鳳毛夔龍方吳下之璧初授祠部更踐儀曹惟時肅皇帝考古章程瑩精制作秩宗之屬典禮攸司而公明習掌故洞悉機宜下稽甲令上當乙覽政府因之爲憲國是賴以折衷其最著者若薄責伊藩之驕汰以肅天威駁止東夷之傳宣以重君命請元妃稱薨而得俞旨奉景王就國而定羣疑凡所調劑執匪宏鉅蓋寅清之無曠官亦練達之有明效也是誠諳士奚啻勞臣旣升尚寶司卿尋調南京光祿寺少卿公方倦游人且修郤白駒正堪在谷默授流言青蠅何足掩瑜翻成知己王陽因而迴馭張翰託以扁舟公年僅

三十三爾委懷圖史釋戀紛華獲偃息於明時遂頤愉其餘晷居
恆悼生母之亡哀以歲加退處奉嫡母之養孝將日篤友于昆季
庭無閒言課督子孫家有嚴訓藉琴尊以寄傲狎魚鳥以投閒業
比素封手植靖節之五柳名在丹籍心慕華陽之三茅續向平之
游於武夷結弘景之棲於句曲觴詠則延賓而下榻吐納則謝客
而鍵關思邈金精卓乎高蹈之履叔夜石髓翛然遐舉之思靈岫
煙霞長王嶠嶢之色名園鐘鼓益堅邱壑之盟右文之景雖未竟
其虹攄于陸之儀亦足徵乎鴻漸天真弗鑠人理靡虧至於飾巾
待期易簣就瞑而徵銘營葬析產貽謀纖細不遺條理咸具可稱
正斃斯爲考終果有得於希夷之旨而無怖於去來之際者耶嗟
乎此表公之槩耳世之下也人懷伎懽俗挾雌黃戈矛起於同袍
肝膽鬪於一膜面而浮慕激揚風雲背則陰擠譏彈震電涼炙隨
其榮瘁翻覆迅於波瀾縉紳或然鄉閭爲甚若公者溫溫乎其容
無城府也坦坦乎其衷無畀阱也卽不習於脂韋亦匪謬爲恭愿

閒以諧謔偶緣方朔之適情時或否臧亦諒林宗之不黨故其處
人無競竟泯忿怨之端與物常夷終鮮憂畏之境生斯時也居斯
地也安得皆公其人哉公往矣過公之阡思公之風者薄夫敦鄙
夫寬惟公爲永式焉所謂表其大而有關於世者其在斯乎其在
斯乎公每濡毫六朝倣體予今勒石一語效顰旣示無窮於代閒
亦慰有知於地下爲之表曰

烏路之原芳茂之陽玄壤躬建耐宅母傍是爲吾常賢大夫仰庵
白公之藏

中憲大夫雲南姚安軍民府知府次山秦公墓表

萬曆紀元之五年冬長星示禮予不佞時濫竽史官應變言事忤
旨當受杖蓋杖於闕廷者十可死八九過予友中舍秦君柱以死
後事相屬君乃灑然改服易容挾醫藥僦舍都門外起予血肉中
而生之周旋於顛隲者甚力而不匿聲迹見坐爲黨用是左遷歸
歸久之竟報罷而君之伯氏貢士柄則以文學行誼聞於鄉也九

年冬兄弟衰經謁不佞於蓬翟而言曰先大父次山府君襄事有期惟是墓中石冢宰劉公銘之而以墓上石屬子夫中舍君於不佞蓋有大造焉一切利害榮辱之計弗遑恤也可謂敦信扶義不侵爲然諾者卽其素所習聞於家庭歸而不至於交貶謫於室也亦足以徵大夫之賢矣大夫者雲南姚安軍民府知府階四品俸入二千石故稱曰中憲大夫爲尚書鳳山先生仲子故又稱曰次山公云公諱汴字思宋姓秦氏宋國史院編修淮海先生之裔也再傳而家武進之新塘十傳而徙家於無錫之胡埭十五傳而鳳山先生起家爲孤卿稱本朝名臣諡端敏丈夫子二人冢子泮先蔭爲國子生旣而舉鄉薦大夫以次得受蔭卒業太學時端敏公爲大司徒大夫從邸第攝布襴衫隨一蒼頭兒驅驢入橫舍中絕不類公卿子嗜學績文視寒峻無異凡六上有司名不售而志則愈益勵蓋能讀父書而欲以才謂自見及謁選銓曹以父任爲郎非其意也初授南京後府都事滿一考居端敏公之喪除服赴部

上疏曰臣母鈕夫人春秋高八十有四矣兄泮蚤世於例得侍養臣請歸而終臣母之身詔許之歸歸則日侍母夫人起居定省弗少離先後請父母祭葬於朝凡兩走數千里疲於道路寒暑不謂勞也尋補右府都事升左府經歷府所轄浙江都司長安宦游多浙產恆以戎伍事關說大夫曰此公事也何得以公事爲私交地乎輒勞之以懲干請者又時時譏詆時政語稍聞於權貴人居頃之升姚安知府府故有世土官高某驕橫不受要束吏莫敢誰何大夫至首禽致於獄豪猾咸惴惴震戢諸所注措將次第而綱紀之已會柄臣子修郅中以考功法主爵者謂大夫無可罷罪狀矧名臣嗣也無已以不及例鐫秩一級調外吏大夫曰我徼親之寵受國恩寧不願在事陳力暴只尺之能以爲報而世不容我然我固椎戇又不能改其素以求容於世遂絕意榮軌浮湛里閭從父老爲社中飲飲必霑醉稍自恣於酒不問家人生產而雅好書購市繕錄則未嘗一日廢也顏其所居樓曰萬卷校讐披閱朱墨狼

籍痕胸裏爲滿隆慶己巳病偏痺不良於行者十年所至辛巳以病痰卒距其生正德己巳享壽七十有三所著書有三才通考行於世及懷李齋雜錄詩賦文讚銘若干篇皆藏於家端敏公敷歷中外四十年其所造就門生屬吏多至尊顯者大夫始謁選時以下僚相見輒入坐上坐引世誼而雁行之毋少孫避分宜嚴相君者嘗習端敏公因念大夫謂其子世蕃曰是爲爾世兄弟也設醴握手相慰勞特爲延引世蕃貪恣貴倨勢張甚時有故冢宰子某索考當遷責其賂不入廛與服俸不晉秩大夫從席間爲譙讓語弗堪世蕃恚而起大夫亦拂衣出當姚安守缺同官兩人者爭得之以賂請於世蕃世蕃業已囑選司而尚書甌窳李公按籍計資惟大夫久次當得乃語選司曰不當得而求孰與夫當得而不求者竟以大夫名上大與世蕃忤此世蕃所以終不釋憾於大夫也家居十五年而以中舍君柱上疏乞恩詔復父以原職致仕贈母楊孺人爲恭人云貢士柄撰次大夫事曰吾父簡抗矯介不善諧

俗至擬之王丹之知交朱穆之受嫉又曰吾父少習博士業卒困有司不得遂其志旣爲郎列在冗散而守郡無何時無所張設又不能盡其才嗟夫予讀其語而益足以徵大夫之賢也夫世祿貴胄之子習於紈綺乘勢席資騶呵輪雕冠危佩華以侈大相雄長不則務生殖程息受賦廣田宅爲橐中裝鉅萬及濡首搖尾於權途要津則囁嚅口語婢奴顏膝卽幸而延引必偃樓逡巡謝弗敢語之以圖籍詩書志操氣節匪所習也秦大夫爲公卿子可謂席豐履盛矣顧操約葆嗇折節好學居官守職不骫骳於法至與權貴人鈞禮抗顏談說是非以紓其所不平毋少詘卒齟齬於時以老而著述諷誦稱恂恂儒者無忝於端敏公之父而又有貢士中舍君爲之子是則可表也予不佞謹按狀最其事之大者而表之曰是爲有明姚安太守賢大夫秦公之墓世系配嗣生卒月日則具誌傳中

行狀

廣東按察司僉事致仕封中憲大夫澄江陳公行狀

陳大夫澄江先生卒之三閱月其孤憲副君繩管其經匍匐謁予不佞而有請也曰孤不孝卜期襄事先府君之藏有日矣懼無能闡揚懿鑠欲乞言垂信而計不朽然不欲侈辭彙牘效世之誣且靡也許太常先生爲府君同年長則銘之而兄爲孤通家兄則傳之其以狀屬子爲之地將藉手而聽命焉予惟先大夫與大夫爲筆研交旣同舉於鄉舉於春官及謝政還里居相比出入相從稱異姓昆季也予兄弟與憲副君兩家三人者先後舉於鄉舉於春官歸而居相比出入相從又稱再世昆季也知大夫莫稔於予者矧憲副君之請哀而誠其所撰述事行則詳而核也稍次第其語爲狀大夫諱崇慶字懋貞常之江陰黃邨里人也因自號澄江識本源之思焉其先世不知所從徙洪武初有泰一公者占籍黃邨里給部帖定爲民戶是爲始祖再傳樂閒公諱璿爲曾大父三傳耕隱公諱叔端爲大父四傳志槐公諱政配蔣氏生子三人大夫

其長也代有潛德世業農志槐公始通章句嗜義負俠節然寢好儒術大夫生而穎異甫能言時出奇警語志槐公喜曰先世力田作業無聞人而是子當以儒術起家大吾門矣攜之負笈從里塾經師授毛詩因居郡遂占籍武進聞名人學士所藏書所著文字輒假歸手自繕錄課大夫誦讀而模倣之程督甚嚴九歲能屬文卽令赴試孩孺未習見官府呵衛聲怯不入十二歲始克就試卽屈其儕伍督學使者安成張公大奇之錄置博士弟子員無何部使者天台葉公行縣試諸生大夫以垂髫挾策嫻於辭又大奇之文日益有名而蹶於場屋婁上婁不售志槐公以大夫業儒棄農僑寓廢徙不遑事生殖亡羨資具脯脩楮墨之費故程督愈益嚴而大夫亦愈益感奮砥礪於學嘉靖甲午舉鄉薦乙未聯舉於禮闈始成進士視政戶曹金陵梁公爲戶曹長馭下操急鮮所許可者獨賢重大夫與東萊任君萬里謂兩人者士之雋也謁選出守蒲蒲故秦晉閭都會藩封鼎峙軍民趾錯號難理大夫以精敏蒞

之批歎導卻迎刃解也州大治而聲聞聿起以其閒進諸文學談說經義操觚受業者若而人指授縷縷務中程軌所造就多彬彬茂異躋通顯者今大司馬王公開府督邊建臣虜之烈爲最著云都御史御史以治行高等列薦剡凡若干牘越四載召入爲戶曹郎時梁公猶爲戶曹長除目下喜曰陳生來吾屬有分吾猷者矣抵署甫三日委司潞河倉事事故重非資久而譽望隆者不得領是職同舍郎詫相語陳郎何自遽乃爾梁公其有試乎潞河當舟車之衝廚傳供餽之繁視置郵等故事設衙前名役悉取給焉下不勝其求因乾沒於庾廩之間鼠竄蝟集上亦置弗問大夫至亟罷其名役一切出其奉所入以佐費不足則取諸家以續之不倚辦所謂衙前者民無所苦而官蠹亦盡滌以去旣二十年而憲副君道經潞河父老走相迓曰何幸復見陳公子手額以相問訊也尋擢山西按察司僉事奉璽書督屯牧之政三晉地故守蒲時素所習者沿革善敗不煩期會次第而綱紀之雍容如也監司中號

藝苑名流者先後至大夫則相與切劘酬唱風雅蒸蒸起於簿書閒蓋不啻緣飾其治而已夷酋俺答者牧近郊雲中代郡新中虜而岢嵐道最爲要害難其攝者大夫獨請往往則修戰守之備堅壁耀兵以示不可犯旣虜薄太原孔亟重鎮巖邑分屬諸藩梟界畫而裨守之大夫屬平定州冒險就道時戎馬充斥烏舉颯馳患叵測或言宜少緩於行者大夫曰吾有分地責豈吾全軀時耶令邏卒登望且偵且行行抵界虜已橫過檐帷前才十里而近在平定如在岢嵐時爲三輔當藩屏一面與有保障勞功次已列上督府會大中丞被逮下詔獄遂格不敘頃之潞安道缺又屬大夫往而屯畱令某藉部使者侯公某爲奧援據徼乘邪而魚肉其民監司郡守心恚而目攝之莫敢繩撻者大夫按覈其奸贓狀上之侯侯屈於公議不得爲私交庇而兢兢於大夫弗已乃傳致入彈墨有縱容下人陵辱縣官語蓋指屯畱令云至其所攜摭者不能以毛髮巖也侯調銓曹待次久之事益白補廣東按察司僉事轄海

北道部雷廉二府時晉安張公某爲都御史宜春楊公某爲御史
巡撫其地雅聞大夫名既共事特倚爲重大夫亦朋心合力裨贊
之弗避艱怨會嶺東道缺大夫則攝嶺東會嶺西道缺大夫則攝
嶺西會蒼南道缺大夫則又攝蒼南嶺東西爲東粵非專轄而臬
司故無所不治蒼南者則西粵隔屬亦以大夫往大夫益矢勤秉
公以惠文彈壓之不謂攝潞安時得過屯畱有所懲而弛也而於
法有所縱舍前侯公某爲屯畱釋憾者以他事被罪遣戍雷州千
戶所人或謂此當修邳地也大夫顧益厚善遇之不以疇昔爲藉
芥令人前驅迓侯侯大慚按部入合浦彌望皆溟渤莽泆之區猺
蛋廬聚族居欽連境土比接無亭徼絕不可控制然民顛事簡僅
可以夷狄之治治也大夫抱隱憂計長策思以善其後者亦惟明
先幾持大體填拊之無所張設期於靖謐而已粵去輦轂下萬里
耳目寥廓吏茲土者得以肆谿壑之欲宦游語次則問橐中裝多
寡大夫矚然無所點也又凜然風裁人望之莫不動色相戒以無

犯者廉州守胡君某以故侍御謫遷爲郡雅負名而滂行無節郡
佐趙可旦者夤緣之爲奸雷州守林君某則稱循良牧大夫操按
覈之權於二守上不無涇渭於中某覺而疑之乃伺聞齎金帛爲
禮以嘗大夫大夫面卻之則色沮而疑更甚代御史楊者爲廬陵
黃公某而張公某移鎮它省以安成歐陽公某繼之趙可旦者與
黃同爲廬陵人而胡故廬陵令也兩人者日夜構大夫思所以傾
之而黃又爲兩人者所習會海南道缺故事海北道兼攝第文法
關會以遙制而已崖州判黃某子召釁黎方稱兵爲亂大夫并日
兼程航海而南撫其不從亂者而調發徵輸將剿其渠魁業上計
督府俟報乃下令而安南都統莫正中者不得志於國率妻孥款
關待命久不決風聞徙其族乃脇永安萬寧二州以叛踰銅柱直
抵欽州羽書旁午至大夫又并日兼程航海而北數千里以一身
提衡於其間前計後策左瞻右睠蓋蓐食而蓬徙也都御史御史
既入讒又慮兩地兵不解則以亂階中軍興法思所以委罪者其

奏劾大夫然不過借辭追責耳亦不能以毛髮讎也及奏下則永安萬寧二州平而黎方之鹵獲者綏定者舉不出大夫所條畫二公意大慚而大夫則以無罪罷聞命治一日裝卽行過曲江所部郡縣搜訟緝贖緩之羨者金二千追及之拒不受粵畜產殷盛貨饒甲天下而大夫垂橐歸其宦時故無產可減又不能以官爲家敝廬瘠田未嘗飾一楹拓一畝且不習持籌責息高其貴至於見它所隴斷權取以牟利者恥更甚寒薄儒素恆闕薦歲資蕭如也以圖史諷詠自娛時課農種秫於田閒供釀事清閒之燕則撰杖屨從志槐公游或偕四三縉紳爲社中飲甚懽卽里翁屢叟野衲山樵相與道故舊握手解頤竟日無忤容人亦不省其爲貴人者性慈惠馭僮婢未聞叱詫語給使令左右媚謾不譴者呼不至者輒任之憲副君稍嚴知則或加呵扶則曲爲掩覆毋令知也與人處坦乎油然而不設城府卽加以睚眦稍弗堪旋已釋而忘之無纖芥藏匿家居歲入無所贏衍而好施予賙人之乏屬緩急則傾

身冒嫌以赴之至於當道故人率無所造請或引大夫爲重借交居閒者不峻防以拒有所約已而倍之以爲利竟不較亦終不自明也志槐公素嚴晚更鮮當意大夫則委曲逢迎務得其意所適喪母蔣時爲諸生食貧殯藏之具不可以爲悅故垂老猶爲孺子慕言及之則淚淫淫承睫事繼母謝如事蔣志槐公與謝偕享大羞以終大夫亦已逾耆蓋衰麻在身時也而居喪致毀踰於禮教育二弟友愛篤至皆蚤世撫其所遺孤爲之延師擇壻扶掖之以底於成立視之如所生諸子女歲時伏臘率子孫問安上壽事大夫亦無異於父者寡嗜好不畜姬媵與唐恭人相莊白首也每齋居獨榻焚香禮佛旦日起盥漱誦內典數過而後朝食朔望暨如來善現之辰則茹蔬素諸所禁忌者持爲戒計肉食一月僅數日一餐不得過三簋非故爲嗇兼有所微福蓋澹泊精虔亦其性然爾憲副君故才又獨子意甚憐愛之不忍程督出入必與偕乙卯鄉薦己未成進士大夫喜曰吾在事陳力未久未足以報國今幸

有所屬矣且盡忠勵操而子未必窮困廉吏安見其不可爲乎初授廷尉平大夫往邸第視之旬月歸而語曰廷尉天下平也習刑章慎民命吾兒其勉之及奉檄慮囚蜀中奏牘至見有所平亭則忻忻然爲加七箸竣事擢守南昌府專城劇地強宗鉅豪憲副君一裁之以法大夫聞而歎曰嚴於疾惡銳於任事吾兒矢心力矣如嫌怨何滿考擢福建按察司副使時會囚方內訌戒嚴而副使轄海道專職也大夫則促裝而命之往曰卽軍旅未學甲兵非儒者事乎吾兒其行矣踰年憲副君以南昌之郟爲南臺省所構大夫卽移書於閩曰今之仇隙向所慮之嫌怨也第不忤此心耳安能強諸命乎且兒馳驅四方有離憂而今則聚樂矣吾且老而父子朝夕寧不大愉快哉憲副君歸而拮据生產爲甘旨之奉燕處行游未嘗離或各赴他所則兩遣使候訊者踵相接於道抵家雖丙夜必面乃就寢憲副君先以廷尉平最績上狀詔復大夫故僉事致仕旣以南昌守最績上狀誥封爲中憲大夫唐爲恭人顧所

得制詞云云榮重矣而大夫則自念歷官中外皆格於時勢未及微寵貶封於父母黯然有遺憾也好讀書自幼學至壯而老手一編未嘗一日釋工於詩文然不喜雕鏤鉤棘第陶寫性靈發抒理奧而流麗雅馴多所自得語善行草尤精於小楷卽倉卒注記必嚴整不苟所著集三十卷詮次成帙曰鹿墅迂農稿晝所爲夜必疏識以籍積四十年凡一百卷曰惜陰錄憲副君請梓大夫笑而曰兒不見詩文之行世者乎不堪瓠覆徒貽木災吾固率吾意以愉志耳不願諛聞以采名也乙亥燬於火不傳精英所萃還之造化斯固大夫志也而憲副君則以請之不堅爲恨卒之前二年偶思通鑑綱目命購坊中本句讀之憲副君微諫曰得無耗目力乎卷甫終而目果病眚冬因浴而蹶心復病悸遂迷惑起居之常唐恭人與憲副君善爲調攝病益日以平辛巳秋復以病痰竟不起蓋七月二十九日也距其生弘治丙寅正月二日享年七十有六先配王宜人處士王翁蕙女蚤卒繼娶唐恭人處士唐翁厚之女

生子一人卽憲副君紹登娶王氏封恭人山西汾州判王翁守謙
女女二人長適郡諸生劉大雅蚤卒次適邑諸生周師旦孫男四
人長世亮聘無錫太學生吳君申錫女次世廉聘無錫鴻臚寺署
丞秦公棨女次世雍世京俱未聘孫女三人長適邑諸生趙百鑑
次適吳近道次未字憲副君以萬曆十年正月一日庚申葬大夫
於黃塘祖塋志槐公之兆予不佞不文無能爲大夫重第附子姓
之誼嘗竊窺大夫慈祥夷曠操潔履方稱寬然長者而亢宗於前
貽穀於後施於官而不負所學飭於躬而無疚於其中蓋於國稱
良也於鄉稱善也於家稱孝慈也庶幾乎石奮之馴謹劉寬之仁
恕陳太邱之風誼焉卒之日無問識不識咸爲之咨嗟歎悼者謂
鄉先生沒而可祭於社者非大夫其人耶故於憲副君之請不敢
辭謹采掇其所撰述者具如右至所以不朽大夫之名於幽而垂
世之式於明者則於銘傳乎徵焉

傳

大司空曹公傳

蓋我義興山川苞絡風氣龐茂生其閒而孕秀鍾靈可以間一代
師百世者是宜傳也然剛柔強變各得其資之所近而不相襲也
有得其厚者有得其介者得其厚則含媚韞輝蓄汗茹垢令人就
之溫然若飲醇浥河不知涯涘得其介則持廉厲隅砥石立壁又
令人望之儼然若渟淵峙嶽稍隔町畦厚恆易與介或寡合正未
可以軒輊語也作大司空曹公傳公諱三暘字子泰別號雲山先
世居句曲有隱德至宋徙義興新市里而起家則自王伯考珂始
再傳而公則嘉靖閒舉癸卯京兆魁成甲辰榜進士授大理寺評
事据律絜令以佐廷尉之平文無害尋轉左寺副右寺正歷兩考
守漳州再守濟南皆衝劇更歲祲藩封驛騷甚也稱治行高等兩
郡六載如一日晉湖廣副使旋改山東督學副使爲鄒魯師教化
大振彬彬表東海矣晉湖廣參政浙江按察使江西左右布政使
持廉矢公毋少阿徇至帑藏之出納尤謹衡量必親胥掾無所緣

而爲奸晉順天府府尹所轄在輦轂下闔瑤戚晚交關請託旁午至公絕弗通有犯必寘之法畿甸一清任久幾三載矣出撫雲南鎮臣素驕悍公裁戢凜凜稟約束爲之奪氣屏足不敢逞晉南京刑部侍郎致仕尋復以薦起改南京戶部侍郎督軍國之儲清糧給餉軍民賴之晉南京工部尚書率屬舉職尤多綜理節縮之功焉公以明經登第歷官三十年階二品馳榮三世所至崇卑中外無問錢穀刑名師帥填拊之任暨盤錯震撼紛糾微暖之交諸艱歷試隨施輒效所稱文武爲憲社稷是毗者非耶與呂夫人媿德長世令終同歸子孫克家顯融代所稱達尊有三嚮用惟五而全昌備祉者非耶邈原探本雖繇先世隱德無亦山川靈秀濬發於公之身乎公修髯癯骨炯目莊容素不習脂韋而耿介凌厲之氣見於眉睫其行履勳庸詳誌狀中不具論論其大者公自通籍筮仕廷尉既歷兩考法不當守郡卒守郡以忤時故既守漳以憂去會服闋需次業當補建昌不得補卒補濟南以忤時故自漳而濟

南治郡又幾歷兩考督撫朱公衡特疏請畱視本省學不報以忤時故治京兆三載久者法不當開府乃卒開府又滇也以忤時故既在滇報滿晉南少司寇復以報滿不合新令彈射者承風指論劾至以誑誤免公官以忤時故後以薦起晉南大司空會江陵奪情不奔喪諸附權獻佞者連篇累牘公卿皆唯諾恐後獨南九列不具疏以公與麟陽趙公錦力持正議寢其事則又以忤江陵故而公固已上章乞骸骨矣藉令公委蛇於其閒不難碌碌肯易皦皦稍受汶汶亦何所往不爲愿而遇合以終其身哉是時予以伏闕編戶婚姻家懼禍引嫌有既訂復解者而公則尋盟納采予謂公固功成身退獨不念公之子在豹尾羊腸閒乎公曰否否子以身徇綱常而我之子顧以官爲趨避我豈老而諄哉矧得不得有命耳其不枉道逢世類如此公歸而爲政於其家井井條畫庭闈之內雍乎肅如也尤爲德於其里邁饑饉之歲設糜粥於衢市全活者數百人族戚貧乏者賙卹之藉以舉火者數十人然公亢爽

峭直其性然也而進不隱賢退不干名持己處人雖斂鋒鏑直露底裏絕不爲輒詞媚色及象恭僞讓人有過而譙責之無所諱事有不平扼腕抵掌剖別是非卽監司守相無所避接賓客無務自貶損視其等以爲差名稱座向卽貴游顯人不少假借門無燕僻之朋口無媒媠之語至市井鄙瑣則望望然去之若將浼矣以是鄉之人多樂就其閭閻可近者無不曰曹公固落落難合云夫孔子思狂狷次矣乃於鄉愿有深惡焉夷惠不同道孟子表而出之兩稱聖以風世廉頑立懦與寬薄敦鄙者曷嘗有優劣哉世之下也削觚爲圓黨同伐異務流通而薄信果尚和好而毀方嚴模稜首鼠突梯絜楹者見謂厚而亢爽峭直者絀矣彼光塵可同汚流亦合闔然在鄉愿中而欲偃然出狂狷之上自謂中庸舉世且謂甚盛德不知生孔孟時當何如惡也予懼夫鄉之人有愿心或有異喙而爲之少軒輊於其閒故論夫介者厚者之宜並傳也若曹公者庶幾師世之風不求同於俗而同於理者哉而予之傳曹公

者亦庶幾蓋棺之論不斲信於今而信於後者哉嗟嗟古之愿也鄉今之愿也朝不愿則仕不達而落落難合如公者孰若由由與偕可以援而止之而止也孔孟不云乎鄉人皆好之不如鄉人之不善者惡之善斯可矣德之賊也此聖賢品隲之衡也曹公子曰司勳氏與予同舉進士今參閩藩政樸茂淳謹鄉之人更交口委心焉蓋公得其介者而公之子又得其厚者高明沈潛世濟其美矣

奉議大夫南京大理寺寺丞仁齋趙公傳

夫世之愛憎予奪至難必者人也而福善禍淫施報之常所可恃者惟天耳至於天且不足憑而紛綸糾錯莫之窮詰宜禍者富貴壽考宜福者并其年而嗇之此其權衡或自有與世隆污不可圖度者若天之報施趙大夫何如哉作趙大夫傳大夫諱應元字文宗別號仁齋陝西涇陽人也性伉直不善脂韋蚤歲以明經舉進士筮仕令蜀之華陽再令洛之邠著績繫思二邑百姓至以天呼

而尸祝之徵入爲浙江道御史按遼陽無何以憂歸起改河南道
按湖廣湖廣柄國者怙寵擅權勢燄熏灼望頤承旨者如雀之叢
蟻之羶也公一切裁以法無所假借持斧行部縣有令一人貪肆
不檢法當罷以善事柄國者爲奧援莫敢誰何公首論之去柄國
者已銜之矣會柄國者戀位蔑倫杖戍諸上疏者舉國洶洶越明
年暫假歸所過州縣無不高廠清道望塵負弩矢以迎卽中丞侍
御藩臬長有脇肩夾轂而趨者無論遠近咸枉道旁午會葬悉如
期無敢後先公是時竣事還朝遇諸塗柄國者私語曰先人事當
借重公公正色應之曰御史以復命行無迴車返境之體輒謝之
去柄國者益銜之矣公行次汝南埋其輪引疾乞休疏云臣旣不
能秉公持正扶國柄於倒置之日又不能黜奸嫉邪報聖明於多
事之秋意蓋有所指也臺長某希柄國者指劾公有所託而規避
竟削秩歸里公固忻忻安之居數年杜門課子而已柄國者敗諸
附柄國者以次罷詔起言事及被抑諸臣復公官河南道而予亦

蒙恩賜環始與公識及一再與公語疏節勁顏絕無昵色縟禮至
於議政務辨官材則娓娓不休而伉直之性不以旣困少貶也且
謂千載一時思所報稱卽有牴牾不復顧忌會諸附柄國者驟失
所憑依朝政暮刺蔓引株連人心皇皇而國體傷矣公疏請以大
計付之內察聽之公論去畱定則紛紜可息當事者不諒公謂公
欲借此復睚眦逞胷臆疏上格不行而其爲比附藪者更深銜之
矣公先在臺中積資著望久旣從田閒起謂當以不次待公而公
復以伉直不善脂韋故回翔偃蹇始得升大理寺寺丞又南京也
命甫下而公竟以寒疾卒時傳公應禎以名御史忤柄國者從戍
所起久之晉秩如公官居無何亦卒與公事略同嗚呼豈非天哉
豈非天哉予獨慨夫世之人博驩干澤至舍己以徇人曰人顯融
我也不然一失路輒尤人曰人擠抑我也而柄國者又且以勢能
齟齬權足升沈貪天功以爲己力曰某我所用也某我所舍也凡
此皆闡於天人之故者也以予所論著趙大夫事自通籍就列二

十餘年其伉直不善脂韋蓋其性然也一不合則罷斥而不用再
不合則淹滯而不得大用彼柄國者之所爲頓挫趙大夫者獨官
耳若其時不與我天不假年命甫下而身逝此亦豈人力也者而
又何所尤乎夫蓋臣正士以身殉社稷社稷苟利身不遑恤亦求
仁得仁存順沒寧耳視富貴壽考真不足以當一瞬然其身之進
退存亡有關運數可卜隆汙故帝賚則嘉靖殷邦天壽則保乂王
室蓋佑助忠賢卽其佑社稷豈不尤大彰明哉趙大夫之可以用
而不用旣用矣而復不用人也天之未定者也無足怪也卽不用
亦可以不死乃竟死非人也天之宜定而不定者也烏可測
也嗚呼柄國者獨能以爵祿予人奪人榮人辱人而亦豈能必天
之生死人若曲徇其意而巧合之也此可以破尤人者之惑矣雖
然天亦何嘗不定哉趙大夫遇合甚奇而以坎壞終然垂聞不朽
取數旣宏予不肖再起再廢爲世所指斥所欠者死耳公幸蓋棺
予方銷骨又安知夫死者非天之完其名而貽以安也乃其子慷

慨慕義文采足自表見不遠數千里而長跼授簡屬予傳大夫事
此其意嚮固非隨世趨者有父風矣趙氏之裔其昌乎語云天之
報施不於其身必於其子孫予姑論其未定者以俟其已定者而
已矣

贈刑部主事王公傳

王公者諱某字茂齡山西汾州人也以季子光祿君之貴贈爲刑
部江西清吏司主事然人之追想公者不以其贈故而猶以今之
贈且未足償其德也光祿君以宏材邃養敷歷清時顯揚當世然
人之追頌公者不以其子故而惟以公之德然後能成其子也汾
州古晉地名都沃區代不乏大儒卿而方輿稱鉅麗焉公先世鳳
陽洪武初以戰伐功爲百戶調任汾州蔭承十數傳至公之大父
謙謙生瑄瑄公之父也進武略將軍業振振光大然未有以文學
興者而公之子績文種學用科第起家其訓誨勗闢之功實公始
公性剛毅凝重其視身制行質直方嚴不習於媮阿不沒於藻績

遑然有古賢達風焉好施與賙卹里閭中之窶乏者故人莫不庇其惠及里閭中有忿爭紛鬪能以一二語直之卽忿爭紛鬪者渙然釋鞮然服也故人莫不稱其平處汾衛察案仕伍閒傾心矢力扶助之上下悉倚公爲重故人又莫不服其義至延師教子尤善於端蒙養慎導習仲子緯季子緝皆在齟齬時凡所以誘引督成者罔弗至卽攜之游觀古昔諸祠墓必指示使閱歷之謂曰某祠某墓某大儒也某祠某墓某元卿也其流芳遺蹟猶足以繫於百世之思子知心豔之果能力勉之乎然躬儉約清謹不以名都沃區俗染靡侈使世襲統綺而移其子之視聽也故仲子緯歷縣令歷州大夫在在皆著聲奏績而季子緝方且躋崇陟華秉樞熙載爲社稷策勳庸以繼公欲爲之志發公未究之緒夫豈偶也哉於是汾之人稱王氏爲德門蓋以其善積又善教云公生於成化某年某月某日壽五十有七隆慶戊辰會今上冊立皇太子覃恩公得贈今官配安人張氏端淑勤慎其婦職母儀別見本傳中子三

長經仲緯甲午鄉薦舉高第以武定州知州致仕季緝己未進士今光祿少卿孫男女共若干人公行履悉誌狀者不具悉而獨指其善積善教及以文學科第起自公公之功不可誣也天之佑善未艾則公之食報固未已然予則懼夫世之人於公也謂因其子之貴而尊因其子之賢而顯而不知其子之貴且賢者出自公之訓誨勗闢有由也故爲之論著其大者以傳焉

史氏曰子每與公之季子光祿君游見其器識涵淳淵源邃密自爲教官於郡學於國學暨歷諸曹事其施爲注措屹屹然建樹弘碩社稷之勳懋焉及考方輿志尹吉甫祠墓在汾陽吉甫爲周卿士左右陳行宣力就緒光祿君殆今之吉甫歟卽古大儒元卿奚讓焉豈其齟齬時得從公指示閱歷豔而慕之故勉而及之者歟語云教誨爾子式穀似之公之功孰謂不在社稷哉

王母太安人傳

自昔稱婦行不踰閭而女史之不列於世也久矣左氏書取多志

繁而所記者蓋自介子推之母之外叔向文伯爾而劉氏傳又特著夫奇節殊行其於庸言懿德足以風世軌物者或略之夫閨闈者教之始也女史之不列於世則何以教焉予嘗從史氏後覽古今載籍介子推爲晉賢臣馳驅王室厥功懋矣至處名位之際善辭避蓋其母實成之而介母汾陽人也乃今竊有感於王母張安人云張安人者贈刑部主事君王公某之配今州大夫緯光祿少卿緝之母也安人父諱祥母段氏出名宗巨家安人性貞靜淑閒溫惠慈穆在室時與凡育異質跬步不出閫閤外笑語聲卽父母竟弗聞也及歸主事君主事君母甯氏持家嚴乃安人事姑愈益謹相主事君操井曰親織組夙夜供婦職見仲子緯有粹質命之曰家世襲武胄未有業文事者爾曹其圖之因以治生屬長子經而爲之延師傅市經籍以教緯程督之有法夜讀書安人篝燈火紡績勸率之有常稍長則令與郡邑諸雋彥游安人詢知其子之所與游者某某而又詢知其所與游某某者果雋彥也乃心則忻

忻喜及緯舉嘉靖甲午鄉試聲稱籍甚乃心復忻忻喜不喜其名之既聞而喜其學之有成也戊戌主事君卒安人爲經紀喪葬合禮度時季子緝年十二尤有粹質安人識其器能大受遠至也茹辛攻苦教育愈益至令就仲兄學學成舉丙午鄉試乃命仲子緯曰兒可仕矣仕爲鄆陵令己未奏最績升武定州知州州民饑仲子適至所振捋還集者百萬人上下稱賢能嘖嘖一口安人顧謂曰民饑而活之易功成而能讓之難子其知所處焉季子緝亦於是年舉進士安人則又益忻忻喜曰兩孤黿勉豎植而吾得觀其成庶幾哉可以光門楣報夫子矣遂就養如京師會季子授吉安府推官以安人老且疾計南北殊風土且弗便道路拜命而行則恐貽親以勞辭綬而歸又恐重違親之志卒上疏陳情改教授懷慶舉世計階資較涼炙孰不願策足要津者顧視之蔑如也壬戌升國子監助教癸亥升戶部福建清吏司主事安人朝夕依焉一食飲居起未嘗離也甲子秋仲子判廣平府事以入賀來京師母

子兄弟相會聚融然樂也已而潸然語曰憶昔先大父臨終孫子女甥若干輩受遺語語願未嘗它及獨謂我性行良淑當有佳肩以振吾宗迄今五十年茲爾曹暨植其由來者漸矣尚當矢忠盡孝圖所以報上恩承先德者毋替也時季子當督稅河南山東安人乃就廣平之養至廣平三日卒距其生享壽七十有九歲既卒之明年乙丑啟贈主事君之藏合葬焉越隆慶戊辰得贈母安人云綸章榮錫汾之人莫不傳羨追頌相與咨嗟爲累德訓子者勸乃知大父武略公之遺語非謾詞哉今仲子致政居家季子以才望歷戶刑兵三曹而兵曹司職方事職方事機務繁重當其時北胡乞封貢西南粵又時時傳警息羽書邊檄旁午至職方晝入司理案牘夜則操筆具疏奏無不中窾卻稱倚任者勳勞在社稷甚崇鉅茲晉秩光祿寺少卿而其所以居功讓績者每逡巡辭避焉夫光祿君之勳勞固非介子推之馳驅可同語而善處名位之際稍似之蓋自其筮仕就教時恬於榮進也固如此其卽安人之所

以告武定者而善體之哉是故安人之庸言懿德足以風世軌物者宜傳也豈汾陽前有介母後有王母山川靈淑歷千百年間僅於二母乎鍾之孰謂古今人不相及也有操觚擲管者出而補左劉之缺逸使女史得列於世也當采擇論著之以傳焉
尤母程節婦傳

嘉靖閒吾郡有尤大夫者以文行名於朝而位不配望年不滿德歿之後妻孥無所給煢然窶也予嘗卒業南雍獲與大夫之子鏜游鏜飭躬力學能讀父之書而好爲古文辭乃今見其所爲母程氏狀而悲之程母者其先系著姓於徽以業賈流寓而占籍於錫云諱徵蓋其父林泉公母華媪禱於句曲神而生者爲尤大夫副室副室之聘乃出錢恭人圖宜子者居無何生子鏜則進之錢恭人爲子若匪自己出者大夫廉於官錢恭人勤於家母則以身佐之一切泉布膏薪筐篋綆缶米鹽烹飪之務拮据爲勞辨色求衣晨晷未遑食期於辦集當意指而不使大夫與錢恭人知也大夫

一旦捐館舍其宦時故無產可減扶輿垂橐歸而先世所遺恭人又取瘠田敝屋讓其腴者華者於仲歲屢侵以媿婦孤孩支持門戶縣官徭賦靡所干貨產益落而橫侮齟齬戚族過而弗睨也盡鬻簪珥荆布以易粟粟弗辦繼之以菽豈即得少鮭菜給錢恭人朝夕而母則與臧獲并口而飡力作以爲餉木絡草實時時齒頰閒矣子鏜幼善病母則禱球之曰此尤氏如綫息爾脫不諱何以慰恭人而誰爲烝嘗主者鏜病良已而鈍廢學母則恚責之曰孰謂而父有而子耶若不肖我異日何以見先公於地下而今且貽恭人羞手緝緝爲楮墨資且暮慰勞晨霜夜雨篝燈熒熒淚淫淫也此其辛楚蓋百千狀矣卒之顧復誨督俾其子成立而後已夫古稱沃土之思善難於瘠也子竊謂不然夫子不云乎貧而無怨難士大夫談說理道居恆以節義廉恥自矜飾而震撼閒關或窮愁無聊久之則屈身汙名鮮不以弁髦視之者非精誠性篤金石爲貫亦烏能苦而貞窮而益堅乎此解衣伏劍之難孰與夫十九

年不屈數千里成仁爲難之難者也嗟夫尤氏母之節傷哉貧也食淡攻苦甘荼支憊凡二十三載未嘗獲一日適矣其幽憂隱痛積歲累時殆百折不回撫其五尺之孤以殉尤氏一抔土履素蹈變疇然貞白之不渝令聞完德迄於蓋棺以終其志也可不謂難哉予故悲尤氏母之節之不易成也今天子誕嗣覃恩方下有司修忠節孝義之事若尤氏母者格當旌觀風應詔必采擇以聞矣其世系孫子具趙常熟誌中而予之言則最其大者以傳聞幽而垂式於明也亦以諷夫士之屈身汙名者吳子曰詩云刑于寡妻思深哉尤氏母矢志持躬克全其節以遜於倫也盍獨其性然哉夫亦得於教者素也尤大夫之廉與錢恭人之讓蓋其教於家者足以風矣今其子恂恂被服儒術從世之賢豪長者游至圖所以不朽其母於予與趙常熟二人者皆無當於世者也然其志可知也

賜餘堂集卷十一

賜餘堂集卷十二
墓志銘

封翰林院修撰儒林郎雪窗孫公暨配劉安人合葬墓志銘

春坊庶子兼翰林侍讀孫君以德服官邸中奉父封公諱而歸抱
疾里中又奉劉安人諱兩殯累累三載總總計所以藏親魄者卜
地而得吳縣師家嶺卜期而得今年三月十一日壤吉時良以襄
厥事至其闈懿揚徽納諸幽以不朽其親之名者則不之輦上鉅
卿而之田閒畸人介予友尤君操一輦走百里儼然造予不佞而
請也不佞慙不能諛世亦不能諛墓何敢承踞而辭者再以德稽
顙而懇者三垂涕而語曰吾父樸於世若遺吾母病於世若夢事
行稀簡卽不肖狀吾父母無所稱說以飾聽聞何敢諛及受狀讀
之約而核質而不誣味糜飲冰一言一淚嗟嗟卽其狀不諛親而
復委志銘於不諛人者不佞不忍辭按公諱臣字國英雪窗其所
自號也先世占籍之繇無所攷居雙河去邑五里祖諱禮父諱友

諒稱守益公始入郭而婿於陳家本業農至守益公乃爲秦越人
醫眎痘疹察脈色凶吉屢驗奇中生封公凝靜秀穎寡言笑束髮
負笈從鄉塾師受毛詩顧以貧不能具修脯業未竟棄去更從守
益公受岐黃書又以貧不能游長桑君飲上池水而視見垣也業
未竟亦棄去橐已罄懸家徒壁立傷哉公之貧也室於劉劉翁媪
家小饒時時佐以縷絲斗粟而公則舌耕筆傭粗糲朝夕亡何守
益公物前室劉安人繼物公以七尺軀奉一嫠母煢煢子子其囊
甚嗣室於劉今劉安人不若前劉家小饒而所以佐公者則僅以
十指又亡何劉安人不幸病癘陳母不幸病瞽婦姑委頓男女孱
穉艱楚備歷事有無聊其窶甚而其爲困愈益甚以德齒漸長文
漸有聲推擇爲邑諸生明年閩施公守郡校士拔置第一自以爲
吳公賈誼馬帳彭宣不啻過之又明年江右謝公督學校士復拔
置第一聲籍甚遂舉於鄉連舉於南宮廷對擢進士第一公始大
愉悅自詫非望此揚眉解頤時乎而猶然隱衷摧腸痛其母之有

孫逝而弗見其成也又痛其室之有子贖而弗悟其貴也傷哉公
之心也以德守詞林則安車迎父母於京以德充節使冊藩封則
乘傳歸父母於家旣竣事報命則自沐省父母而公時開六表初
度與長至日會召鄉里父老置酒高譙陶然樂也樂舉子之觴更
樂得諸公卿之言謂蓬華琳琅光陸離足快耳蓋雅好文尤好少
陵詩能誦至通帙而屬以德丐名人墨士書箠幾於滿篋自其性
所嗜云公茹辛攻苦三十年而一旦遭遇逢適固易於改度以明
得意公夷然泊如也乃以德狀公曰可逝可欺未瑀未琢無懷葛
天之遺爲質曰飲淳忍汗親故無失殯劉安人翁媪勉有亡爲
厚曰歲時享祀恆飲泣而克復祖墓之夷於豪者爲孝曰務爲恭
謹遇田畯邑子禮必鈞不以長挾不以貴矜爲讓曰家貧未嘗干
謁人子貴未嘗造請府縣爲介曰衣不蔽肩食不充腹至老處腴
無華腆之好爲儉曰恥爲冠蓋交章布而徒整躄行道上無識其
爲封公者有以譜系通則謹謝云吾不爲崇韜有以婚媾請則謹

謝云吾未有弱息有以臧獲投則又謹謝云無所庸而令我損入口餉以飽若曹也為慎而好禮嗟嗟他封公席資乘力一命而車上儻脂膏田宅魚肉間閭視公不大羞汗哉至以德之狀母安人曰井曰什一莞篲什九自不肖有知時猶見吾母夙而興夜而操作奉姑以順相夫以勤教子女以義方不以姑息就塾師讀則私課之不肖偶受鄰媪飯則痛掠之無少假借蓋吾母之嚴足以佐吾父之慈也拮据為生銖累纖積志鬱鬱弗伸卒以食貧用訕瘁於心力病入膏肓始橫發不可近既稍定亦復起樓居蓐食者若干年蓋其閒迎養而非嘗一櫛沐遭喪而南更一縫紉若少閒者而總之抱痼負沈一切昧昧獨不昧於卻醫藥不肖以醫藥進則日夜哭井卻食飲矣竟瞶瞶而切此非不孝而無天之效哉不佞反覆其狀而泣然悲也又反覆以思而輾然釋也語有之十年樹木百年樹德夫樹德不猶之樹木乎既植既培若置若棄能順木之天以達其性耳而旦視暮撫皇皇焉以斷蕃碩所樹者淺矣坤

為陰而積善餘慶之文繫之蓋樹德而不求知於人不責報於天斯其德亦為陰則美含而施大光本朝設科以來吾郡以鼎元起家者自以德始厚衍濬發窮本遡源意其先必有深仁懋德基之數世而其父母尤必有奇徵異術炫於一時今公與安人行不踐迹善不近名寡營絕爭含淳抱樸而空乏其身拂亂其心殷憂多難矣壯無生人之趣暮無貴人之享媒媒晦晦若斤斤臃腫與居鞅掌為使庚桑畏壘之民焉茲為允積厥躬靈承於帝日計不足歲計有餘其所樹者深耶寧詎人不知即公有不自知者寧詎公不知即公之子有不及知者嗟嗟有意而為雖善必粗無故而獲俾昌弗熾天之報施其猶酌耶注焉浥焉其權衡固不爽者耶則公與安人之貽休食報當未艾也公生於正德辛巳十月初五日卒於萬曆丁亥九月二十日壽六十有七劉安人生於嘉靖壬辰十一月十六日卒於萬曆戊子十一月初八日壽五十有八子一即以德名繼皋初授翰林院修撰滿考封父如其官封母安人前

母以乞恩特贈安人故得並稱安人云以德以會典勞晉今秩娶
曹氏翰林院四夷館帶俸鴻臚主簿江陰曹公駕女女三長適劉
士元次適陸士奎孫男三長某聘湖廣提學僉事文谷鄒公迪光
女次聘故邑學生賡虞華君師皋女次未聘孫女五一字太學生
邗川秦君格子延杰一字烏程故工科給事龍山董公道醇子諸
生嗣茂一字太學生聯芳王君德醇子某一字常熟光祿寺監事
徐公尚德子某一議字郡學紹華吳君桂芳子某不佞既爲志而
系以銘曰

榛榛狉狉邃古則然世降於漓人削其園公拙而樸母痼而顛惟
樸惟顛其天乃全得全者昌餘慶斯延備茲純白還彼黃玄無爲
而爲大美不言我之銘而辭亦支焉

資政大夫兵部尚書兼都察院右都御史蘇公墓志銘

代

世宗皇帝神聖文武綜覈治理維時內外臣工罔不晝夜兢惕矢
力供事求稱職道責爲難而職在邊陲有封疆之貴者尤難蓋變

故叢生事幾立斷而以身驅馳於其閒弘濟艱大克戡任使非
長材偉略弗能也然而天之純佑國家篤生賢哲往往有瑰奇椒
儻者出而旬宣屏翰焉若蘇公穀原者實其人云公嘉靖丙戌進
士自受百里之寄以至登八座之榮凡轉遷十二秩歷敷幾三十
年蓋兵戎煩劇之司居多而其注措經營勞動功略固有爲人之
所尤難者乃史于氏所爲狀則備矣按狀公諱佑字允吉號舜澤
更號穀原世爲東昌濮人公生有異徵有奇質卽少就塾師及稍
長補郡弟子員人咸屬以鉅公名世居憂時王夫人殯在室寇流
劫至郡郡人咸走匿而公以死守竟不避蓋於未過之時是有弟
回之節遭猝至之變迄無苟免之思其本植淳厚操履堅完此可
以覘公梗概矣初爲吳縣令吳故稱難理而吏胥慣出入案牘爲
奸更飢餓莫測公至以儉樸矯俗以精敏勵治按籍稽民之戶產
以均徭役徭役遂平而摛弊搜隱手下獲上旣三年奏最考成矣
而以周夫人喪去服闋補東鹿治東鹿復如治吳首下車卽財罷

徭車三十輛釋繫囚之宜釋者數十百人先是民有昵妾殺妻者法當死而逃久弗問竟捕置之法僅三日耳而善善罪罪莫不蒙其惠愾其明焉以故吳之民有弗諉之思東鹿之民興何暮之謠云績聞召拜廣東道監察御史御史時風裁獨持聲聞蔚起既奉命按宣大適當軍士變殺總帥李瑾羣起爲亂乃議者謂瑾素虐所致蓋委罪死者冀息禍且脫負也公聞之憤曰瑾卽誠有罪軍士其可殺總帥乎名義蕩滅烏容姑息爲立狀上請討先皇帝覽疏曰御史固忠悃若此遂遣將將兵往問罪而卽以御史監軍軍至城中人惶惑不敢下公宣諭以朝廷德意因與鎮撫王寧約令首惡馬升楊林者斬其黨黃鎮等傳首出獻殲其渠赦其脇從反側聿安紀法大振是役也變起倉卒勢濱險殆急之則益亂緩之則長奸轉移呼吸之頃安危繫焉而公忠義激烈處置中窾卻卒不動聲色而收平定之功此豈可與尋常守尺寸者道哉繼按江北又繼按山西歲大旱疏請發司農金振貸饑者築石隄以障河

患民至今賴之還掌河南道升副使提學江西標塗樹準甄德晉良至其所獎進評騭莫不協輿論當士心者擢參政山西績效愈彰聲益著乃晉大理寺少卿旋又晉都察院右僉都御史巡撫保定保定當孔道且爲京師右輔而巡撫得專制境內事公乃布德綏惠裁冗節費圻甸藉保釐之澤焉又晉都察院右副都御史巡撫山西山西寧武關者要害也城圯久弗葺公至督吏士城之已而虜大入公方在廣武或謂宜退保鴈門公亟下令誓師申言退者斬虜竟不敢犯公凡三至晉威德素孚勲勞更茂己酉召入爲刑部侍郎已改兵部無何會總兵張達沒虜推廷臣才望者往遂以公兼都御史行總督宣大事虜薄京師公入援斬獲數甚眾上疏條列戰守計疏略云虜酋所部直宣府大同卽套虜東入勢不度越二鎮則偵報守禦宜以大同爲先仍令各鎮預簡騎卒以備擣虛假套虜渡河則西邊士馬直擣巢穴虜必不敢長驅又請發帑藏儲糗芻練精銳乘機大勦決一勞永逸之舉旣而虜使乞通

貢互市公復言宜外示羈縻內修武備時議朝論咸韙之不兩年虜十萬眾果夾大同南下公提兵馳赴至永堡與虜遇躬擐甲胄親冒矢石戰五日斬獲數更甚眾捷奏升兵部尚書公職在邊陲任封疆之責者十歲所屬兵馬訓將士悉心忘軀奇謀勝算以故虜每至每得摧敗去永安堡之捷民立祠祀之而宣大思公戢亂貽安之惠亦至今尸祝也甲寅得致仕業已去會幕府者失事則論公先不請兵餉致虜患然公實數數請奏贖具在也而時宰故有卻陰銜之竟削籍隆慶丁卯上卽位詔予冠帶戊辰冊立皇太子覃恩詔復公官職公體貌魁岸蘊蓄深厚震撼盤錯隨試輒效然不爲峭厲就之又和易坦如也在吳縣三年未嘗市一縑巡撫山西時計贖金六萬兩毫髮不自點初咸寧侯貴寵出行邊請以首功一級爲公少子官公謝曰吾兒不從軍不敢冒功其廉介類如此知人善任使爲政得臨下體及督戎又得馭將法若今馬芳劉漢輩起自行伍皆公所識拔者故所至軍民愛戴而功業亦

表樹焯爍云自大同之役至山西營田奏功暨行陣閒斬獲凡數承鏹幣之賜而蔭贈封典皆特蒙優渥焉家居十八載與父老結社置酒爲懽而里閭戚黨之貧乏者恆多所周卹尤工古文詞善晉人字書百家羣籍悉臻玄解所著有三關紀要法家哀集孫吳子集解穀原詩文草奏疏迺旃瑣言等書存於家以辛未九月二十九日卒距其生弘治壬子七月九日享壽八十歲訃聞遣官諭祭命有司營葬事如制公居濮之北王趙之原始於高祖諱克明者克明子諱義公之曾祖也祖諱亮考諱恩以公貴俱贈如公官祖母某氏母某氏俱累贈夫人配某氏封夫人子男四長某南京光祿寺署正次某某皆博聞多菽彬彬然儒雅世其家孫男女曾孫男女若干人光祿君卜以某年某月某日葬公於新店阡奉狀走京師以志銘屬某不獲以不文辭因序公履歷并論著其時之所遭職之所司而謂公之所處者爲尤難則凡公之所能者當非庸眾所易及也卽其生雲霧覆所居而卒之夕巨星隕光徵異

凡種種則天之生公與公之繫於世也非偶也蓋所謂天心純佑
國家篤生賢哲特異公以瑰奇椒儻而使之旬宣屏翰者哉謹系
之以銘銘曰

濮姚之墟精英在斗公孕厥靈生也匪偶奮庸於時疏附奔走帝
曰休哉嘉績汝懋更稱循良去思何長入持臺憲王度肅將監兵
戢亂旋定勳勳敷教陳臬所至歷敷晉藩冀輔保釐開府威懷並
施民歌以舞擢副筦樞仕躋華臚移節於外靖茲邊土秉鉞專征
屹如長城克共有服爲國之禎安危攸繫天子聖明何以效之才
合於誠時艱孔棘弗遑朝夕誰其綏寧繫公之力列疏陳謨忠懷
曠識聲流靡窮施猶未極我思遺芳疇能與頌其形可毀而神不
亡巨星俄隕崇石斯藏琢銘厥幽副於太常

雲南尋甸府知府小泉吳公墓志銘

故雲南尋甸太守小泉吳公以萬曆壬辰二月八日卒於家其仲
子易學奉伯兄惟貞命操一葦數舍造予不佞而有請也則手其

先公狀踞而泣曰孤不孝所不朽吾父者敢徼惠於先生之言先
生其哀而許之而賜之銘亦惟先子之幸則又手其先母屠宜人
誌踞而泣曰孤不孝所不朽吾母者業已徼惠於今廷尉沈先生
之言先生其哀而許之而銘吾父亦惟沈先生之故蓋予曾辱友
於伯子惟貞而沈先生純父則予石交也予方宦拙里居尋復蒙
召乞休敬謝不敏久之既閱歲予乃營菟裘爲涸湖漁長人羣遂
遠文心益蕪而仲子則又奉伯兄命造予菰蘆中而申其請也辭
不獲曰異哉伯子之請於予也伯子之世睦里姻躋華都顯世所
藉以爲聲榮者豈少哉而予不佞畸人也爲世所數乃不難以越
境就我又不能以糜歲需我而必欲得予之言也允哉沈先生之
稱伯子親仁慕義慨然知節俠可尚乎至讀其所自爲狀太守公
之懿行隱衷纒纒然殫其詳矣予謹誌其大者公姓吳諱繼字汝
善別號小泉嘉興之秀水人太子太保吏部尚書默泉公鵬之冢
子也世系詳太保公誌中初太保公任工部主事時分理南旺未

舉子會歲大旱公曰此盜詎牧吏責乎亦水衡責也跪而禱於泰山澍立應因報賜且祈嗣焉是歲爲嘉靖丁亥戴夫人始有身明年戊子九月十一日生公於行署人以其爲申甫降云公生而岐嶷稍長益穎敏善記誦日得數百言甫壯能屬文間出奇語屈其偶甫束髮補郡博士弟子員太保公時漸貴重登崇臚而公益鍵戶下帷發憤力學入奉鯉趨出擅駿譽太保公甚愛之曰是佳兒誰爲配者諭德屠公應垓閎隆盛慎許可見公深器之曰是佳婿吾女當爲配者遂女焉公爲諸生就有司試輒在甲等然至省試輒不利壬子乙卯兩入彀內以二三場註誤落選則自詫曰丈夫卒不能自表樹乃至藉家蔭濫國恩耶及謁銓授秩補後軍都督府都事非其志也尋遷左軍都督府經歷故事府部不相轄而府僚或入貲或任子不繇制科起家率承望曹郎風旨猥自貶損諸曹郎恆蔑視倨待之公獨稽成憲持大體屹不爲動會考選軍職武選移文失格公正詞駁還曰此豈祖宗制乎曹郎爲色沮而諸

僚屬則靡不心服也既考最授階文林郎妻屠封孺人又推恩父母進太保公階光祿大夫進戴夫人一品夫人亡何太保公謝政優詔賜歸公遂請告省侍三年起爲南京宗人府經歷以穆皇帝登極覃恩得實授屠孺人進封宜人越一年升雲南尋甸府知府公復念太保公將開七表而滇遠在萬里無論尊鱸宜適而定省可旦夕違耶逡巡就道抵常山竟上疏得允致仕歸奉太保公夔夔怡怡承顏養志者垂二十年所太保公甚安之曰兒卽任王臣誰任吾子者與其勞於王事寧幹父蠱矣當吳氏貴盛時太保公肇躋三公首參九列仲子紹復以進士高第嗣起宦聲最赫慶緒滋昌而公也產自德門躬承鼎祚居家則恂恂循禮入仕則兢兢守官絕無紈綺貴介之態至於寡交際卻問遺餐藥飲冰恪守清白人咸稱公之操曰公肖子也及太保公以末年復邁漓俗門可羅雀室乃進狼當途虎耽羣侮蝟集名園鞠爲榛莽華屋疏爲黍離太保公且奄奄憊矣恐傷厥心祕不使聞而公也奉庭幃修容

而悅支門戶剝膚而憂寢棘茹荼橫罹艱苦人咸憫公之遇曰公勞子也公禠身謹飭宅心冲夷雖身歷榮瘁目擊寒暄強爾應酬坦然喜愠而隱微之中抑鬱弗能堪其所以禦侮定傾者公獨當之與公之伯子惟貞共嘗之蓋有不可告語人者矣公於文章詞賦一切裨官野史技菽醫卜之書靡不通曉而尤習養生家言自謂遇異人授以鉛汞變化之術密試之頗驗公卒之歲先於立春夜夢呂真人語之曰將以二月八日迎汝後果以是日逝噫嘻豈其博探遐舉蛻委神遊公自有不朽者在耶距其生享年六十有五至於不善奇贏而樂施予周急卹窮振饑掩骼凡所稱扶義敦倫種種可述者則公之餘也子四長惟貞太學生娶卜氏繼娶高氏屠宜人出次易學娶范氏側室俞出次時敏娶段氏次惟坤沈出孫男顯科茂科顯謨曾孫男兆姬惟貞等卜以某月某日葬公於某阡合屠宜人而窆焉銘曰

生也嶽降坳也仙游生而趾盛佳公子之流坳而揚休賢大夫之儔公嗣世美予銘公幽公之名偕予之言百祀千秋

南京戶部浙江司員外郎養默王公暨配張安人合葬墓志銘
予束髮操觚與王君用卿同爲郡諸生一時攻博士家言者惟君擅俊雅之譽其嫵色逸度烏奕行輩無不推遜之者而予則稱筆硯交矣亡何予對公車卒業南雍而君以選貢士至又亡何予守史局在北邸而君則以鄉舉士至試禮闈而出誦其文以示予予聽之終卷曰此可冠本房而首義稍不中格亦稍亞耳既張榜果列高等是年君以爲令去予則以移疾歸又十年予以編戶起君則以南計部尚書郎考績上走會予成均署中見君肉瘠體羸而神猶王也君故恃壯銳饒聲酒之奉予則諷以慎疾養生語既別復折簡規之曰丈夫此身何事不可爲杜康之甘朱朝之嗜無乃以身殉乎君唯唯否否僅易伏臘者再而君果捐賓客矣君兄子同寅從予游手次第其生平行履而請銘於予予固稔君之生而又愴然悲君之死何忍辭君諱國賓用卿其字養默則其所自號

云先世爲無錫人至西橋公徙居郡城遂占籍焉生贈承德郎奉
橋公配薛安人則君之父母也君以癸酉甲戌聯舉成進士初試
理得浙之孝豐孝豐故嚴邑土瘠瘠民多獷悍而巨室大豪恆伺
令之短長齟齬閭里君至以精敏振刷之斤斤持三尺無害不畏
強有力者爲之平徭均役一切辦治蓋其所衽席者務在單赤以
下耳故良士大夫與田父老能誦說之宅不無懷嫌修郤者矣君
又捐餘俸及嘉肺之羨繕繕城浚濠以固備禦暇則進諸生談經
第菽士習文風彬彬然興起及分校浙闈最得人若國子博士陳
君泰來更足稱者獄有童世黜年十二坐大辟已十五載君按牘
而疑之曰大辟至重刑也彼固童耳卽操戈在門未入室詎宜與
殺人者同科亟爲平亭而遣之部使者先後尉薦數十上法當內
召最遷矣卒以嫌郤故移令太平去去之日孝豐之民扳轅供帳
若失父母久之思慕益不忘至爲立祠肖貌以俎豆焉令太平如
令孝豐然兵旅饑饉當凋瘵流離之日所以拊循安集之者更不

遺餘力而搜蠹摘奸尤稱神明流盜楊海晝伏夜見跡甚祕人莫
咎者因二眇婦乞於途君見之曰其行若疑其哀若憾必有隱也
盜訊其繇乎訊則盜瞽之而有其乞之利也寘之法又李傳江黜
久繫獄非其罪卽知其爲冤者卒牽於成言不敢決君復爲平亭
而遣之其兩爲令而理幽雪滯挫強扶困之政類如此尋擢南京
戶部山東司主事督餉於浦江又權稅於武林關旋晉浙江司員
外郎未幾而疾作遂以病請稍稍治田宅爲菟裘計種竹調鶴於
南郊負郭脩然有遺世之志焉名其堂曰思閒時予復休沐於里
君方寓書訂約爲林壑盟也而君乃不及下壽終耶生於某年某
月某日卒於某年某月某日君貌標輕而氣則豪舉心計通敏以
文崛起科甲能自表見於世綜理之才經畫之智用之以能其官
而居家則廓大個儻不善問生產惟其意所當則金帛粟穀與朋
友共卽傾橐倒捆無吝色要以自愉快而已故好客客常滿四座
命觴張樂呼盧謔詠竟日夜不休貴賤無擇有晉代諸賢風然於

保嗇之道或未善也若以君之死徒委之修短之數豈其然乎昔昌黎氏銘李千旁引曲證服食之禍以爲誠而予銘王君則不敢諱其聲酒之病蓋竊附於昌黎氏之指矣娶張氏封安人無非無儀柔順而不敢專既貴盛而不改其素後君一年卒無子側室顧氏生子同文聘鄉進士董君言詩女韓氏生子同倫幼未聘女一嫁毛中吉張安人所撫育者君兄 卿率二孤以某年某月某日台葬君與安人於祖塋之側銘曰

於惟王君以文致身佐計裕國試理宜民委化無累視世若塵宇宙有盡殀壽亦均鬱鬱佳原茫茫大鈞予銘其藏君反其真予言匪佞君名不湮

建德縣知縣沖庵張公墓志銘

予少侍先大夫閒語詩書禮樂能貽謀式穀者必稱見筠張翁翁故與先大夫稱石交而翁之子金昆玉季斌斌質有其文則與予同束髮受書稱異姓兄弟者也今建德令沖庵張公實翁之伯子云公諱履謙字汝益自號冲庵其先爲鳳陽懷遠人五世仕江陰遂居江陰自澹泊公始遷武進遂又居武進則自見筠翁始翁領嘉靖丁酉鄉薦謁選授南京都察院都事而仲子舉丁卯季子舉庚午公最後舉己卯再上春官再不售謁選授浙江嚴州府建德縣知縣公之令建德甫一載而以勤於官奄然逝也逝之日檢其裝貧無以殯郡守方公爲調棺殮經紀其喪護之歸歸之又明年其孤正義等始克黽勉襄事嗟乎是可以觀公矣建德故巖邑公蒞任會歲大祲奉檄出舍設糜振飢勞苦弗辭幽遐必至所全活甚眾邑有驛爲七省孔道僕馬旁午至需索百出廚傳爲奸公念之白當路盡洗諸弊一時稱便行之諸比邑有蠲煩甦困之惠焉邑糧差輕重不均按籍徵丁每多詭冒故本戶之外有女丁有寄莊戶猾胥奸萌規避庸調公念之爲剖晰其故斟酌以宜定半役貼役一邑稱便垂之爲永利有平徭清賦之政焉邑俗簡朴公所居廨宇僅蔽風雨而園土湫隘獄囚無輕重一切械繫於其中寒

暑疫厲多死亡者公更惻然念之捐俸及嘉肺之羨爲廣數楹輕繫薄罰雖在縲絏亦衽席之使安生有敬獄泣罪之風焉凡公所爲植培摩撫務推心單赤蚤夜圖維近民體國而約己持廉卽土產異供卻弗視諸米醢醢醬之需月再輸於家間取之市必浮其值民爲之謠曰冰玉標姿許夙盟苞苴無路入公庭行人試看嚴江水何似侯心徹底清不啻尸祝且徵口碑固非可以丰容色澤爲也諸臺使監司亦無不器重公有黃甲遺英青天雅望等語考上上期首薦以需殊擢會直指行部督撫代事於嚴冠蓋輻輳公力疾勉出應接勞瘁丙夜始就寢詰朝諸胥史猶抱冊牘候堂皇而公在牀褥竟不起邑人士驚相悼爲之罷市無不咨嗟歎息曰奪我神君諸臺使監司驚相悼爲之撫棺無不咨嗟歎息曰失我賢令云公資稟醇懿丰神凝重服聞庭訓克紹家聲內直外溫中瑜表璞絕無城府洞見底裏驟接之無修貌徐徵之無改辭卽妻孥語無不可對朋友言者至其清白自持食貧茹淡守嚴一介未

嘗造請郡縣而鞠躬盡瘁省浮裁濫職效一官卒不敢以毫芒點染囊橐蕭然廬產無所增益允哉篤行好修能世其詩書禮讓之澤國稱循吏鄉稱善士而公之子力學敦誼趾美紹休可俟也公之日足曠矣嗟乎此人所共知亦人所能言者也若公之孝友至情庭闈隱德獨予知之而不容以無言卽公之子知之而或有難於爲言者見筠翁以纖喬起家而賈母拮据佐之當頤指使之年矣旣責其子成名又責其子幹蠱公最長最習鄙事而入泮登科又最晚故以誦讀之餘兼童僕之役外而應酬賓客支撐門戶內而米鹽瑣屑盤飧餽飭一切倚辦公則一切勉承見筠翁或譙訶之無違色無厭心至處婦姑娣姒之間稍覺軒輊有弗堪公則若弗聞者無幾微介於中蓋爲孝子爲仁兄三十年如一日也嗟乎是又可以聲音笑貌爲哉彼鮮衣甘食之子怡心逸志享其安於己貽其勞於父母而室有市道牆有闕言視公亦可愧矣予故特著之以詔世之爲子爲兄弟者公生於嘉靖丙申八月十日卒於

萬曆庚寅十二月八日享年五十有五配葉孺人紹興府通判葉公金女子四正義郡庠生娶王氏繼娶卞氏行義邑庠生娶章氏喻義娶毛氏思義聘于氏女一適太學生王徵賢孫男五雲衢雲翼雲翔正義出允文憲文行義出孫女二行義出正義等卜吉於萬曆二十年十二月十日葬公於黃塘祖塋之傍銘曰

於維張公奕世載德代起明經試宰巖邑不負所學克盡厥職家無選行邦有令績還彼樸素遺此清白公名不朽我銘斯石

光祿寺大官署署丞雪舫吳公墓志銘

義興谿山環停苞絡鍾祥孕靈賢詰生焉自文靖徐公以鼎甲元僚起家相天下而文肅吳公繼之歷詞垣秩宗其用未盡究乃其裔則滋繁茲昌多聞人稱甲族矣文肅公之子三長曰尚寶驥仲曰潯州守驂而光祿大官丞駟字惟均者其季也光祿君與仲爲林太夫人出尚寶爲前母沈夫人出光祿君莊事尚寶如事父而與潯州守則白首相偕式相好也君生而韶秀明眸潔膚從塾中

師受業以穎敏聞文肅公最憐愛之未齟失怙卒克自樹立用博士家語補邑庠生旋以例入太學爲國庠生洗沐居子舍奉林太夫人懽久之仲罷郡還里林太夫人曰仲歸季可出矣先公受國厚恩而出而效韜綫之力於國庶不墮家聲乃畱其配沈孺人省侍單車入都門謁選主爵者授光祿寺良醞署監事升大官署署丞居艱引疾於家者復久之而其在事也兢慎自矢嘗推直景邸日講供具惟慈惟虔君謂丞所司者悉脯脩庖釀卑冗職乎而上所御也顧以情不屑事自高又或以墨自損而令人弁髦之也所司之謂何洗濯其身典幹益辦而要束其僕從母敢需染者大僚廉得其治狀亟稱曰丞任職毋害時太傅朱都督屬葭芋君爲揖客坐上座暨元勳鉅公皆文肅公行輩多折節降禮於君者居無何疏乞改南旣得請而君已倦游矣遂拂衣歸解橐中裝日置酒高會有丈夫子五人具文武材命之曰汝曹休矣吾不能效陸大夫千金五分之而僕僕車馬過從也吾有先公餽粥之遺自給耳

居偏斥羨地治圃五柳雙桐偃蹇垣壁施檐楹於中而署之顏曰知還所於世之榮途利軌靡所嗜好初別業在練谿以練谿自號嘗雪夜榜舟中流瓢笠自隨凌虛覽曠笑傲菰蘆間悠然適也更其號曰雪舫與潯州守徜徉杖履籜冠羽髦雍容甚都歲時子姓羣數十奉觴上壽芝玉輝映於庭階君志亦甚愉第爲延明師良友誨督之而於婚嫁田廬有無豐嗇則任之而已曰吾不以累吾生也君溫夷子諒不設町畦與人交一切以身下之而襟度灑灑出塵無問貴賤賢愚人多樂就之者有司歲以鄉飲禮禮君逡巡辭不赴曰吾故跡跡乏鄉曲之譽斯重典也何敢干之內行甚備未嘗置媵妾與沈孺人舉案如賓也乃蔣司農氏之狀云當文肅公下柝箸之命視長幼差其產季所受獨不半二氏而君無幾微見於詞色夫嫡孽生鬻布粟興謠世所不免況貴介席寵之子乎而君固廓然離俗矣予則謂若君者稱於鄉曰恂恂善士也稱於家曰翩翩佳公子也夫誰曰不然是可銘已而屬予以銘者君之

豕嗣學博君士遇也予與學博君辛酉同棘舍始相識久而益相習丁丑予濫竽史官言事被罪而學博君待次公車慷慨周旋於選卒緹騎中復貽書相勞苦曰幸母以此舉瀝也可謂道誼骨肉之交矣壬午予猶屏廢蒿萊不爲世所齒而又圖所以不朽其親者於予也予則烏容辭謹按狀誌而銘之君之先占籍義興自計部公始計部公諱王玉生經歲薦士以子貴封禮部右侍郎經生儼儼卽文肅公也君之子五長士遇浙江嘉興府嘉善縣儒學訓導娶臨清州守無錫后山成公憲女按察司僉事公周孫次夢彌鴻臚寺序班娶鄉進士蘇州陳公遴女國子祭酒陳公某孫後尚寶次夢松太學生娶翰林侍讀學士無錫鴻山華公察女次夢豹騰驥衛指揮欽依江西贛州把總先娶廣西參議無錫蒙泉汪公汝達女繼季氏王氏次夢翼邑庠生娶上林苑監丞玉區杭公士鏞女中丞公淮孫孫男九泰孫邑庠生娶庠生希謙徐公啟鏞女禎孫聘武進勵庵楊公一桂女順孫聘萬公昱女貢士養庵公士

安孫士遇出廷對邑庠生娶無錫庠生華公承家女廷獻郡庠生娶儲公堅女夢松出廷耀娶無錫莫公某女僉事公同孫廷某夢豹出孫女三一適太學生萬習禮部尚書履庵公士和子一適太醫院吏目肅庵萬公士禮子一未字公生於正德乙亥正月初七日卒於萬曆壬午正月二十三日享年六十有八士遇等卜某年某月某日窆於寒鳴之新阡銘曰

爲之前者而惟爾乎是繩爲之後者而惟爾乎是刑廩廩德讓恂恂躬行庶幾哉文肅公之子是稱鬱彼佳城瘞茲貞珉千百世而下於予銘乎足徵

貢士邗塘秦公墓志銘

萬曆十一年十月十二日秦公汝操偕其季中翰汝立有先隴之役絕五里湖而濟也忽異風起西北木爲拔屋瓦爲走湖波輒人立而號舟覆兩公胥及溺汝立濱殆復甦而公竟不救時予以言事被罪廢田閒聞而傷之曰人所稱巨浸洪濤涌湍洄瀆若彭蠡

洞庭黏天無壁至險矣而帆檝往來相屬也茲湖近在几席耳且世之爲冰夷陽侯能咋人者爲深窅密羅能罟獲人者豈必水哉予固受咋於冰夷陽侯而汝立者則因予而罟獲於羅窅者也汝立不能免於羅窅而能免於水予蹈不測屢致之必死不死而汝操公趨繩履方斤斤矩矱言行不出階序何殊彭籛之觀井乎乃竟失之几席之近也豈莊生所謂修其內不修其外者歟人乎天也十二年汝立走邸中屬予曰予兄葬有期矣有貌爾孤之狀在子志之且藉以不朽予旣與公習又汝立不遠數千里之誼不獲辭也拜受狀而謂之曰此中非曩與子共睹冰夷陽侯咋人地乎不虞與子復戴面目於日月際也而兄竟以里中水物乎子卽罟獲於羅窅較勝矣汝立低回久之黯然而因語予曰疇昔丁丑事子以身殉綱常而予以身殉然諾人之嗤之者眾矣獨予兄寓書曰有鄒浩安可無田畫弟今日足稱古人何卹官也予聞而益傷之夫窮途未免貶謫市道不出庭闈今觀汝立於兄弟閒可不謂

難乎而愧予知公之未稔也嗚呼若公者博物篤行之君子哉秦之先自宋國史編修淮海先生子湛倅常州葬先生於璨山故其裔因家武進之新塘十傳至瑞五府君贅於錫遂受廕而占籍焉又幾傳而至卑牧公以學行著於里蓋尚書端敏公父也端敏公名金於公爲大父其勳業具國史家乘中公父次山翁名汴以端敏公任子仕至姚安太守以伉直樸茂聞予爲之表其墓者公名柄字汝操邗塘其別號云生於嘉靖丁亥十二月二十三日方公在娠也有盜斧門入母楊恭人避之樓盜亦跡之樓恭人倉皇從高牖墜竟不死恭人之母迎以歸未至而生公於舟次人異之曰邁難不坼副兒其貴乎生而果敏慧六歲就外傳屬駢語傾座端敏公而下絕拊愛之十歲慕古學吾伊不絕嘗賦雪詩數十韻端敏公喜且誨之曰士而致身報國必由制科無庸此也公卽潛心經生業辛丑歲補邑博士弟子員旣冠患脾疾不就試者數年而公不以疾廢學學益闳肆左國馬班諸書矢口誦者寓目涉歷者

旣博綜而後約取之疾良已益奮於學日鍵戶讀書自問寢外人罕見其面每試輒甲諸博士弟子督學黃公見謂奇穎梓其文以傳旣試應天不捷黃公惜之將廩之於靖江檄已下公曰是升斗各養其邑之賢者某踰邑而損其餼將謂之何辭不就會督學趙公繼至試復甲諸博士弟子遂廩公於本邑公竟爲博士弟子以文屈其曹者十以行旌者三隆慶戊辰歲督學周公奉恩詔選貢士旣以貢屬之公族父滂而又深歎秦有兩生不能並上之公車也以爲憾至萬曆癸酉歲當歲貢士序屬俞先生公所嘗從受經者年稍逾格而次則虞先生又次則公乃俞先生越次而言公可貢時督學謝公旣素奇公文遂下其事於郡郡太守施公檄諸生議意在公也公竟匿不往又七年始貢上春官適周公起謫所入都門聞公至甚喜先公來謁走邸中慰勞設具相對飲至推轂士則首公云名籍籍京師旣游太學試順天復不捷原脫一葉

爲公卿子者

顧好施予不吝人恆恃之以緩急而賙宗黨之窶者意尤厚嘗脫
舅子某之厄賄其捕者而給之十餘年復捕死於獄而公復爲收
之視人之急猶之己輒傾帑倒廩以濟家漸落或稱貸赴之不厭
至期納子錢所稱貸家而有所負於公者或不問母錢及舉田以
償責公復讐其直於責外久之家愈益落不爲悔嘗舉數百金免
其內戚某生於重獄某生不盡償也而有煩言竟代爲償不較公
潔身持己視義若渴視利若染灼者絕聲色玩好生平無狹邪之
履詞貌嚴冷不爲骫骳態而終歸於篤厚與人言善善惡惡好稱
說廉節仁義事人有不善必面正之而有善則心折之恥爲勢利
交尤恥貴游炎門之跡里中豪有侮寒逃士者公出而直之邑庭
士多鄉往公曰乃公長者長者扶義發憤謂無所爲而爲者非耶
公自結髮受業諸塾師竟白首執弟子禮不衰海東李先生有子
數千里來歸輒下榻館之復治橐中裝齋發之友愛兩弟至篤自

壯時公任學仲弟任家交愉快也晚歲北雍歸而季弟以忤時免官罷還里怡怡相樂一肴醴必共謂二人幸謝羈鞅可棲颯處廓畢山林之嗜矣居無何願與之胥溺而公獨逝也傷原脫一葉



適偶有奇節

偉事赴人之困厄急於已而卒賴以存亡生死爲世所談說願以一節一事名焉卽當時頌功沒世頌聲而或掩其生平嗟乎此人之所侈言者乃士之所恥居者也故予銘亡友秦君之墓而志感慨云秦君者所謂敦倫扶義操行博物自足表見於世者哉君諱柱字汝立爲太守次山公之季子爲太保鳳山先生之最幼孫故自命曰餘山夙稟甚慧嗜學問雖生於殷盛乎絕無紈綺習十七以明經補邑諸生文日有聲而體善病不能就有司校菽蕡而升上舍爲南太學生游京東而坐傾六館談稷下而立廢千人蓋不啻郭泰田邑之名矣金吾帥太傅朱公與君爲中表親未識面而

最心慕其權力能推擇士素知君工文詞精於楷隸會詔選中書業以君名上忽馳檄召拜官而君猶未知也中書稱內史頗華重卽厚賂輿援不易得而君徒以太傅公推擇得之初未嘗有所干請人豔羨以爲遇合而君實不願也君雖列侍從而恥以他途小就更恥隨諸曹偶爲囁嚅僂僕狀故公卿之賢者折節焉而貴游班行中多側目矣元輔新鄭公與君有先世誼而又重君材能接遇甚隆旣公爲次相中閹所傾擠單車就道邏卒緹騎四出籍送者姓名昔稱門牆士者一時避匿去而君獨送之至百里謂蹤跡者曰語而主吾中書秦某也吾何忍而爲翟公客乎次相中閹相結納勢燄甚張至矯旨奪情之議起予與趙常熟上疏買禍度不免於死則以身後事屬君及受杖闕下卽日編戶出都門外予時喘息微矣數憤數甦邏卒緹騎更四出籍相從者姓名昔稱肺腑交者一時避匿去而君獨僦舍挾醫藥起予血肉中而生之謂蹤跡者曰語而主吾中書秦某也吾何忍而不爲鄒正言友乎至是

君固不可一朝居矣亡何遷君爲魯府審理本朝故事無中書遷王官者乃今自君始除目下人莫不創見駭聞君則曰業已觸忌扞罔不詔獄我而王官我幸矣卽王官猶仕籍耳彼修郟者寧遂釋憾乎冰雪在途薪粲爲絕又亡何果中以考功法坐罷久之相死闡亦罪廢予與趙常熟蒙恩賜環日夜圖所以伸理君者時阻力紺議且格也藉令君以官爲重則向者以予所屬爲輕又藉令予能伸理君則今者必能榮膺其身予復以忤世歸君竟以罷籍終益足明君志而庶可以釋予之負乎君豪雋爽達洞徹底裏時露鋒穎善持論議不侵爲然諾其所交游心相知能以身相許不則雖遇顯重義不受爾汝也內行更孝友淳備事父母養生送死竭情致禮及事伯仲兄尤怡怡敬愛而門戶徭役以獨力支持於其閒雖甚勞甚費無問彼我凡受人之託而爲謀之必忠必信至恃之爲緩急則慷慨捐其身以赴之常曰居恆相徵逐一旦臨小利害乃反眼不一引手如韓昌黎所云者非夫也郡人蔣某畱絳

帖於君所未幾亡而子幼越二十年招其子歸之獲厚值以濟其家浙人童某鬻書顧善詩母死家貧不能葬君出室中釧易二十金貽之以襄其事邑人某素習君君憫其沒而母衰婦嫠子在襁褓歲以粟帛周之子成立乃已閩人林某雅慕君不遠數千里來歸君爲館舍衣食之久更齎發資斧乃返里中子某誣其族黨陷於法不能自直君則訟言之於官事始白蓋其拯危扶困排難解紛無所爲而爲者類如此君素無它好特好客又好古金石圖史及法書名蹟購藏百千卷手自朱墨校讐者半至搜獵稗官野史逸壁斷戟諸種種令侍史繕寫摩削者半筆楮糞餼之費傾其貲不鄙而四方賢豪客又未嘗不過君君接納不倦黽勉有無以餉僕馬故聞日博聲日蔚起而產則坐是以日落至割膏腴廢箸未足償逋責卒之日壁立而橐若洗今其孤鬻圖史以營窻窻傷哉貧也亦足以概君之生平矣君爲文雅鬯中情款然自秘恆不以示人書法楷宗歐陽率更草宗孫虔禮皆足傳世稱名家君生於

嘉靖丙申六月十六日卒於萬曆乙酉九月二十六日得年僅五十昔予丁丑事周旋患難惟君與朱君嘉得兩人耳君以失官得名而朱君則無咎故無譽朱君之生先君二歲而君之死後朱君一日予適以是時乘傳抵里皆得視其含斂而哭之嗟乎予捐生蹈不測必死不死君與朱君皆仁人履安處常又下壽耳不宜死俱死死生之際天平其有意耶否也秦之先自淮海先生子湛倅常州因家武進十傳而至瑞五贅無錫遂占籍焉又五傳而至霖霖生光祿大夫太子太保南京兵部尚書諡端敏諱金生姚安守諱汴則君之父也母曰楊恭人妻曰蔣孺人生二男長延烝邑諸生娶顧氏太學生武陽君女次延赤幼未聘五女一適禮科給事中吳君子桂芬邑諸生一適鄉進士曹君子道孫太學生一適廣西布政司理問成君子袞一字顧君子本曾殤一字禮部主客司主事華君子師曾殤更字光祿寺署丞朱君子肇敞延烝奉蔣孺人之命以某年某月某日葬君於姚灣之新阡夫君之植於天

者長軀高步耿介凌厲之氣見於眉睫又博洽經史務湛淫之思
稍得學問之力故矯矯修其行於生平及其見義必為隨遇輒發
若饑食渴飲有不自知其然而然者要以內足其志外不矜其能
而已世以官為重遂以失官故為君重而一節一事津津乎其言
之也淺之乎知君矣知君者莫如予予不銘而誰當銘者銘曰
君起予生子銘君死疇測其然靡憾於理義以利傷惟君所鄙名
以事成惟君所恥有涯者形不泯者志姚灣之阡曰歸於是安於
是考德徵賢千秋百祀

貢士邵為吾先生墓志銘

萬曆十年邵先生以諸生久次貢上公車既試於廷矣居無何邁
厲於邸數千里亟輿疾以歸甫抵家逾時卒獲終正寢藉令後一
日客死矣夫天之於先生與其材玉成其器願乃斲以位嗇以年
而終也獨若有意於首邱耶其所以報施先生者止是耶予束髮
受書於先生而先生子本思又嘗從予學借其兄同辰以志銘屬

予嗟乎先生之銘非予而誰屬哉予也固不辭然亦有不忍者追
惟先生博學宏詞藻麗翩翩每操管登壇袞然前也乙卯試京兆
而歸先大夫嘗誦其三試卷改容擊節謂千百人且瞠乎後矣何
有於一第者顧其文日益有名而數益奇予在弟子列直下中耳
竊先生餘緒而釋屨登朝先生竟坎壞以終焉且奄然切矣即予
欲銘先生也而何忍哉久之本思緘書走長安請至再曰襄有期
矣故為之文其石而納諸幽云先生諱秀孫字元芝自號為吾蓋
求諸已而助志於為也人亦遂稱之曰為吾先生邵先世居陽羨
之國山自蒙巖翁著隱德於鄉以子賢貴贈兵部主事賢舉成化
壬辰進士二甲第一名仕至山東督學臬使賢生恆恆生八子其
四諱鶴年者先生之父也為懷樸翁翁蚤歲游邑庠老以恩例給
耆年章服榮於家配陳氏毘陵藩參陳茶山先生之女也臬使藩
參二公皆以名大夫推轂於里中士者先生故聞家舊裔生而穎
慧教之數與方名時已能為詩歌茶山公撫而愛之特甚語懷樸

翁曰成予宅相而高君門者其在此兒乎宦游江以西攜之凡四載每出其所構示寮友咸嘖嘖豔慕既歸則學於唐荆川太史太史遇之爲高第弟子而先生亦儼焉樹立未弱冠卽如成人矣年十九以麟經論秀爲諸生翹楚時楊公裁庵督學南畿衡鑑平明鮮當其許可者首列先生而亟獎之曰班馬鍾王蓋詞翰並妍也文譽籍籍起下幃講業從之游者甚眾顧益自貶損嘗稱士君子當以文章氣節名世奚取於校菽甲乙哉督學者繼至亦靡不褒嘉置高等如楊公者迨入上京北府弗售齒且艾矣僅僅得一貢離黌校而又未及沾一命以少見其生平也天乎匪人之罪哉先生孝友清介事懷樸翁盡志盡物以爲養母善病而周旋篤慎無懈夙夜及卒哀毀不欲生更號曰存鞠子而父且冉冉桑榆日矣又顏其所居曰愛日齋罔極之思終身之慕可見已事諸父兄有禮而其訓諸子弟亦斤斤以矩矱不踰尺寸履素居貞最嚴於義利取舍無苟得妄受之染服茹葷菲葷惡曰吾以全吾廉而施與

則依於厚馮氏姊之家百里而遠伏臘問遺至白首不衰貢舉時所給於有司者數十金則惠及同宗近支之尤貧者又足以覘先生志矣藉令其列官職於朝或寄民社之司也豈不能飭躬趨事存心濟物哉其所爲博士家言淵源經傳而以此之教授生徒操觚率繩墨不少變曰吾師唐太史云爾也卒能爲諸生建赤幟焉間嘗作詩賦及古文辭入晉唐闔域里中士亦推轂先生卽困於一第乎然足以繼臬使藩參之家學而衍其書脈矣晚且卜築於荆溪溪水上去邑郊七里竹樹蓊鬱日焚香披卷嘯詠於其間冬夏裘葛僅自給視世之醜酣勢利之途泊如也生於嘉靖壬午七月二十五日卒於萬曆壬午十一月初三日享年六十有一配武進吳氏水南公之女子二人長同辰邑庠生次本思郡庠生女一適武進澧州吏目鶴溪吳公子舉人之城同辰娶邑庠少東湯君女生女一適文靖公玄孫徐君子啟鏗繼娶范氏雙橋思槐君女生男二長繩太次繩祖俱未聘女一未字本思娶郡庠徐君懷西女

亦文靖公玄孫繼娶武進敬所黃公女及武進靜齋孔君女以萬曆十二年十二月三十日寔於後畱邨之新阡銘曰
畜維厚施則薄斂春華藏夜壑文發祥善俟穫天之道其猶杓我操契質寥廓我繫銘慰幽漠

憚少陽墓志銘

憚爲吾邑故家著姓至閩參藩大夫少南先生稱宏覽博物而先生之猶子貢士君遠卿亦能彊記多聞庶幾治詩書之業而衍其緒者予昔事先生而知其有難弟也今又辱交於遠卿而知其有哲父也蓋爲少陽公云遠卿善治經不善治生數奇一第壁徒四立公卒之日無以爲斂藉館中所糊口者以附於身公卒之既三年無以爲葬俟田間所卒歲者以附於棺傷哉貧也乃匍匐涕洟跪而請於子曰孤不孝不能遂吾父之志所徵惠以不朽吾父之骨者先生幸哀憐之予謝不敏而又辭不獲然遠卿自爲述其行事者詳哉言矣按公諱紹元字光國而少陽則其自號而以志終

身慕也其籍武進自漢梁王相國子冬始其遷胥城里自繼恩始傳若干世至二菊翁以季子貴封南京戶部員外郎翁生鎡鎡生訓號南陽封承德郎訓之子二長爲少南先生而公其次也公生而穎年甫弱冠以禮經掄秀爲諸生翹楚時裁庵楊公督學所校士鮮當其許可者列公高等而亟獎之曰奇士奇士文譽因籍籍起公益自淬勵下帷修業衣不釋帶枕不帖席者踰年督學者繼至亦靡不寢嘉置高等如楊公者及五上京兆府弗售而齒冉冉幾艾矣會遠卿補邑弟子員公乃慨然曰吾之筆耕研菑業已勸奈何日操鉛槧校菽甲乙爲也姑有秋俟吾子乎遂投牒告休督學者廉其才惜其年又重違其志也特下檄獎之以復其身公寬然長者又篤於內行其事親以孝聞其待昆弟以友聞其待諸子姪以慈愛聞乙巳歲大禋公日奉承德公於家傾橐中裝以給旦夕咄咄無所出甚則擷籬豆野蔬以進而躬且計口并日食木絡草茹時時齒頰閒也迨少南先生以仕顯祿養而公之孝益篤及

則會集十一
承德公以讒命公析居尋以感悟又命公同居而公之孝愈益篤
承德公卒而事叔父龍潭公及事伯兄少南先生亦如之暨視諸
從子輩又無不誼殷殷曰吾父沒見吾叔猶父也曰吾兄沒見吾
兄之子猶兄也公雖醇謹依於厚而義所激則毅往力任不少沮
再從弟某爲人所齟齬幾斃於獄窘甚直躬馳面折當路者乃得
脫是公於其幾死者而生之也同祖弟某業賈蕩其貲亡命它所
不敢歸公遇之塗亟挈之於家是公於其既亡者而收之也承德
公作譜立祠以追遠勗塾設倉以惠宗盟公皆力贊成之俾貽之
世世以道義相先而或免於死亡者莫非公生之收之也其以仁
孝之心而勇於義又如此嗟乎其事親也孝又以事親者事親之
兄弟其待兄弟也友又以待兄弟者待兄弟之子姪何其同體之
誼愈加而愈無已也良亦厚已公幼讀禮故生平以禮視躬又以
禮教子不踰矩矱更不設町畦與人務折節下之卽僮豎臧獲悉
濡忍煦育惟恐或傷之也遠卿試於學使者嘗一再褒然首也公

不爲喜又嘗屢上京闈再入國學戰凡幾北矣而公不爲愠若謂
得失有時此奚足爲士輕重者蓋其中必有以勝之眎聲利之途
泊如也當隆盛時郡邑長有以少南先生故欲得交權公公惟卻
軌守拙曰人雖巧天其謂何卽簞瓢韋布夷如也至其晚歲編茅
畫渠結數椽於旁舍陂池環匝竹木蓊鬱誠有如仲長公理所稱
者公晏游兀坐於其間一觴一詠蕭蕭塵壒外閒讀子史并稗官
逸編以自怡悅尤善書少宗沈度趙承旨既習狂素督子孫雖音
叶字畫靡不一於正遠卿居城時迓公於城而公則安於鄉曰吾
愛吾廬耳公之家故貧不以貧嗇親之養公之家踵貴不以貴張
身之勢蓋其恭謹有徐節孝之行焉其廉潔有陶靖節之風焉卽
終靳於顯融乎而公固已浮漚幻影蔑視之矣公生於嘉靖元年
五月十二日卒於萬曆十七年四月十八日年六十有八公配孔
令人先師裔也其相夫教子有丈夫風具少南先生所撰墳志中
生三子長應翼卽遠卿次應昂次應中庶子一應柳庶女二遠卿

賜餘堂集卷十二
擇吉於萬曆二十年十一月二十八日卜地子胥城之中以葬予
既志之而系以銘銘曰
父何以遺子兮式穀以啟後賢子何以顯父兮殖學以俟逢年予
何以慰子而不朽其父兮藏山以勒斯言

賜餘堂集卷十二

賜餘堂集卷十三
墓志銘

毛母陳孺人墓志銘

萬曆十一年二月予從田閒詔起裝行而予妻之母陳孺人春秋
八十高病矣彌留牀蓐若俟予爲之訣者予至則於眩瞶中屬以
目久之不能語握其女之手淹淹丙夜不忍釋會迫於王程祖道
強而別而予妻則大哀慟謂女之嫁也惟夫之是從乃至爲絕裾
叱馭耶既旬日渡江涉淮而孺人之訃至沃絮馳文命予兒往哭
之而不以聞予妻重傷其心也越明年孺人之子中孚等緘書走
使於京師以其叔復古公狀徵銘曰吾父母藉子爲闕閔光又辱
子之父兄世世姻婭好也昔吾父之藏而兄太史公銘之子今銘
吾母矣予因憶受室時孺人以積痾久瘳初執子壻禮起居帷帳
外十餘載乃起而愈老愈益康瀕危復安愉志長世享子孫孝養
躋耄耄而後以令終謂非天之相之耶其徽懿足稱素所習而聞

揚以圖不朽將誰諉哉卽不狀予能銘者卽不徵銘予亦不能無
言者孺人陳姓家世荆谿葉塘里古靈先生之裔也父銅峰翁母
吳氏生而育於叔父國峰翁叔母潘氏及笄歸學古翁諱誠者古
庵先生之季子二古先生吾鄉先哲沒而祭於瞽宗者也古庵先
生謝諫垣里居而姑陸嗣姑單遞下世先生性嚴意鮮當又清白
勤嗇教於家兢兢禮法孺人則屏絕華曼御荆布拮据從事以承
先生之懽先生謂吾季妣賢雖富室女乎足勝儒門婦矣至相學
古翁守三年喪供四時祠墓之祀慎終追遠志物踰力以爲悅而
無違禮學古翁仲兄之子爲伯兄後適天次當及孺人力贊翁辭
焉其眎千金之產泊如也翁之里多懷謖舞智攜挹構煽至以訟
窘翁翁時爲諸生有文譽恂恂儒者重爲所驛騷久之始得白會
有故人都要津念古庵先生當代名賢骨未寒而子且遭侮將甘
心以快讐者孺人則力贊翁忘焉其眎一朝之忿亦泊如也里有
負責者請以膏腴地償翁翁往履之見其人解衣質午餐爲供翁

閱然曰傷哉而之貧也吾不忍履而田矣歸而語孺人孺人曰益
返其券乎所以相學古翁德者非一翁或剛則克以溫翁或弛則
濟以嚴家僮婢數十百指男服農女服酒漿絲枲綜覈密而霑逮
恩恤閭內外操作無敢怠靜而理也學古翁逾艾捐館舍孺人則
稱未亡人者二十餘年其任家政愈肅其以義方督諸子若孫愈
益謹惟退佚前人光是懼三族諸姻家伏臘脯脩問遺之使趾相
錯於道孺人悉厚爲報施無所闕失而尤厚於父母之族暨其叔
父母拊育者之家昆弟中有與學古翁微卻而竟忘其姊者孺人
謂於所厚者薄渠自薄耳本支同氣我何忍不厚乎老無改其未
嫁時方音而稱述枌榆故昔事源源本本恆津津弗置也古庵先
生置義莊周族之貧者歲大侵所入者弗給孺人顧冢子中孚曰
若王父意謂何而令若輩枵腹乎請益之羨粟鄉有餓者徒就食
則爲餽粥全活之所費凡若干族子泰以貧甚鬻其妻孺人顧冢
子中孚曰此非若王父之脈乎無妻則無子而忍見其一綫斬也

出貲贖之還因得嗣續所費凡若干歲辛亥水被其鄉民病涉孺人復顧冢子中孚曰若未得仕而舟楫於時也苟存心濟物可矣亟捐橐中金爲造梁爲治塗爲置亂河壩輒出涉者脛於水中所費凡若干孺人治生勤業故用織起而矜獨恤惻則孜孜若恫在躬者其施與利濟好行其德而不倦乃爾至其端重寡言笑與學古翁白首相莊而諸子女斤斤胥化而嚴事之一嘖一語無妄發者進止拜起周旋矩矱子姓戚屬以尊禮見者孺人爲北面以卑禮見者孺人爲南面以抗禮見者孺人爲東西面卽倉卒弗踰咫尺人嘖嘖謂毛母閑於禮真稱女丈夫哉先是丁丑予以抗疏忤柄臣杖於廷削籍還里禍且虞不測以親愛之道來者亦不難貶謫而孺人則慰勞之曰此吾家先黃門所欲爲者乃屬之壻乎九原有知爲子一解頤矣至溫綸賜環已贖贖猶喜見顏色喜其伸故節效明時也孺人慷慨識大體豈婉孌笄黛者流幼甚慧讀劉向班昭諸書知其指及長閒常說古閩史雜裨官家語至淑節偉

行輒激烈歎羨之不皇而卽以之教諸子女令砥礪以古賢良爲楷則其不以子爲狂愚而慰勞之者宜也則其女能奉母之教成予之志共顛躓而無閔怨者亦宜也諸子咸彬彬孝友世其家而冢子中孚馴謹篤至事孺人色養頤指數十年如一日問安視膳依依孺子慕而孺人甚安之或淡旬有事他所母寢食弗甘而子心動矣母其鄭陶之範乎而子且庶幾哉石建徐孝肅之風也古庵先生講明聖賢之學德模禮教觀刑於其家者久矣是母是子非其效哉孺人病而中孚等祈請調解無遺力竟以年至不任治而卒卒於萬曆十一年二月二十七日距其生弘治十七年十二月初四日得壽八十子五人中孚其長也娶董氏繼娶東氏次中順娶吳氏次中學娶孫氏次中孝娶吳氏俱郡邑庠生幼中淳太學生娶鄒氏女四長適楊文成太學生次適周之才幼適賀學禮壬午舉人而子妻則孺人第三女也先大夫寓庵府君嘗一再侍古庵先生與學古翁善而至語及孺人尤所敬者故願附以肺腑

之親云孫男十三人應徵應瑞應巖應岱孚出應嵩應嶽順出應
辰應庚應慶學出應啟應喜孝出應桂應未淳出孫女十五人曾
孫男四人曾孫女八人中孚等卜於某年某月某日啟學古翁之
兆而合葬焉禮也墓在陳官邨祖塋之次其季壻中行謹誌而系
之銘銘曰

二古肇家兩姓之宗生斯歸斯孝敬是共懿行在閩闡幽名融深
德在鄉食報祉隆我銘斯兆可樹可封克昌乃胤永寧其宮

節淑毛母王氏墓志銘

夫笄黛者流具純懿之節範禮秉義善始令終於女行母儀庶幾
無悖懿焉寧獨其性然哉其所繇來夫亦得於教者爾也正德閒
毘陵有毛黃門古庵先生者以諫議名於朝以德學重於時而以
躬之所迪者教於家故其子姓帷幃之屬咸戢戢雍雍秩如也如
陸單二孺人事具先生自為誌今母者文學復古君諧之生母古
庵先生之副室也予為毛氏壻視母則為大母行歲戊寅母卒而

予時以言事被罪編戶還里復古君圖所以不朽其母者手錄狀

視子曰母姓王祖某父某世居郡之東門里及笄歸先公嫡母陸

孺人蚤下世繼嫡母單孺人性嚴鮮所當見吾母則喜曰夫姬也

是靜莊有儀婉戀勝婦者也亡何單孺人疾革屬先公曰中饋事

屬之新娶者足矣矧有諸婦在於是母與諸兄婦操作拮据從事

於紕紉饗餐賓祀饗燕之政至井曰飽餉滌浣之役悉躬自勞苦

先公性更嚴其所擘畫卒具辦無不如先公指者先公背棄時孤

諧財五齡耳母哀毀不欲生既而復飲泣忍死曰為先君子死也

者則死之為先君子之遺孤生也者則生之乃屏飾斷葷矢天日

自誓靡他嫠婦孤兒形影晨夕既困窶又遘歲屢侵饘粥且弗給

辛楚備嘗而更為人所齟齬母怡然安之若兒之懈於修一言一

動弗恪弗莊則潛然語曰兒先君子孽子也諸嫡兄皆賢兒獨不

肖乎且而母強顏稱未亡人於世者何為哉顧加譙訶至憂憤廢
食凡師友脯脩鉛槧之需恆脫簪珥佐其費處族戚之內外親疏

各有禮而尤厚於陸單二孺人之戚母則曰二孺人所不忘情者伏臘問遺使無異於二孺人之存之日也族有孤子女先公業爲撫育之母則曰是先君子所嘗軫念者卒爲之嫁娶使無異於先君子之存之日也歲時迎養趙外母於家且爲之經營殮藏而斗粟尺帛黽勉有亡以周其弟姪之匱乏母則曰是我所當私卹者然終無敢加於二孺人之戚與族之孤子女之家也兒以丙午歲娶婦禮成母則呼兒泣兒以壬子歲補弟子員報至母則復呼兒泣曰兒幸受室又幸游庠校宜喜而顧悲者痛先君子不及見兒婚與未嘗教兒學爾兒以文蹶數見黜於鄉闈母未嘗愠兒忝以行優數見獎於督學觀風使者母亦未嘗喜曰得失有時名實難副兒惟修其可勉者以俟其不可強者而已郡縣諸文學稱述母之節上之郡侯應城李公嗣上聞之施公二公嘗一再舉諧之行者曰不知其母眎其子今乃知子之固有母也東帛遣使禮於廬因署其牘云持身端潔婦道克全教子勤劬母儀足範歷艱難而

清節愈勵垂衰暮而雅志彌堅復上之憲臺李公將以疏聞母謂兒曰令甲旌婦節稽其歲年爲之制我三十始失而父而敢隱年以干盛典哉事遂寢頃母疾大漸執兒手曰吾兒庶乎彊爲善矣今而後我可以復而父於地下惟兒食指繁負責無以償爲慮言訖目瞑按狀所錄如此質之予所聽覩者語不誣也乃復古君謂予曰諧不孝上之不能立身顯名以揚吾母之節次之又不能操奇贏以勤嗇起家而貽吾母憂吾將笑以解也茲藉以垂無疆而慰罔極者敢徼惠於子矣予惟絃歌誦習之教不設於閭闈而士以冠裳禮樂名且多隕防敦常者乃女婦矢志飭躬克全其性以遜於倫也可不謂難哉古庵先生篤行慎履家人嗃嗃稱嚴君焉則母之耳目所濡染無非教者予不及見先生猶及見先生之遺風遐軌於母也母爲副室者凡十有三年爲嫠婦者凡四十有四年茹貧攻苦甘荼支憊其幽憂隱痛蓋有甚弗堪者卒之不二心於生死存亡而完皎皎之節顧以不應格不旌復古君所以喞噓

悒快於衷而不能已者其在斯乎其在斯乎予則謂母之事它可略也特論著其大者因僭爲之私諡曰節淑云母生於正德乙丑十二月二十一日卒於萬曆戊寅七月十六日享年七十有四以卒之年某月某日附葬於古庵先生陸單二孺人之次稍後子一卽諧也娶葉氏紹興府通判誠齋葉公金女孫男五中士娶李氏河南道監察御史巽陽李公世臣女次中聲娶王氏邑庠生少南王公業女次中吉次中懿聘郡庠生鳳麓楊公應文女次中壹孫女一曾孫男女各一銘曰

其生也匪云正位得陪體乎君子親挹其芳其死也匪云同穴得附魄乎君子永偕厥藏樹節足表遺芬彌長存孤克肖後胤寢昌斯石可泐繫母不亡

毛母徐孺人墓志銘

毛黃門古庵先生以理學名於世以忠直著於朝而以禮法範於其家也尤斤斤焉故其子姓之逮事先生者孝謹敦睦皆循循好

禮尚義而淑儷哲媛內行壹則亦多足稱數云予之妻先生之孫也知毛氏莫稔於予故記載毛氏之懿媿尤莫宜於予予嚮者嘗誌妻母陳孺人而銘之嘗誌妻大庶母王孺人而銘之乃今於中允君之請而誌徐孺人也蓋予於毛氏婦所爲藉手鐫石者再而今且三矣按狀孺人姓徐氏父代州吏目玉峰翁母楊氏生孺人笄而歸懷古公事古庵先生姑陸繼姑單遞謝世先生攝內外政甚肅鮮所當意者孺人恭謹修愉婉而以婦職佐之稱靜理懷古公爲諸生有文篤學自勵孺人淑慎習勤苦而以女紅佐之更稱辛楚旣懷古公入太學走上國孺人代爲政力紡績身耒耜以嗇起家以勤先臧獲井井如也懷古公處人或峻而孺人務以和解之懷古公馭婢僕或嚴而孺人務以慈濟之委婉調護又閭閻如也會先生捐館而懷古公亦屢困於場屋中年迫徭役居邑邑不自怡快孺人益日夜拮据率力指以供其食指弗敢以燕請也衣襲其麤敝者食甘其菲者弗敢以華腴適也用是案銖積絲業漸

起益漸斥旁產而懷古公復捐館孺人乃洗鉛華闔戶垂幌稱未
亡人而食淡攻苦甚於少壯時課督諸子則恆以蕩世業墮家聲
是懼諸子無不奮勵任儒者卽未竟儒者咸兢兢自守織紵經營
罔越尺寸底於成立靡非孺人教也孺人爲毛氏婦而母者六十
年春秋高當頤指使矣而絲枲不去手食不重肉諸子或跽而進
三盞製一衣卻不御曰天固忌盈人宜惜福我自貫此非而曹所
知也或跽而勸其少休曰兒憊我耶我齧決擘纊尚健且勞我所
習耳若於施予族黨問遺父母家趾相錯迨老不休歲伏臘有事
於宗祠必精必腆又時時飭中饋代諸子供賓客取咄嗟辨師尼
巫媼以祈禱歆之輒謝弗許曰廟享豐潔賓醴鮮髓我職也若諛
佛媚神我弗能也嗚呼若孺人者女而孝婦而恭母而慈妻而順
壽考長世令終全歸庶幾集五福備四德從三而終一矣殆無忝
於古庵先生之家者哉先生之範於家者遠矣逮事先生者旣祇
適之其不及事先生者亦紹聞之孝謹敦睦之風永勿替焉斯其

爲孺人之意乎予因志孺人而又推孺人之意以示爲毛氏裔者
孺人生於正德庚午五月十三日卒於萬曆辛卯十月十七日享
年八十有二子四人長中允儒官娶王氏次中元娶華氏繼娶唐
氏張氏中亮太醫院吏目娶吳氏次中覺蚤世娶鄒氏女二人長
適無錫秦燦邑庠生次適同邑趙誠孫男十人應儀應位允出應
騏應驥應酉應亥應寅元出應圖應書亮出鳳翔覺出孫女九人
曾孫男一人卜癸巳年四月二十五日啟懷古公之藏與孺人合
而窆焉實陳官邨祖塋之次銘曰
母之歸也舅姑是宗而藏也耐兆於其封母之生也夫子是從而
沒也陪體於其宮壺範不朽婦職克終其爾子爾孫念爾祖遺風
而慰爾母於無窮

太學生存庵楊君暨配毛孺人合葬墓志銘

蓋吾邑之東南里有前黃楊氏云系出伯起後以避地徙自關西
五傳而至守庵公圻以武略將軍隸鎮江衛生百山公鍾以奉訓

大夫知賓州配諸氏封孺人生子五人存庵君其仲也楊氏起家
甲第貲力雄長一邑胃脯灑削庶幾乎鐘鳴鼎食比素封稱望族
迨中葉業且式微日廢箸斥產久之益負責蒙通而閱閱徒存踐
更爲累然餘風積習子孫猶以媮衣鮮食侈溢相矜漸至流離存
庵君生斯時居斯里紹明詩書之緒欲稍擱立於頽靡之中亦甚
難矣予之妻與存庵君之妻兄弟也弱冠受室與君同爲郡諸生
亡何予登第而君屢試屢不售乃入貲升上舍卒業南雍薄游京
東論交稷下四方友以郭泰田邑視君矣君材故敏度復疏朗宕
逸嫻於文翰工詩更善字字摹晉人詩亦法唐律至博士家言則
不屑意繩矩而俛首帖括也負雋抱奇以故卒不售及予被編讎
請休沐服官什一歸田什九則與君恆朝夕君去懸一榻以待君
至未嘗不數日留相眎莫逆也君素饒酒量又閑於酒德嗣宗欲
澆塊磊佛大冀親形神今雨來朋春風布席翦燭裁句刻羽飛觴
足傾四座飲一石而醉二三靡不爲之陶然酩者彷彿於荷鍤蠟

屐者流至其敦倫篤履質行淳備又斤斤毋敢踰閑越此事百山
公暨諸母務致甘毳洗腆凡供具宴饗修其色而進之故百山公
暨諸母白首長世安其養甚懽縣大夫某設餽笥之術告訐驛騷
挾讐修刻者中百山公就繫君大恚曰父辱子死耳請以身代請
室以義譙縣大夫縣大夫慚事乃白友愛兄弟一壺殮晨昏徵逐
怡如也又肅然或恃以緩急不復爾我助兄以貲脫弟於難卽傾
橐倒篋曰此吾在原之誼耳至親友族黨閒振窮賙乏慷慨好義
不侵爲然諾蓋不自知其罄懸而壁徒立也然攻苦茹辛量入積
出躬井日之勞操奇贏之息以佐君者毛孺人之力是藉焉孺人
大父黃門翁父學古翁鄉之典刑世其禮教而孺人又質慧才淑
識大體克勤小物有所擘畫寔辨毋訥有所酬酢寔豐毋嗇蓋其
性務勝人恥不若人存庵君日以詩酒自怡悅一切公私之需句
稽督迫戶外屢常滿心計身勞胼胝拮据孺人悉任之不足出諸
簪珥不足則出諸播獲又不足則出諸機杼存庵君奉親奉賓客

第問婦牀頭索斗酒盃蔬耳孺人則黽勉有亡取頤指以辨而更
掩覆於君懼君之傷其志也君四十尚艱於子孺人擇宜子者爲
貳室既孺人舉一子而貳室生二女則夷其子女無異視蓋孺人
爲楊氏掌故四十年至孺人卒而後存庵君始知有貧也而後存
庵君之子始知無所恃也鰥父弱子煢然在疚者三年君愈邑邑
不自得遂遭痰眩之疾語澀足蹇復有齟齬其孤而侮之者泣然
泣謂其子曰我生猶死也我死其如爾孤何蓋惻然傷之矣疾愈
痼卒因以不起嗟哉君豪舉遐思而以拂意終毛孺人勤行力作
倬有丈夫風而以齎志沕也予與君最善而予妻與毛孺人又最
善故悼其亡也涕匪無從而委以志也辭所不獲矣君生於某年
某月某日銘曰
是夫也世德足以亢宗功而家屢空是婦也材足以相夫躬而志
卒窮坦而歸順而依其偕卽安於斯宮
敕封諸太安人蔣母墓志銘

萬曆五年宜興蔣君瑞卿成進士守制居里予則以是年言事編
戶君操一葦走二舍而遠相勞苦於創楚蓬藿中義甚高也今既
十年浮沈凡幾易矣予從講帷請假君則以南計曹郎絳吏議歸
因得奉母之終焉乃手次第母之狀謁予曰某不肖馳驅在事不
能朝夕承顏爲母懼狂直忤時不能明哲保名爲母榮今也謝靡
鹽之勞釋不遑之歎方與弟明卿斥旁畝構別室將營菟裘母子
老焉幸而伸愛日之忱何不幸而遽罹終天之戚也所以爲吾母
不朽計而塞不肖無涯之痛者其太史氏之言乎予謝不敢而又
辭不獲遂受狀而誌之母諸氏爲澗之諸暨人其先出諸越大夫
之系元末以避兵徙宜興者母之八世祖也母以子貴今稱太安
人云父諱倫配凌氏生太安人在髫髻中婉淑有令儀父母甚奇
之曰吾女女耳藉男也當大吾門爲之擇其偶者得封主事思萱
公而字之及歸年十七惟舅惠齋翁在養太安人嚴事之問安否
具膳進羞務當意甚謹因主事公念兩姊遠在金淵伏臘餽遺至

垂老弗替主事公少任俠跡弛負慷慨之氣好游又好客不問家人產產坐以旁落且謂閭以內有婦足任不以貧故損其結客志也每游經旬月乃返返則與所游客偕來席門繩樞長者輒恆滿太安人脫簪珥具芻秣以餉僕馬黽勉有亡益不以貧故恡其結客資也常從屏間竊窺則私喜曰夫夫也世所稱賢豪客者非耶夫而執御吾其紉轡乎主事公初年重然諾輕財仗義家故貧而太安人則以儉佐其施中年折節務本業課耕課讀規其出納而督過之家漸饒裕而太安人則以寬濟其嚴年二十四生長子瑞卿幼慧善屬文主事公謂是兒千里駒何難一第至三試有司輒不利輒爲不憚太安人則婉辭解之曰此豈菟罪乎士之遇固自有時也嗣生次子明卿甫入小學主事公又謂吾一兒以經術誤何容再誤太安人則正色語之曰此豈經術誤乎士之業固其所當爲也然以付阿兄耳毋爲累若翁矣兩兄弟自相師友日淬勵於學以成名蓋太安人從與之力焉主事公捐館舍之後兄弟聚

廬而處合爨而殮不爲蓄迄無間言至衡其臧獲而任之男服農女服紅耳攝頤使率其力指以供食指肅如也而又雍如蓋太安人綜理之政焉瑞卿借計吏舉禮闈於邸里不及奉主事公之終太安人哀痛倥傯中強起治舍斂誠其次子曰徒慟何爲者附於身必誠必信勿貽而兄他日憾耳萬曆十年上兩宮徽號得覃恩大典瑞卿製冠帔以進并焚黃於主事公之墓太安人曰兒登榜之春若翁就木日也天乎胡不令須臾無死以見之今一紙安用及九泉乎老婦未亡人耳泣然悲也太安人性至沈靜寡言笑卽終身未嘗見齒處諸媼戚誠篤周慎無飾詞而夷其子婦婿女更無昵愛有鳴鳩均平之風至於慈煦拊摩自離襁褓以迄成立卽一指呵彈一語咀詈不忍加也若太安人者寧詎爲婦足任哉蓋其爲母永足式矣乃兩兄弟之痛各有不可解於心者兄以色養未終爲桐弟以祿養未遂爲恥茲孝子不匱之思哉嗟嗟是母是子可誌也太安人生於正德癸酉某月某日卒於萬曆丁亥某月

某日距其生癸酉者一週加十五年而卒子女某某某月某日啟
主事公之兆而合葬焉銘曰

疇爲而之儷相而成夫志以赴於義疇爲而之嗣教而毓子器以
聞於世婦職有終母儀無替永媿所從克昌厥裔

張母賈孺人墓志銘

予自束髮受書先大夫則爲之擇所從游者遂與張氏二伯仲同
師事家塾先生而都事見筠公又時時過先大夫雅相善予故奕
世交也諗聞張母賈孺人之行甚悉歲甲戌予請告還里中乃孺
人襄事有期矣諸子奉都事公之命以履謙所自爲狀來徵銘謂
予曰謙等辱交於子有世誼又史職也子其銘吾母庶幾哉可以
闡幽垂信已予則烏忍辭謹按狀序次之云孺人姓賈氏處土石
溪公之女其大父靜軒公爲荊州別駕本右族而今憲副董公姑
則孺人母也孺人生而端靖具女德石溪公最愛憐之慎於擇配
及笄猶未字時都事公爲諸生文日益有名初娶於劉居無何劉

卒嗣議婚於賈而憲副董公業與都事公習又從與其閒遂得委
禽焉都事公王父聽泉公起家儒官故食貧而筠山公承之貲產
僅足給餽粥孺人之歸於張也逮事筠山公暨姑楊孺人楊孺人
性嚴鮮所當意者顧獨謂孺人賢閨以內凡縫紉糝糲滌滌若伏
臘享祀賓燕率躬親操作夙夜拮据罔敢懈都事公黽勉問學歲
時以授經就外館孺人則仡仡勤婦職一切事不以關撓而生業
亦稍稍饒裕以故得壹志肆力於文嘉靖丁酉領鄉薦都事公雖
寡與慎交而一時名碩輩相徵逐甚懽至則淹留移晷孺人爲供
具必腆必潔遇戚獲有恩待諸姻黨戚屬悉有禮丈夫子五人都
事公最善訓督之而孺人則以義方慈誨贊其成不少假借故諸
子績文種學咸克自砥勵伯子謙早游庠校每試輒在高等仲子
中中嘉靖丁卯鄉試彬彬盛矣而都事公則屢上春官不第或以
謁選勸公公謀之孺人孺人曰祿養有爲親計者親弗逮矣卽仕
無庸也且君性亢直必不習浮湛澆忍態藉第令有以意氣相加

者君則安能俯仰人耶乃欲爲未竟之志於諸子乎屬之耳都事公唯唯歲戊辰率仲子偕計行遂疏授南京都察院都事浩然歸視世之沾漶沈酣於名利卽垂暮猶戀戀不忍舍者澹如也及季子和中隆慶庚午鄉試報至孺人則忻忻喜旣戒諭之曰汝兄弟幸兩舉秋闈卽而父斲一第於春官然祖宗積累茲惟艱矣汝其圖所以自樹者顯揚光大之業汝兄弟尚勉哉幼兒履道甫弱冠尤篤於嚮往聞母言又見諸兄皆成立愈益自淬勵築室鍵關攻苦發憤因勞憊成疾竟不起時孺人以憂惶在牀褥家人諱不令孺人知卒聞之亦竟不起相越僅五日兒奉母之教以勞憊亡母則傷子之天以悲盡亡死等耳死如孺人之爲母若子也痛哉矧婦道母儀一一中矩獲始而其舅姑宜之曰是能婉約惠順吾得吾婦也如孝子也旣而都事公稱之曰是能綜理經營於內以佐吾所不及吾得吾妻也如良友也今諸遺孤哀慕之曰吾母之撫育吾也愛而知勞慈而不弛其教吾失吾母也如失嚴師也具善

完懿殆足語閨闈楷範孺人其可謂賢也已諸子咸趾美好修將策足高衢嚮用方始顯榮當未艾乃孺人則不少延以待也嗚呼悲哉孺人生於正德丙子年正月十二日卒於隆慶壬申年九月十五日享年五十七子男五履謙郡庠廩生娶紹興府通判葉公金女履中舉人娶苑馬寺少卿周公仕女南京戶部尚書襄敏公金孫女履順邑庠生娶江陰太學生徐君衍嘉女履和舉人娶舉人王公敬之女履道聘江西布政無錫秦公夔曾孫女未娶而殤都事公以成人禮葬於法亦得書女一適浙江副使董公士弘孫郡庠生董君言書子邑庠生應朝孫男七正義娶邑庠生王君業女敬義聘無錫邑庠生邵君秉忠女餘俱幼未聘孫女三一受舉人王公曾可孫太學生徵賢聘一受宜興南京戶部侍郎雲山曹公三暘孫國子監博士公司勳子福孫聘餘俱幼未字卜萬曆三年十二月二十一日葬黃塘之原銘曰

既均其匹式燕厥宗匪嘻匪噶曷敬曷從維子克俊振振以融發

祥綬祉有來方顛食報孔厚矧茲令終黃塘之麓言揭其宮是曰
歸所蘭被其叢永矚下土聲施靡窮
敕贈閔孺人謝氏墓志銘

瀛海郡故多著姓而著於任邱則稱閔謝云孺人者都憲謝公之
女後府都事閔君之配尚書翁之婦也尚書與先尚寶同舉乙未
第都事君謂不佞有世誼又史職也屬之銘遂按狀論著孺人之
懿媿而銘焉孺人姓謝氏生而端靜具女德尤聰慧通解都憲公
居常訓諸子輒談古昔賢淑孺人從旁聞之輒能舉大義若有慕
乎其中者都憲公參藩督餉盡瘁濟艱病歸舍孺人奉之如其兄
兄勞苦孺人且休矣孺人曰吾與兄體同心獨異耶至處昆仲姊
妹閒孺人行齒最少和敬有禮閫以內無迂顏閒語雍雍戢戢也
卽臧獲罔不人人得其權都憲公愛重之曰吾女當不婚凡子而
尚書翁與都憲公相契善又雅聞謝氏女不凡遂令都事君委禽
焉孺人歸閔時尚書翁方柄國事而都事君居家又鮮兄弟則獨

任家政孺人綜理於內縫紉績紡炮醴酪若歲時享祀賓燕率
躬親操作絕無富貴態稍自暇逸都事君黽勉問學夜讀書孺人
則篝燈手女紅侑之故都事君以幹蠱稱於家以篤義稱於里今
又以膚敏博練稱於朝孺人與有助焉尤委婉善承其君姑君姑
者謂尚書母顏太淑人也老矣性峻急鮮能當意者顧獨謂孺人
賢至於事都事君父母愈益謹管鑰井曰悉以屬孺人孺人身勞
之夙夜弗敢怠及從都事君於邸第遠所親時時念弗置得殊羞
異品弗敢嘗則必緘授歸獻使使問興居者趾相錯於路旣都事
君奉公役役竣便道還孺人以得侍翁姑又得歸寧其父母爲喜
值母下淑人微恙孺人奉之如其奉都憲公時蓋始終篤於親以
故處尊卑內外無不宜也居頃之偶患脾病且革神色不少亂
長訣無一語及私第以翁姑父母在未得終女道婦職特介介於
衷耳是時會新天子御極當晉號兩宮推恩百寮孺人聞之則又
以得被朝廷命爲喜逮制下而孺人逝矣且都事君賢聲政績隆

隆起榮衰方始而諸子又振振嗣美世澤國恩正未艾也乃孺人亦竟不待嗚呼悲哉孺人生嘉靖庚子年某月某日卒隆慶某年某月某日子三長爲太學生銓銓之生也適當尚書翁奏績錫蔭時人以爲孺人種德惜福之報云聘某氏次聘某氏次某女三俱尚幼卜年某月某日葬某地之原語有之世祿之家鮮克由禮語紈綺子也以至責閨闈者流豈不愈益鮮哉閔謝稱著姓乃孺人爲女爲婦則耳目所覩習顧不謂貴盛歟至相夫以勤慎聞事舅姑父母以孝謹聞儉素慈惠罔不克由禮藉第令孺人生而爲丈夫又安肯憑依蹈藉甘紈綺子同也嗟嗟等死耳死有懿媿以垂則揚休焉死何較修短矣若孺人者是宜銘銘曰

謝世望瀛閔爲國禎孺人居之弗侈弗盈婉婉有儀令德淑聲職縫主饋肅雍且貞履盛持約亦性所成惟士則難矧女之行闡幽勒珉以永厥名

華母曹孺人墓志銘

嘉靖甲午先大夫舉於鄉梁谿有所謂果庵華先生者實同舉云而曹孺人者華先生之繼室華君懋德之母而今鄉進士國榮之王母也孺人歸華先生八年而居孀母華君三十六年而在殯在殯又十年而華君溘焉先朝露矣國榮將舉父之葬因奉父之遺命而襄其王母也持狀謁予而有請曰傷哉是吾先子齋志未終而先王母徼惠以不朽也先生其念先世通籍而賜一言之辱乎予聞其言既讀其狀肅然起又隱然戚於衷焉予家曾王母儲守節撫孤四十年歷艱苦萬狀格宜旌不旌予兄弟猶未能顯揚之是恫也若曹孺人者可使之泯泯無傳哉而以闡幽垂信屬之予予又安忍辭按狀孺人姓曹氏世梁谿人生而懿淑娟秀父母特憐愛之偃蹇其偶而會華先生有錢孺人之戚遂委禽焉時孺人年十六耳錢孺人先有二子一女孺人至則已稱母擁愛之甚慈孺人尋亦舉一子財七齡而華先生捐館舍時孺人年則二十三耳遂屏去鉛縠垂幌闔戶旦夕撫其子懋德泣曰吾未及而之立

也吾何辭以復先公地下也則又撫錢孺人子若女泣曰吾未及而之成也吾又何辭以復錢孺人地下也即起而強顏於世如業旁落何伯子少未更事督過頗難乃告諸伯叔洎族長者析箸三分之以其一屬之伯子又謂伯子長加予田廬一區命之曰惟是共春秋粢盛饗祀之需仲子贅於鄒以其一屬之仲子攝於鄒皆割其業之腴者而其瘠且下者可一分則以撫其子懋德及錢孺人所遺女瑩瑩相依後子前女無所貳別女甫笄則又慎爲擇配嬪於錢捐橐中裝爲具資送紉綺帷帳器什無不備更割其餘畝百有奇輔之不知其非自己出也即女亦不自知其非孺人出也夫生不屬毛愛均離裏孺人所以撫其遺子女一體視之可謂起華先生而不死錢孺人矣梁谿故劇邑而邑役最劇於筦稅其先世以上資充鄉賦長無虛歲孺人以一嫠挈諸孤拮据操作不及中人產矣而鄉賦長如故乃捐貲屬伯叔任之而身爲參伍鉤距出入不少差即不足又捐膳畝佐之曰去老婦糊口之產猶足稱

役使毋撓縣官爲也居無何屬有倭變邑議城城責城三雉已又議造戰艘責艘一舸孺人則復傾橐以給費居傍有瀦水澤爲叔所侵而筦稅與叔共役高下當眎產之進減懋德心不平則戒之曰而休矣毋徒捐好以厚怨也懋德晨上賦邑門暮返而從土木之役訟役洊至應辦不皇蓋城完而家徒壁艘具而室如洗矣比又遇旱歲大侵或併日食閒爲荳麥飯與子婦共率懋德履母食力孺人手理絲枲身不離機杼目察工作足履場圃蚤興晚寤身先諸臧獲勞苦支持於瑩窶顛躓中忍閔耐侮竭思盡瘁以經紀其家五年而一役徭十年而一役稅公私俱困衆息日多即橐無可傾業不足償矣幸其族有二君子效麥舟之義折左券置三百金不責售者而他收責家權子母而徵之庭戶多諄語孺人太息曰唉豎子而不念先人所遺二兄既不能守其腴以自給乃其瘠且下者直置錐地耳而窮於訟窮於役復窮於逋盜詎皆二君子也者急義扶困而收恤之乎吾不忍見而圯墜先業也邑邑不自

釋遂稱病乃逋日深微日苛而病亦日寢劇竟以是不起矣先十年曾預治棺會其壻錢繼祖卒女請母之棺以爲斂孺人不忍拒遂慨然有脫驂之義焉別購得木更治之值病大漸棺成而目瞑是萬曆三年二月十二日也距其生正德十年二月三十日享年六十子懋學娶鄒氏繼娶方氏懋道贅鄒氏繼娶曹氏錢孺人出懋德娶鄒氏孺人出女一適錢卽前所謂繼祖者亦錢孺人出懋道之子曰國本娶陸氏懋德之子曰國榮娶鄒氏繼娶陳氏曰國燿娶錢氏曰國煥娶胡氏曰國輝聘許氏繼聘夏氏懋學無嗣孺人命以國燿爲之後而國榮者萬曆丙子舉於鄉孫女六曾孫男一曾孫女二國榮以丙戌年十一月庚申日奉孺人葬秦塘涇之祖塋祔於華先生右禮也夫孺人委心重泉錮迹祕閫毋論靡他之誓皎如白日而藐然在室煢然在堂上急公徭下迫私負斬斬把持門戶四十年如一日茂蘭雖隕於多露勁草獲表於疾風可爲難矣今令甲旌節之典恩意甚渥激勸攸關部使者條奏而

達之於上儀曹覆請而頒之於下無虛牘矣然亦眎其氣力足表見耳窮壤窶室豐蔀覆盆其茹荼攻苦竟此生沒沒而不得聞者指可一二屈哉卽華有曹母而予家有儲母均足恫也國榮行將以行能學術顯於時其徼上寵靈爲大母光榮自有日則予所論著或可備觀風者之采擇焉是爲誌而系之以銘銘曰

生也曷依夫先婦臧死也曷歸子後母亡纍然其多喪黯然其永傷是孰爲之襄曰孫謀允臧不朽維何眎此銘章不亡維何冀而裔昌

張母薛孺人墓志銘

江之陰正嘉之紀有布衣儒人薛浮休者以文行名沒則祭於社曰鄉先生浮休子甲明經舉進士給事黃門省副憲臬司更以理學名人皆宗師之曰畏齋先生薛之族始貴然不貴其官而貴其教之足以範身而閑有家也卽先生之女之賢足徵已先生之女爲今張孝廉修德之母母卒於萬曆十六年十二月十八日葬有

期矣孝廉走百里持狀介友人憚貢士而謁予曰孤不孝父喪未
幾而母復繼之痛哉捧檄爲懼而以祿養也庶幾乎異日者今已
矣然片語之榮重於華袞曩嘗句弇州王先生文爲父重今則願
句先生文爲母重予聞而愧之辭不文不獲遂按狀而志云當畏
齋先生以諫官謫楚幕母邵孺人從之生孺人於楚之邱少婉嫵
有志操畏齋先生授以孝經列女傳諸書輒能解其義爲擇壻得
張君慶而歸之張故貲雄於邑至張君之父司城公滕家益起孺
人之歸張君也年二十一矣司城公官京師而孺人事封孺人姑
顧唯唯恭謹初或疑其生於貴而倨也至則相夫治於室靡不辦
具大喜慰曰是賢婦習於教者時張君受經外傳無內顧以有孺
人得不廢業及司城公歸老邁東夷之變張君奉父母於流離兵
燹中生養死葬以有孺人得不廢禮旣而業稍落公私之迫旁午
至張君左支右撐茹荼寢棘以持門戶以有孺人得不廢家勤儉
纖嗇率先其力指以供食指無兼簋鮮衣而至於延師友訓子則

漿酒脯脩必腆潔卽凶荒播徙以有孺人得不廢教己卯冢子修
德舉於鄉仲子某補博士弟子員而家以拮据稍稍復孺人乃食
素絕葷益以澹泊甘也修德子毓美亦補博士弟子員孺人見其
子孫成立旣解頤又悲張君之不及見而攬淚語之曰念哉張之
宗逃矣自秦望徙流璜世世以善聞而祖仕不顯而父遭家累又
業不終所望以振微繼緒者在汝子孫耳念哉張君以乙酉卒孺
人邑邑鬱毀不自得至戊子亦卒年五十有八疾旣革沐浴更衣
正襟口不輟禪誦曰吾當以今夕某時往輒問曰夜如何其坦乎
脩然坐而瞑嗚呼生死真境也烈丈夫於斯際猶難之而孺人能
爾則其得於漸摩習染者豈徒習中壘之傳詠謝女之句已哉蚤
慧夙悟殆闖性命之藩通幽明之故者矣居恆以畏齋先生之教
教其子曰矩矱爲檢廉靖自持兒其無忘渭陽之遺風焉至其待
侍媵之子撫愛均一無幾微彼我聞此尤足賢也子八長卽修德
雅秀而文次修吉修己修和修政俱孺人出次修身修職修典俱

旁出女四孫男七孫女五婚娶名族具狀中以十七年某月某日
啟張君之兆而窆焉在璜塘新阡夫世風漓而女教漸湮也求其
為賢母賢婦足為閨闈楷範者即縉紳家百不一二耳予不佞先
大夫嚴於訓子更嚴於擇婦諸子婦中其一為洛社張氏出於運
使東洛公之裔東洛公以廉直著沒而祭於社者也今孝廉流璜
之宗實與洛社同譜而孺人之賢復出於畏齋先生乃知女教亦
繫世澤不獨其性然也予故因志孺人而深有感焉銘曰
生於漢浦卒於江塹蛻形從所天兮玄室蔭柏彤管揚荃潛德藉
以傳兮八龍並奮千里高騫馳榮於此阡兮

陳母龔孺人墓志銘

宜興有葉塘之陳武進有新塘之龔兩家皆稱鉅族為婚姻今鴻
臚見山陳公堯卿之室龔孺人卒之又三年卜期襄事以進士龔
君狀來請銘孺人女為予長兒雍之妻而予邱嫂出於陳為見山
公之妹予妻之母亦出於陳為見山公之姑知孺人者莫如予也

何敢辭按狀孺人父為進山翁領嘉靖壬午鄉薦母為吳孺人以
嘉靖丙戌六月三日生孺人孺人生而婉孌又家世業儒禮義之
習得於濡染者素也其歸陳年甫十七太舅仁山翁舅銅峰翁相
繼切孺人佐見山公之喪必以誠信而事姑周孺人益謹恆悲念
曰吾已不逮事吾舅矣敢有所不盡於吾姑者周孺人孺居十九
年孺人佐見山公之養必以鮮腆及姑切而所以佐其喪者如其
舅故閭里稱見山公孝者曰藉而婦也歲庚申見山公官鴻臚孺
人從之邸里以勤勩相其夫周旋禮儀無曠闕故寮案稱見山公
能者亦曰藉而婦也孺人內德甚具精刺臬饒饒之役拮据生產
衡臧獲而任之淑慎慈惠閭無違言庭無嗃嗃聲而男服農女服
紅咸靜理也業亦以饒裕資日積矣躬自儉嗇攻苦食澹率先其
力指以供其食指口厭藜藿身甘龕敝不敢以家贏而用稍汰也
其劑量豐約外內上下疏戚貴賤具中窾得宜為陳氏掌故者四
十年乃其最大者見山公蚤歲艱於肩孺人則屢為置宜子者於

三室割牀第之愛俾得以時御之而貳室有子則撫育之如己子
驟而入其室不知子之有母而孺人之無子也子稍長則爲之置
室家籍田土以畀之喜謂見山公曰爾大宗有後吾心庶其慰乎
而吾目亦可瞑矣歲乙酉歸昧其兄嫂而返重以畱都庶子之殤
積勞茹痛疾益劇竟以是不起九月八日也距其生年已六十周
矣卒之日矚其橐無尺寸絲枲錢刀之積以私其所生女也夫小
星之恩無敢專夕其施者猶稱惠也而鳴鳩之均一於其子然子
猶己出也今孺人惠徧於妾忘其施以安之而妾亦安於其惠恩
加於子忘其不出於己以愛之而子亦相忘於其恩至始終不敢
以佐夫起家有奇羨之入而眎嫡女庶子毫芒厚薄於其閒也可
不謂賢哉是足以銘而傳矣子男二長夢龍太學生徐出聘蘄州
守漢畦路公女次夢禎顧出聘鄉進士敬塘許公女女六一適進
士止庵唐公子德明一卽子子婦一適雲南憲副無錫崑源華公
子道任皆孺人出一適大成尹溧陽豸泉狄公子期遠某出先孺

人卒一字鴻臚序班鵠源吳公子振英顧出一字鴻臚署丞溧陽
仰湖馬公子中化徐出葬以丁亥某月某日於某山之原銘曰
婦德含章毋襲外權柔巽靜專曰不敢先無子而子其以孺人之
賢可傳而傳其以予太史氏之言

兒婦蔣氏墓志銘

萬曆十五年八月二十八日子次兒亮婦蔣氏卒爲之卜地卜日
襄厥事得負郭西南隅稱吉壤得明年正月初六日稱吉期將命
亮舉其殯而藏焉而亮之悼亡傷離甚也乃次第其生平之狀請
於予曰兒不孝以婦故貽感大人婦不幸以天年故不獲終事大
人而其疆爲善之心雖死未亡惟是墓中石大人儻賜之言以不
朽乎予聞而益悲憐其意茹痛按狀最其凡以志之婦蔣姓常郡
武進邑人爲予春坊諭德兼翰林院侍講吳中行之婦爲予兒郡
諸生亮之妻父曰按察副使毅齋公母曰暉宜人宜人所有女五
而殤而夭獨婦在室愛之甚憲副公見子兒齟齬時謂此子也才

而字之予見十五歲謬以諸生高等應試憲副公與宜人則喜相語曰吾弱息非凡女而今所託者亦庶乎非庸子哉婦十九歲歸予家予時以抗疏忤要臣受杖編戶而憲副公亦以予葭莩之故移憾調官歸兩家俱從宦乎而予故貧又多男先尚寶所遺敝屋薄田羣子婦而聚廬託處人一椽耳擔石之予僅可給饘粥而婦生於殷盛予兒慮其驕又慮其汰而不任予家婦也婦乃不難挹損若素習於勤嗇者更唯唯共謹相其夫不敢有違言忤色事舅姑甚莊而有禮其姑毛孺人之待子嚴於父及待諸婦則慈於其母濡忍煦育若惟恐傷之者而婦於諸婦中尤能順承曲得其懽是以婦恆自喜語其夫曰吾侍吾姑如吾慈母也予兒勉兢修飭婦則以儆儆成之兒有過而予或譙訶則皇皇不自得兒有微善而予或獎許則又忻忻然力從與於其間是以予兒恆自喜語其母曰吾得吾妻如吾益友也生朝節辰閒舉觴觴舅姑及其父母必精虔鮮腆而自奉則甚菲常禮佛茹蔬其夫與四三兄弟修

業寄食於他所則與媵婢共麤糲而餐日不二盞月不一肉妝奩衣襦之飾擇華珍者旋鬻之拮据經營什一之息以佐其夫楮墨之費處內外上下疏戚尊卑劑量輕重接以文聯以情斤斤如也而又怡如予賜環起家遠在邸里再閱歲癸未季兒玄當授之室甲申幼兒京聘劉喪父母無所歸當迎之於家綜理區畫於上予兒主之而閫以內一切僅餽槃悅之事婦任之敏給詳慎靡不頤指辦者素有志操以干求爲恥每歸寧絕口不言空乏頃謀置旁近第數楹知舅姑之橐若洗也不敢使之聞其父母聞而助之半復別爲稱貸而益之半在父母所曰吾舅姑佐之在舅姑所曰吾父母周之其於舅姑不欲貽累又不欲貽羞而於父母則旣歸德又分德於夫之家蓋周旋彌縫必人人悅事事善乃已類如此至於易簀時則又舉其所助半貲與向所授田百畝令亟還父母家以全其夫之義也藉令婦而爲丈夫必不以困窮干人以貨財污其身可不謂賢哉其成疾以不娠故恆自鬱邑弗能釋始而血上

逆每一發嘔幾數升既而骨蒸肉瘠今年病漸劇其父母憂之爲
延醫灸艾而病愈益劇嗣而診切之者曰尺脈洪他脈無恙當有
娠而甚羸灸艾誤矣婦聞之且詫且恚曰吾有子死可也吾無子
生亦何爲噫嘻此其終不可解於心者乎然不專意於己之娠而
又屬意於貳己者之娠也擇聘良家子至脫簪珥不恡且親爲之
膏髮理容卽有子若不必自己出者此其在夫婦少年相懽之日
亦可謂難矣病且革第睨而謂其夫曰吾舅姑之所祈我生良苦矣
不以婦視我而以女視我也言訖遂長逝婦生於嘉靖四十一年
七月初十日歸予家八年卒距其生年二十六耳嗟乎痛哉已承
祧而祈於肩之昌夫業儒而斬於名之揚婦之所深願焉而今齋
志以往矣夫百年同穴四時常饗人也奕世延祚五鼎馳榮天也
人可能者盡之天不可必者俟之皆庶幾於異日者婦而有知目
且未瞑乎予言至此泣乎淚潸然也不忍文又不忍不文予銘之
令予兒書之而納諸壙中銘曰

女而順婦而賢嗇於後斬於年豈其未定之天高而冢廡而原祐
之篤肩之縣庶其可俟之天而翁匪諛而媿可傳藉茲一言慰而
九泉

賜餘堂集卷十四

祭文

祭余相國文

壬戌禮闈余兄校士得公試文汪洋橫恣禮樂廷敷予兄供事幸
公鼎甲光榮倍蓰希世至珍空羣上駟因之定交遂稱知己恩義
之酬弗忘所自公既先達予方弱齒降禮通家亦微明賜公佐成
均予始登第推分後生乃塵中祕引掖斯勤誨督彌至及予狂蒙
削籍還里越在草莽負疵俟死卵翼護調不言所以頃予賜環值
公贊理薦拔殊殷燕閒每侍略分忘形洞徹底裏自恃因緣正切
依倚予安做乎公今已矣惟公之身中外所毘惟公之名竹帛所
紀贊公悼公更僕未易予述予衷固不在此惟哭其私傷今追始
哀豈無從漕焉欲涕

祭劉太宰暨夫人文

惟翁之德滄溟喬嵩惟翁之位名卿鉅公媚茲天子國有豐功寬

然長者鄉有高風一詞莫贊更僕未終而我深痛獨在私衷翁佐
司農予方筮仕降禮忘年烝烝桑梓處尊牧卑敦薄寬鄙足爲儀
刑實勤仰止汪度如春周行若砥吾儕所視惟翁所履翁之南徙
握樞秉銓因失柄指遂致煩言翁罷居里予譴歸田豺狼當道龍
蛇之年罪由鱗逆禍不踵旋世所共惡翁乃獨憐自謂暮齡僅遺
弱女離裏屬毛不絕如縷子不棄子子亦習汝子女汝兒予將汝
許百世之盟訂於一語不勞媒妁不煩筐筥予挈子兒拜翁之堂
翁與夫人燕喜相將視我猶父呼伊曰孃可稱有子詎云東牀及
予召起別翁倉皇一違顏色再易星霜翁力未衰而神更王蒲輪
且徵輿情繫望棊局詩筒每誇豪壯胡然無恙溢焉長往真耶妄
耶尙懷恂恂俄復傳言夫人屬纊驚魂甫定痛淚乃流知翁隱抱
傷於幽憂骨肉之累竭歷爲謀手援何策心痾難瘳顧瞻其後誰
可箕裘電煙石火華屋荒邱兩櫬一堂虛帷敗壁燈慘失光爐燼
欲息孰主蒸嘗孰爲踊躅嗟乎痛哉行道淒惻繾綣若予俯仰今

昔回首幾時轉瞬陳迹翁目瞑否我心盡未大塊有終此懷無已
媚視子均情緣義起一杯之土四時之祭凡可酬恩弗忘沒世先
酌一觴遠將千里

又祭劉太宰暨夫人文

嗚呼翁與夫人之切也日月不居垂及暮矣曩予守官於邱嘗絮
酒緘辭以志今昔之思頃予請休沐於里見翁之女炯目豐頤宛
然翁之遺體益不勝感慟而嗟咨今翁之嗣扞罔亡命去不知所
之兩柩煢然四壁頽兮青鐙宵黯黃腸日灰音塵絕遠精爽疇依
朝晡孰主窀穸何時儻風燭之不戢雖悔曷追予有葭莩之誼託
在肺腑其責安能辭而況爲之女者惟二人是懷若九原之魄一
日未歸則寢不寐食不飴生本由胞痛且折腸更奚所待而委之
誰情弗容已禮固所宜予遂率予兒暨翁女黽勉以襄厥事蓋附
於身附於棺必誠必信在地下者惟餘力之不遺而國恩家乘次
第圖之凡在地上者可漸舉而有期道傍甲乙不無差池苟可以

盡吾心畢吾力質之仁人君子而弗疑不爲名計不爲利來庶幾乎無所爲而爲毫芒匪私寔詎女之爲其親者念茲釋茲而予之所以報翁者亦在於斯矣至於翁之德人心所繫翁之名史筆攸司翁之榮當代所希翁之哀薄海同悲賜祭予葬厚卹隆施易名增秩寵錫制詞然則翁之所亡者獨嗣耳而其所不朽者元祀豐碑愈久彌光又何有乎涯涘惟予衷之哽咽豈無從而涕洟皇皇丹旒蕭蕭素旂一往千載傷哉噫嘻椒漿再陳肝膽爲披翁與夫人知乎不知

祭曹司空暨配呂夫人文

濬祥荆水殖秀銅峰敷歷有年夙夜在公海以內孰不知公之勳庸折獄秉文宏施石畫九列入座崇功丕績海以內孰不被公之德澤嚼然準標卓乎耿介言可爲律行足作楷海以內孰不瞻公之丰采未老懸車東門祖帳稅駕巖阿棲心玄曠海以內孰不羨公之高尙夫人媿德令子接武達尊有三嚮用惟五海以內孰不

豔公之祉祐白首齊眉康寧清劭愛日正長婺星並耀海以內孰不祈公之壽考邦之著蔡鄉有老成山斗在瞻庶幾法程海以內孰不仰公之儀刑門遺五柳庭植三槐祈連開兆宮保上台海以內孰不謂公之生榮死哀惟公仙游值子錦旋偕老同歸不後不先海以內又孰不謂公之子以孝感以誠格而無憾於終天不佞與公之子同升倚玉久交斷金公亦忘年降德接遇良殷附絲緣蘿遂締婚姻永佩明德常奉清塵遽隔警咳遂成古今盈盈雙睫耿耿寸心操觚傳公勒之貞珉執紼送公薦以清尊

祭沈墨山文

語有之知生者弔知死者哀予於公未面承而聞問已稔不可謂之不知也予於公之伯子稱心交而顛隕與偕不可謂之止於知也何以哀公哀而適以爲榮何以弔伯子弔而兼以爲慰以身許國公所期也伯子慷慨抗章綱常是植大義攸存微軀何惜此奉公之教以爲忠也以官爲家公所鄙也伯子歷數有年貨利不殖

里競千廂家徒四壁此奉公之教以爲廉也國而忠家而廉公之所望其子者靡不得而不足以爲榮乎不敢愛身臣之節也伯子萬死而生公心則懌再起而廢公心愈適此以志養而不因百折回也不皇將父臣之情也伯子屢辭仕籍承公顏色因居子舍奉公牀簀此以體養而不願三公易也內而志外而物伯子之所效於親者靡不得而不足以爲慰乎至其先民矩矱大雅典刑鴻漸爲儀鳳覽足程公自不朽亦何藉於子乎而公之自爲榮者遠也若夫煢煢在疚因之避聲眈眈足畏或以銷萌伯子雖不幸亦暫免於世乎而予之私爲伯子慰者深也以榮爲哀以慰爲弔知死知生匪諛匪矯予之斯言何敢他告公於九泉亦足一笑伯子與予久要爲好戚休是關邱壑共保涕豈無從心惟可表寓此清觴陳於丹旒公神洋洋予懷悄悄尚期謁墓盜俟宿草

祭黃容齋文

人而入官者於權力熏炙之門不資進以爲利厚亦引退以爲名

高而公則容與於其閒嚼然其不辱身也仕而處鄉者於資世憑陵之時不居閒以恣胸臆亦行污以競錐刀而公則恬泊於其閒澹然其無染指也及夫世路清夷謂公之休問方借以爲重而公顧邱壑是安高尚不事未嘗抵政府之書茲所以卒老於行也至於家人生產意公之高蹈必視以爲輕而公顧勤儉爲謀伏臘自給未嘗闕滂歲之資茲所以無求於外也乃若家庭之訓孫子之猷肅肅羽儀温温琦玖動容中規軌物是履穆如修風冲若玄醴貞匪絕俗隨不爲朋典刑伊邇縉紳所憑蓋皎節徽稱更僕未易數者亦既聞達於家邦矧生平當紀懿鑠宜揚屬鴻詞豔裁以垂不朽而信無疆不佞菲謏無能爲公表章又以編戶齊民弗敢承表阡誌隧之命卽交游弔唁且久廢於冠裳然而於公也此衷沈鬱有懷惻愴不能不終吐其藏者不佞伏闕之震撼公已易簀而動勤蓋嘗撫時感事義形於語心折而傷豈亦拘方之曲見是爲旣世之剛腸真有槩於天明地察民彝物則之良藉令公而廊廟

亦安能員神達節爲根柢之容舖糟啜醢而如狂然則不佞之蒙
瞽干雷霆而歷冰霜今已溝壑瘠耳猶滋詬譏無所告語但交致
貶謫我躬之恤而未遑質公於冥漠之鄉也嗚呼生死大夢榮瘁
靡常惟譽可永匪年之長此心或喪雖存亦亡我懷悄悄公神洋

祭惲少南文

嘗聞感恩易知已難蓋自昔所稱世道交喪伎倆相形朋與輩埒
伎嫉遂萌矧負才挾長更易憑陵公也絕人之稟邁世之英爲先
達先生而不佞以通家末學與其進而趨承何足當公之矚睽而
忘年折節諄諄焉獎借其所未能不佞操觚學菽公則手其文曰
此子也才庶乎其有造也而終冀其一鳴不佞伏闕被罪公則手
其疏曰夫夫也愚嗟哉其無他也而猶幸其再生不佞守官史局
公則緘辭繫帛問訊頻仍披衷示愍而屬望我也意念匪輕不佞
移疾故園公則下榻倒屣旦暮逢迎掀髯抵掌而誨迪我也肝膽

盡傾惟公之曠度虛懷片善在人不容若己而禮賢好士本出乎
誠雖不佞樸遯在下中惟恐名譽弗彰故爲游揚其聲又惟恐步
趨弗前若欲相協其行公蓋以國士遇我而溝壑之瘠二毛漸見
百事無成奚以圖不朽而報公知己之情此懷欲結有淚如澗若
夫精神丰采歷履生平公所自爲誌多隱約其詞僅以出處自明
而鴻碩之紀載則於銘傳乎足徵茲所告語者一念之私不容已
惟公垂鑒於冥冥

祭李封翁文

維揚之墟元精屬斗慶澤攸鍾祥源孔茂有開必先厥生匪偶惟
翁之生爲天特厚厚之伊何誕毓師臣掄魁端揆爲邦家禎斟酌
元氣潤澤生民無虞四海有懷二人寅亮旣成孝養斯篤鼎釜郵
隆恩綸載渥囊解疏金里趨石轂顏映袍緋肌凌帶玉濬發由積
數沃乃豐滋仁嗜義樹植者崇式穀伊子食報及躬與世更穉延
祐靡窮遡德祝釐寰區手額達尊有三聚順惟百人所難期翁其

兼獲炳矣邦儀昭哉世則高山巨藪弗田弗舟蒸爲雨雲功施九州卽躬弗致而志則酬薄海下土舉藉翁休胡不百年綏茲遐祉望繫朝紳訃聞宸展榮哀若翁古今能幾令終全歸怛焉化已某等辱與令子後先巖廊久資德範爰想義方因生知死宜弔且傷東芻絮酒菲陳遠將

祭張封相文

代作

古郢名區光嶽閒氣發祥誕聖肅皇聿起景躡雲從必有名世惟翁之生實當其際生雖應運出則後期鬱礪良久流行乃奇孕毓師相翊贊明熙莊皇憑几顧命受遺天子眷沖恭己而聽師相忠純矢心以應九列平衡四方底定孰非翁休普天胥慶聞翁蚤歲擅菽雕龍被服儒術蜚聲學宮修儀玉立曠度春融滋仁嗜義封植者崇高山大藪弗漁弗畋蒸爲雨雲寰區殆徧匪施自躬卒酬所願綏祉凝禧受天之眷殊恩異數晉錫日豐遡德祝釐薄海攸同蘭桂滋茂鼎釜卽隆與世更穉食報匪窮疇稱嚮用雅詠駢臻

惟百聚順有二達尊翁身兼享人代希聞令終全歸不亡者存我心孔疚豈爲翁悲師相在戚朝野共摧身之去留國係安危師相有心天子是葵漑血陳情誠貫金石慰勉更殷大義是責元臣託孤左右馮翼天子曰咨烏忍予釋移孝作忠惟翁雅懷抑情爲國師相念哉圖其大者備極榮哀臣子之式昭示無涯某菲謏受知追隨在列感念獨深憂惶更切九原可贖百身奚恤匪以吾私公家是急

祭張封相文

代作

惟天純祐爲國生賢生之豈偶有開必先扶輿靈秀蘊崇孔厚鍾於翁身濬發厥後於赫師相社稷所毗端揆握樞晉熙帝紀純忠既孚凱澤則普蕩平之理登諸三五薄海下土孰非翁休卽躬弗致而志則酬深山大澤蛟龍出焉神功寂若德施沛然宗功懋賞推厥所自蟒玉龍章榮施渥賜寰區手額遡德祝釐四方胥慶千齡爲祈滋至駢臻福祉忻邕惟是蘭蓀賓興臚唱嚮用有五順聚

惟百人代希聞翁身兼獲翁之承之履盛持盈斂華葆晉日惟兢
兢玉潤春溫繩趨矩蹈身賁邱園計關廊廟訃音忽傳九重震惻
爰及百工憂惶而色師相匍匐痛折肺腸溫綸宸翰慰卹不遑帝
日元輔顧命受遺儻汝舍予予將疇依移孝教忠雅惟翁志英爽
在天豈不念此相道彌光翁靈則憐子臣之極永爲世式某等追
隨師相疏附巖廊久承德範因想義方私悼由衷公念在國薦醴
惟馨陳詞告愾

祭馬太公文

陟嶽知顛飲河遡源深山大澤龍蛇出焉於維我侯萬民所怙爰
有我翁眾父之父翁安侯養民安侯治一日蒙休二天垂庇維侯
下車邁歲之凶勤恤多方切身若洞赤土蒼生枯魚涸鮒哀此子
遺實侯之祚維侯貞憲民風丕變詰允平冤鋤強佑善猾胥竇塞
豪右蹤藏不吐不如能柔能剛曰維我翁匪侯之力家有嚴君義
方是式維侯端軌化行菁莪士知嚮方爭自濯磨乃以作人匪緣

飾吏濂洛真儒侯承其祕曰惟我翁式毅似之侯表多士是帥是
師維侯率屬乃僚濟濟不事微文聿崇大體四門穆穆賓至如歸
外儼秋陽中藹春暉曰惟我翁夙閑禮教侯正四方是則是效棠
陰初布蒲輪未迎日月幾何霜露忽零昊天不弔奪翁之迫殄於
其家瘁於其國嗣侯者誰極盛難繼寇借無能何思曷既黔黎聚
哭素旌遄奔莫贖百身欲扣九閭先君登第南陽司訓從游大方
服聞休問病廢隱淪蒿萊蹤跡陳說生平猶然記憶褰帷問俗侯
其咨詢夙昔之誼禮意良殷推翁烏屋抉我雀羅傾蓋若故鑿坏
自疏爲侯子民視翁父黨諱音倏臨哲人安做願予私悃倍彼恒
情今日之弔不獨知生束帛遙將生芻敬薦意豈詞宣衷惟神鑒
鄉同年合祭吳座主文

闔閭之江厥水清駛浴日涵雲篤生夫子德粹璠璣文鏗璫珥大
廷首對巍科蔚峙名齊晁董職凌左倚簪筆螭頭橫經豹尾位日
以崇澤施伊始畏途多岐高德受訾扣闥乞骸挂冠若屣碧湖攬

秀丹崖濯滓蒼生繫思謝傅未起獨寤弗諉幾盈二紀月旦風聲
商山角里典刑忽謝斗山遂圯辛酉之秋南畿造士衡鑑高懸精
勤自矢五色不眩千林皆喜既收魁奇毋遺葑菲上臣元僚今方
濟濟門牆所植社稷是毗某等樸荻亦名桃李矧蒨葍更接桑
梓訃聞最恫有淚如水恩重南豐感同無已於粲荔蕉式陳總几
靈爽在天庶其鑒此

內閣祭成國公文

天惟純佑國有元勳功宗世昨累代令聞葉傳四五惟公篤祐嗣
服孔昭象賢接武顯庸四紀翊贊三朝具瞻中夏樹表羣寮謙光
几几冲度恂恂金相玉質海納春温華寵存崇忠貞愈矢夙夜在
公惟天子使南巡扈蹕西內直廬史垣監纂督府秉樞郊廟時承
聿虔將事弼亮有作勤勞獨至居盈克畏兢惕自持惇倫慎履抑
抑委蛇疇稱攸好雅詠駢臻若公德福世亦罕倫茲邁昌辰方資
耆輔胡不少延倏焉承訃小心不積素簡哀衷褒贈特厚昭示無

窮老成云亡儀刑日遠薦醴陳詞寫我哀惋

同郡奠成國公文

天惟佑命國有元勳宗功貽澤永世令聞傳葉四五惟公篤祐光
裕獨隆象賢接武顯庸四紀翊贊三朝毓祥既厚嗣服孔昭守典
承休正色率下樹表羣寮具瞻中夏謙光几几冲度恂恂崧高玉
立海納春温華寵愈崇忠貞益矢夙夜不違惟天子使南巡扈蹕
西內直廬眷倚特至勤勞罔渝監修史垣秉樞督府允武允文惟
申惟甫時承郊廟將事聿虔垂紳端笏弼亮有年履盛持盈惇倫
好禮貴且目抑祿不期侈恭儉惟德爲百辟先臣極既立天顯克
全由親逮疏扶窮卹困恩聯愛浹施予不靳疇稱攸好詩詠駢臻
惟公德福世所罕倫茲值昌期稽謀碩輔老成儀刑方資疏附未
幾邁疾山斗遂亡訃告忽承朝野盡傷天子曰吁失我元老異錫
殊哀用寄憫悼享愉綏祉生榮死哀簪纓紹美蘭玉多材作式無
疆垂休不朽目瞑神安夫復奚疚公產南服桑梓繫思而於常郡

情尤倍之微惠有緣締好更篤凡屬葭苒夙承優渥矧某等同朝
廁籍出入從公雅沐厚誼共感私衷瞻仰靡由歆獻獨切菲奠斯
陳眾心欲結

中表奠成國公文

於休哉翁也席累世之元勳爲三朝之碩輔歷四紀之殊榮繫羣
寮之快覩其事上也夙夜匪解丹衷矢翼翼之盟其接下也吐握
不違赤舄效几几之誠其飭躬也恭儉惟德可以爲守典之儀刑
其惇倫也孝友彌篤可以爲永世之法程蓋立朝則終始罔渝盡
臣道之極承家則光裕郅隆作侯度之式簡注在帝衷德澤在人
心勳名在世乘懿鑠在國史固未易以言亦無俟於某等之言者
第某等於公之逝也哀悼獨切而歔歔涕泗之不能已者則有私
情深痛者在焉惟翁毓秀南服特重桑梓之思惟某等微惠有緣
尤荷葭苒之誼愛浹仁聯恩周義至以疵賤來者每獲藉其維持
以窮困歸者更弗靳夫贈賜凡我同儕中表之戚孰不沐深仁而

蒙宏庇夫翁之施德也如冥鴻舒翼盡所覆而並育某等之被澤
也如鼯鼠飲河隨其量而各足共戴恩私敢忘優渥今二天之疇
依卽百身而莫贖薦醴惟馨崇肴載馥眾心沖沖公靈穆穆

祭歸憲副乃翁文

代作

惟靈含懿養潛握瑾抱璞吳門隱君胥臺右族令德金相芳聞蘭
郁厚積厥藏薄施所蓄少厯艱辛茹苦食貧遠賈徐邳後已先人
慷慨仗義齷齪匪倫周旋蹈矩言貌惟恂公役勞勩馳驅罔替天
顯人彝克敦孝悌恤窮好施持券讓地休貽後昆業承永世惟天
遂良陰隲之常德足昭受家日熾昌厥有令子鍾靈毓祥慶由善
積淑以義方瞻彼天衢鸞翔鳳翥試政報成躋華諫署中外厯敷
勳名久著服膺教言夙有令譽鄉評謂公賢躅高風推德讓齒飲
於學宮茂祉駢錫渥典榮封熙朝逸老福履方崇昨者令子適還
桑梓萊服潘輿晨昏杖几公戒治行亟趨帝里爾職惟供我心則
喜順志承顏孝孰所先含情就道東裝北轅僅踰數月哀訃驚傳

號奔躡踊摧心裂肝雖然躬備純休年躋遐壽流譽無垠垂芳不朽生榮沒寔良亦非偶魂安神怡夫復何疚某等辱交令子夙慕清芬素心未展年誼實殷公靈未泯丹邱白雲遠陳合奠酌以斯文

同年合祭潘年兄文

嗚呼自昔有言天惟難諶人不可測或有厚其賦而收之速豐其才而與之嗇者此李賀弗延冉牛斯疾乃理數之至奇爲古今之所共惜惟靈雲間毓秀海濱發祥材掄梗梓器重琳琅東吳邁迹南宮振芳固已身際其遇况復時值其昌正擬大顯所積盡發厥藏將以翱翔霄漢黼黻廟堂忽爾承訃溘然早亡官未沾一命之寄壽不逾三旬之長夫既厚之卽收之豐之復嗇之又孰從而詰之彼蒼豈珍調失節葆攝違方或至此耶抑窮通有數修短無常而竟止是也雖然照乘之珠用晦夫光斷犀之劍弗耀其銛蓋造物者固宜靳且奪之矣生之如寄化也若忘不虧形色奚問彭殤

達人蚤辨順命何傷某等竊幸登龍實叨附驥誼關戚休情均兄弟昨者楚之謝先萎燕之郝繼逝已爲同榜之悲而今也復因君以悼悻緘詞寄哀臨風隕涕

同館祭趙溟南乃兄文

嗟乎鳳翔千仞蛟蟠四澤世之人莫不翹首而挹其輝跂足而俟其液顧一旦戢鱗殺翮與常羽凡介同者此其故孰從而詰之也耶於惟趙公名列一等身既遇矣秩在五品位且崇矣政司一方責亦鉅矣凡挹公之輝俟公之液者咸望其竟出厥施盡發所積何乃牛刀初試鷺車載揚中罹蹇鈍卒復徊翔劍芒僅露寶耀終藏景悲逝水木隕繁霜天平叵測命也何常語有之劍之匣也化不踰年寶之櫝也求不越宿令公負器蓄才握瑾抱璞斯與剗犀之劍照乘之寶無異焉則造物者亦且忌之矣其鳳輝蛟液卒泯泯沒沒而不得振翰層霄爲霖九陌也奚惑哉某等與次公溟南君同舉春官復同入祕館追隨朝夕有兄弟誼焉則於公亦伯仲

流也方擬諏辰納贄登公之堂以明通家之分且冀公與溟南君
聯珂並簡承皇之寵以爲華國之珍而今慶甫在室弔且及門豈
盛美難并滿盈當損遂使善人之弗穀胡爲乎我公之不辰雖然
後有子以顯世今有弟以承親雖云齋志之爲憾亦可瞑目而常
忻某等未遑荆識忽承薤聞怛焉舛望盡矣愴神崇肴以俎載酒
於尊格公靈爽鑒我芬醑

祭李少卿恭人文

嗚呼疇不爲婦惟恭人之爲少卿婦也視少卿之賢而知其賢疇
不爲友惟予二三子之與少卿友也視少卿之戚而與有戚是故
於恭人之喪也旣興夫惜逝者之悲又不容不致夫知生者之弔
也弔而爲之詞曰夙昔狐鼠依憑城社內柄彌光外廷所藉少卿
豸繡起而彈射履尾嬰鱗此生須舍事所當爲人豈無志牽於內
顧因之中止不有恭人孰成夫子惟璧儷球如蘭嫓芷至其賓祭
無愆敬順是將乃燔乃炙於篚於筐惠爾室家宜於姑嫜闔儀弗

忒婦道之常頃者帝鑒忠直崇躋殊錫榮境方長安途足適慶弔
相隨邁難孔棘殲此賢淑形離世隔雞鳴失傲麟趾乏祥所不亡
者蘭馨璧光少卿所戚吾曹共傷申以菲奠侑以斯章

祭王太初母文

於鑠王氏代有聞人箕裘克世今有黃門黃門之母深山大澤龍
蛇出焉其文有赫母儀是則子道用章三遷式穀千仞甫翔績奏
神明聲馳垣闈姤節修能矯矯自拔大道日喪末俗風靡如脂如
韋善宦乃宜而獨黃門橫流矻矻惟直惟忠無以有已泉源木本
實惟孟陶母安於室子效於朝躬御板輿正伸榮養順聚懽承志
愉神王將持使節因奉晝游胡然邁厲倏爾彌留子背慈闈翁失
良偶天乎不仁疚心疾首虎豹在山藜藿不采黃門跣奔善傳體
解我等之痛爲公匪私情緣義起合奠陳詞

祭毛岳母文

母之懿行內外稱良所當闡揚者中行勉圖之不敢讓也母之厚

恩江何並長所當銘鏤者中行永存之不敢忘也中年疾疢晚歲
康强大耄既壽令終亦臧孝養極備蘭桂眾芳凡所以奉耳目愉
志意者惠迪全昌子之心可無憾於桑榆之愛而母之日亦且瞑
於冥漠之鄉矣第中行罪臣編戶幾爲魚肉者亦閱寒暑而母則
休戚相關竊爲惶慮今已蒙恩賜環就榻握手而母則精力方贖
不可告語行李紛紜又不獲淹留信宿俟母之間而爲訣也丙夜
解維辛含痛茹前驅祖道聞母稍安回首慈幃我心暫寬別來旅
次訃至江干逢迎旁午肺腸若剗兒女之前且未敢言有淚承睫
無路憑棺嗚呼傷哉

又祭毛岳母文

母之聖善既銘幽宮母之恩誼永佩深衷母之福祉大耄令終母
之脩祚蘭芬桂叢聿隆孝養亦貽朗融獨予之心私有所憾方予
遠行值母大漸長別臨岐何勝繾綣僅踰旬日訃至淮甸恨不須
臆視母含斂予妻念親百爾悽怨音容一隔再歷周星弔唁都遺

回首馳情忽傳窅窅擇吉春明服官在列執紼無能予妻聞之涕
泗交零喪不憑棺葬不臨穴生女奚庸銜此永恤心所弗寧禮亦
終缺遠託椒漿聊伸煩鬱瞻埽封塋以俟異日

祭公孺人文

惟靈婺曜儲精神元毓厚於穆孺人生良不偶展矣碩媛蔚哉世
胄令尹之配太史之母臬憲名卿實維其舅闈儀有翼婦職恪共
蘋蘩聿屬克孝克恭爰相厥夫宦轍於從內政罔怠樹績花封貽
穀其子有孟陶風義方慈育振彩登庸奮跡詞垣蛟騰蠖起燿燿
聲華輝燭閭里子芬旣揚母心則喜茲被覃恩褒惟賢妣錫以新
章降之繁祉繁祉方至胡邁閔艱舅失介婦孰爾承顏夫喪賢配
榮榮在鰥太史驚訃涕泗潺湲方將毛檄未遂萊斑豈圖衰絰匍
匐以還嗚呼生死其常修短亦數矧躋中壽茂膺嘉祐食報未涯
垂休正裕天於孺人可謂無負某等先世同升夙稱仲昆後嗣通
籍幸惟眾繁年誼世德矢交弗諼合情共愴千里九原東帛陳俎

脩以斯言

祭蕭母文

於惟蕭氏里稱華閎始嬪於蕭元配曰畢畢既中摧母乃作匹婦儀克慎閭職載司令德繼美蘋藻肅持靜莊婉淑家室允宜爰撫遺墳視若己出矢力扶將咸冀成立屬離匪殊恩聯愛浹偉哉家嗣懋植好修天衢振翼地曹佐籌亦有叔季燦燦琳球翁得賢助賴以頤老子藉慈闈因之鞠保母於蕭氏功勤不小方崇祿養宜永壽康侯傳訃訊冢嗣盡傷生不由胞痛則折腸嗟昔履霜千載所嗤今母徽音誠可懷思由今較昔孰爲得之垂聞作式不亡者存矧躋中壽永貽後昆聲流百世神安九原某等與冢嗣偕薦鄉書茲聯邱里共惋於衷實緣厥子合奠申詞靈其歆只

祭潘母文

於赫潘氏著姓雲閒奕奕名宗上卿碩輔朝野具瞻實惟司空揚休嗣武顯融用章矯哉次公次公作儷曰顧夫人胄閎並崇蘋蘩

既屬閭儀有翼婦職克共公久在事賢勞皇家績勩日豐旬宣保釐經國餽餉社稷之功毋煩內顧藉茲賢妣主饋閭中舅姑宜之承驩聚順是稱孝恭貽穀伊子義方慈誨有孟陶風綜內馭下修能媵節作則自躬大家懿矩士女之行肅肅雍雍世德邇帝制渥錫譽命褒封公晉藩伯驅車入蜀夫人於從使節載旋魚軒在道奄然令終悼離悲淑長途返櫬有懷煢煢匹翼乖翔連理摧枝云胡弗恫徽聲賢胤生榮沒哀遺芬靡窮深山大澤龍蛇所出食報正隆雖亡若存修短有數亦惟其逢不佞同里後生斗山儀刑嚮往於衷公之上世系本毘陵中徙吳淞因念桑梓乃締葭莩愧蘿附松東帛陳俎脩之以詞寫此私衷匪物之侈而意則敦惟幽可通

祭朱盤石文

天道無親常與善人斯言未信自古迄今嗟嗟盤石如玉如金飭躬翼翼雅度恂恂語必無妄足若有循甘貧守寂蓬戶席門多能

游菽操觚運斤交游若予久要是敦昔歲丁丑長星示禔際予狂
謬抗章扣闥顛沛之中形影無親編戶居里朝夕相尋惟予寡合
素無雜賓花前月下惟予與君頃以移疾乞得閒身君不鄙夷過
從更頻下榻環堵酒闌夜分回祿作厲君乃邁氛投閣之災傷乎
子雲作善逢殃問之鬼神鬼神茫昧禍福無因嗟嗟盤石生何不
辰幻軀寓形草露隙塵蜉蝣旦暮八千秋春總之有盡歸於無垠
九泉一笑君且忻忻陳詞寫痛聞乎不聞

祭武安王文

丁丑之冬是月是日長星示禔大倫倏滅人心若狂士氣盡鬱憤
世激衷抗章伏闕洊驚雷霆已甘鈇鉞仰藉神靈俯垂陰騭惟籤
惟夢告之昭悉在上在旁相之協吉再造之生九死而出蘊此精
誠終身對越居諸若流馨香永設

祭家廟文

辛卯

我吳積善傳聞舊矣祐篤於前至二親而逾懋慶垂於後逮六世

而寢昌第十名宗因可行子也第三名亮第五十五名玄中行子
也第八十二名宗奎尚行子也翩翩而起是同祖之孫滾滾而來
非異源之派蒙麻甚盛懷懼滋深謹以鄉書奉聞家廟因陳薄奠
用表微衷

祭西湖南山文

癸巳

相彼一壑營將廿年蚤從編戶既請歸田國恩未報世念猶牽歲
且儉入囊如罄懸因之在再久爾稽延時事漸非宦途更艱簪纓
畏境泉石良緣遂銷百慮乃構數椽蒹葭蒼蒼楊柳芊芊春疇平
野秋水瀾天鳧鷖自適魚鰕足鮮邈迴從之樂泌悠然市交既息
家累宜捐知足不辱未老亦傳菟裘之計耕釣終焉明靈垂貺陰
相其旋萑苻不警松菊長妍環流洊秀磐石永堅爰諏吉日聊陳
菲筵微爾巨庇寫我微虔惟諸神共鑒之

哭冢兒文

嗟乎痛哉予冢兒雍以萬曆十九年二月十八日邁厲嘔血奄然

近也越二十四日蓋辛卯年辛卯月辛卯日既一七矣館舍倏捐
音容伊邇猶庶幾旦暮遇之兒果舍我而長往乎我則安能舍兒
以爲生乎兒之負奇養銳而何發之遲乎兒之稟慧存良而何奪
之蚤乎豈兒之遭蹇逢奇而適之窮乎豈我之積愆叢孽而故罰
之酷乎我之所以望兒者佚我老奉我終而願使我送爾之亡乎
兒之所以慰我者揚而名顯而親而願使爾齋志以沒乎兒之抱
疴已在膏肓而猶諱豈以貽我惟疾之憂乎親之視子不及醫藥
而彌畱寧不重我若是愬之憾乎嗟乎痛哉二人在堂髮且種種
兒無明發之懷乎諸弟聯席誼且怡怡兒無樂聚之思乎今父母
兄弟戒庖治俎憑棺臨几而哭之兒有知乎無知乎侑兒以酒而
欲哀兒以文也一舉念則五內如崩一舉筆則兩淚若傾言詞咽
哽意緒縱橫千傷萬悼腸折魂驚旣不能紓我之結約又不能述
爾之生平嗟乎痛哉我鬢已星我眼猶青屢辭仕籍善忤物情其
無庸此身乎尚有裨於世乎可以死乎未可以死乎如可以死也

何不死我而喪兒之生如未可以死也何必死兒而傷我之生今
而後我雖欲保我之生而兢兢兒雖欲護而父母之生於冥冥而
割心摧肝鑠髓銷精俯仰古今骨肉幽明豈再造之軀所能勝豈
始衰之境所宜經嗟乎痛哉兒也室無選行里鮮惡聲然諾頗重
施予亦輕坦衷豁度寡營絕爭澹泊能甘矩矱是程年逾顏氏嗣
衍徐卿歸全終令存順沒寧總之同盡奚以修齡聊寫我恫用酌
爾靈嗟乎痛哉有肴斯潔有醴斯馨一滴九泉兒猶能引滿舉盈
此觥乎否耶

哭冢兒冢婦文

嗟乎吾兒雍捐館舍已兩歲又兩月矣爾之婦陳氏淒然稱未亡
人而復奄然逝也茲將舉兩棺而瘞之爾父率爾諸弟聊舉一觴
以酌之爾靈耿耿我心沖沖嗟乎吾兒雍爾旣舍我而去而婦又
卽爾之從爾敦倫務義直腸坦衷而婦亦小心慎行拮据敬恭何
天之福善佑良而乃於爾夫婦獨降之凶豈我之積孽餘殃故俾

爾夫婦並邁其窮不絕如綫兩孤熒熒長者稍魯穉者尚蒙詎能
繼志祇可衍宗恤爾之後是在爾諸弟之躬爾父年已始衰志亦
遂慵二毛霜點一目霧濛蓋以筆楚譏讒之軀爲怨藪尤叢人匪
金石堪此銷鎔自省無疾何病不容將結數椽於十里蒹葭閒終
焉逍遙乎釣侶耕傭雖耄耋以爲期亦日月之易終百歲誰爲修
短一邱竟共蒿蓬嗟乎吾兒雍其無知耶我言亦贅爾聽則矇其
有知耶千秋同盡萬境皆空矧吾兒曠懷朗識何所憾於冥冥之
中嗟乎吾兒雍爾夫婦既遂同穴之願而爾父母弟妹則爲隔世
之蹤我當戒乎致毀自弗覺其過恫天時地理易泥難逢石塔之
岡銅山爲龍暫爲攢眉未敢樹封所可取者楸原伊邇麥飯可供
伏臘瞻埽惟爾諸弟與爾子不必馬足鵠首而後通擬勒片石遂
納幽宮筆甫在手刃已在胸九迴欲折五內若懵庶乎異時以俟
定痛嗟乎吾兒雍也丹旌雙引黃泉九重招爾英魂鑒我哀悰
哭次婦文

萬曆十九年九月五日子之次兒婦蔣氏之亡一七矣其收也
姑治牲醴而臨几筵而哭之而詞以哀之嗟乎痛哉予何忍見吾
媳婦死也予又何忍見吾賢媳婦死也汝之貌厚而宜福者而顧
薄耶汝之德賢而宜壽者而顧夭耶汝之心仁而宜嗣者而顧無
肩耶生十九年而宜家嫁八年而捐館傷彼淑媛罹此不辰造物
報施孰云可信豈世所稱善惡災祥適然來偶然值而無足憑藉
者耶爲女而所習者貴富及爲婦而所服者則窮約至解其身所
御衣珥旋鬻之以助其夫之貧也嗟乎痛哉其生而所謀者勤嗇
及其沒而所語者則慨慷至舉其家所貽田室盡歸之以成其夫
之行也嗟乎痛哉恭謹以奉舅姑周旋以承父母婉異以諧娣姒
靜理以御臧獲寧或稱賢亦可謂才矣嗟嗟汝舅姑雖從宦乎而
橐故洗也不能早爲汝醫禱而祈汝之命是舅姑之負汝也汝夫
雖業儒乎而名未成也不能早使汝冠帔而慰汝之志是夫之負
汝也嗟嗟舅姑之慟汝何能忘夫之爲汝何忍薄四時之祭必不

令汝餒百年之穴必不令汝獨此生者所能盡心或死者所可瞑目者耶嗟乎痛哉

哭又次婦文

萬曆十六年十月三日癸未又次兒奕之婦以病卒越九日己丑既一七矣舅姑爲設菜菓肴醴命女文拜其靈而哭之而爲文以告語之曰去年此日既喪兒亮之婦豈意今年此日復喪兒奕之婦耶予與汝之姑艾矣而稱始衰中年感慨莫甚於悼逝傷離安能一歲而哭兩婦耶兩婦皆賢而汝之賢柔靜而專諸兒皆貧而汝夫之貧異懦而孱室如懸磬突冷吹煙力難獨助心則加憐章身飾首不羨華鮮茹辛食淡僅給粥饘儒女孀婦澹泊所便若將終身迄無閒言汝姑甚慈汝事亦虔容與周旋未聞一愆汝質頗弱夫力亦縣拮据黽勉已及八年痰眩久嬰疾疢相纏日輕月重東徙西遷膏肓漸痼醫藥罔痊生胡不辰命卒弗延百年同盡一念無牽死生且晝存順歸全返真委化逍遙似僊知汝雙目甘瞑

重玄姑之悲汝蚤歲遽捐夫之傷汝偕老靡緣物理叵測古已樊然世風愈降今益紛焉艾蕭登席蘭芷墮淵禍福繆盪或相萬千惟汝善良而遭迤邐既不由人孰從問天我腸欲裂有淚如泉靈爽未遠憑茲几筵嗟乎痛哉

祭潘氏仲女文

萬曆八年臘月上旬潘氏仲女之殯自松江葬荆水之上女爲吳氏之聘婦也吳氏子玄受其父之命以往奠之酒而侑之以言曰女之懿淑不出閫中我不能言言之靡從女之闕闕華靡之宗我不必言言之無庸第追往事有槩於衷癸酉紀年侍從在公惟女王父聞望正隆同里後生定交傾蓋兩姓之懽一語爲介倉卒問名幣將弗逮鑒我惻愷儀文之外既歲丁丑長星示禔王父遭構暫解簪纓扣闥扞罔我罪則深歸田殘息豐草長林矧以困苦熒然在疚女祖女父不我瑕詬命駕窮邨吐肝握手幸其生全憫其狂謬新稠彌篤夙好不渝念此葭葦相彼田廬青山藏骨綠野卜

居荆溪之壤視若故墟豈其無因焉蘿依附顧我寡修靡緣徼祚
方圖慶延忽承傷訃盛雅勤渠初心遂負蘋蘩未託伉儷已諧遣
兒臨穴我心實哀遠從王母永瘞泉臺一觴以酌百擣於懷嗟夫
痛哉

賜餘堂集卷十四

賜餘堂集十四卷明吳中行撰中行字子道號復庵武進人隆慶
辛未進士官編修張居正奪情上植綱常一疏諷之觸其怒杖闕
下幾斃削籍凡五稔而江陵敗乃詔復原官晉秩宮諭則又以讜
論侵閣部大臣坐是引疾歸里者數年朝夕以圖書自娛而扁其
堂曰賜餘謂垂絕之餘年皆天所賜云是集爲其仲子大理寺少
卿亮所編先次其在朝時所作奏疏講章閣試館課四卷詩及雜
文十卷兄吳可行管志道序之 四庫未收列之存目提要云中
行以鯁直稱詞章不甚著於世集中植綱常正朝廷二疏氣節凜
然又不以詞章論矣是集爲萬曆庚子刻本外閒流傳絕少此本
十二卷缺弟二十八弟三十兩葉無處可補謹留空葉於後宣統
元年重四日武進盛宣懷跋

